

CÁTEI LÉ BURI MEJA JADÜGÜBEI APÓSTOLUGU

Loúnajani Búngiu Sífiri Sándu

¹ Lun teófilo.

Abürüjatina bun tídan furúmiñetu nigáradan luágu sun le ladügübei Jesúsu, lúma le larúfudajabei, lúmagiñe dan le lagúmeserunbalin luwádigimari ² darí lúmoun wéyu le lamúdeirúnbei siélnun. Lubáragiñebei lídin siélnun, láu lubáfu Sífiri Sándu aríñaga lumúti cátei lé buri labúseerubei lun jadügüni apóstolugu já meja lanúadajabaña, lárigiñe lídin jámagiñe. ³ Lídan bián-wein wéyu le láubei ubouágu lárigiñe lásaarun lídaangiñe ouweni, arúfudaguati lúngua furáangu joun sarágu weíyaasu luágu wínwan lan. Ába buríti ladímurejan joun luágu larúeijan Búngiu.

⁴ Dán meja le níjeingua lan Jesúsu jáma láni apóstolugu, aríñagati meja joun lun máfuridun jamá lídaangiñe ubúругu Jerusalén, laríñaga joun.

—Agúraba jumá lagúnfulirun dimúrei le líchugubei Nóguchi jun, le uágubei naríñaga jun. ⁵ Subúdi jumúti luágu badíseigüda lan Juan láu dúna, nasúbudiragüdüñein jun luágu málüjadün lan giñe ánjaün badísei láu Sífiri Sándu.

Lamúdeirun Jesúsu siélnun

⁶ Dan le oúndaragujaña lubeí lúma Jesúsu, ába jaríñagun lun.

—Wabúreme, ¿Nijánsan dan le lúnbei bíchuguniya linásiñun Israel lun larúeijan?

⁷ Laríñaga Jesúsu joun.

—Siñáti jasúbudiruni ídame lan o cába lan dan ladügei Nüguchi cátei le buri, ligía rügüñein gayára laríñagun ídame lan ladügei. ⁸ Ánjein dánme le liábin Sífiri Sándu juágun, jibíjuba ubáfu lun geféen jumá nuágu, dándu Jerusalén quei sun loúbawagu Judéa, Samária, chülú lúmoun lidíse-ágei fulásu ubouágu.

⁹ Lárigiñe laríñaguni Jesúsu cátei le, sun añája lan aríaguei, ába liñurúniwa lun lanügüniwa siélun, ába liábin ában juánriñu, ába ladáuragun láu, ába maríjin jamáli lan. ¹⁰ Níñanu aríagua siélun sun amúdeireina lan Jesúsu, ligía jasáiragun bián wügüriña, jarútu jadáüragun jarúgabú, ¹¹ ába jaríñagun joun.

—Wügüriña Galiléana, ¿ca uágu jerédera aríagua siélun? Jesúsu méme le, le amúdeirubei siélun júmagiñe, liábiyaba ítara quei jaríjin lídin.

Lanúadirún Matías lewéñeguame Júdas

¹² Ábati jagíribudun disípulugu lueígiñe wübü le gíribei Olívos lun ubúrugun Jerusalén, lidíse ában kilómetro. ¹³ Dan le jachülürünbei ubúrugun, ába jamúdeirun tídoun rúmu to ní lubei jagánawa. Níñein Pédro jádan, Jacóbo, Juan, Andrés, Felípe, Tomás, Bartolomé, Matéo, Jacóbo le liraü Álfeo, Simón le lídaanbei adámurini le gíribei Cananísta, lúma Júdas le lamúlen Jacóbo. ¹⁴ Oúndaraguátíñaja sun jagía súnwandan lun jayúmuragun lun Búngiu jáma lamúlenú Jesúsu, túma María to lúguchu, jáma ja jíbiri würiña.

15 Luágu ában wéyu lídan dan ligía, ába laráramun Pédro jagíbugiñe sun afíñetiña ja ñíbaña—jawára san-wein güriía—ába laríñagun joun.

16 —Nidújeñu, lúnti buga lagúnfulirun le laríñagubei Sífiri Sándu liyúmulugugiñe Davíd tídan Lerérun Búngiu, lídan le ladímurejánbei luágu Júdas, le adúndejabáliña ja anügübalin Jesúsu adáüra.

17 Ában meja jádaangiñe wánigu, Júdas, áni seríwiti lun Jesúsu úara wáma. 18 Ába lídin, ába lagaññan ában fulásu láu seínsu le afáyeirúbei lun luágu wuríbani le ladügübei. Ába lábaturujan láu lábulugu ünabun, ába lafáünchün, ába láfuridun sun litíripan. 19 Dan le jagáambunbalin güriía ja aganoúbaña Jerusalén, ába jagúajan lun fulásu ligía, Acéldama, míni lan lídan jerérun, Fulásu Láni Jítaü.

20 Ába lasígirun Pédro aríñaga.

—Bürüwañu líña dimúrei buri le luágu Júdas tídan líburu to gíriboun Sálmos. Laríñajare ñi.

Reídeitá lúban málouga,
úa jamá aganoútiña tídan.

Aríñagati gíñe ñi.

Rúalá lubára lun ámu.

21 Ítara líña lubeíti, lúnti wanúadajan ában wügüri wádaangiñe lé meja wámati sun dan le wáma lubeí Jesúsu, 22 lúmagiñe dan le labásterágüdünbalin Juan Jesúsu darí lúmoun dan le lamúdeirünbei siélun, lun lewéñegua lan Júdas. Wügüri ligía, líchuguba fe úara wáma luágu lásaarun Jesúsu lídaangiñe oúweni lúnya labágaridun.

23 Ábati jíridun bián jádaangiñe. José, le méme gíribei Barsabási, le méme gíñe gíribei Jústo, lúma Matías. 24 Ába jayúmuragun lun Búngiu ítara.

—Wabúreme, amürü le subúdijabúbei tun janígi sun gürígia, arúfudabei woun ca lan jádaangiñe bián wügüríña ja anúadira báalibei ²⁵ lun lesériwidunibu queísi apóstolu lewéñegua Júdas. Ladüga féridi láali Júdas lubára ladüga lafígounjan, áni ñüdünja lídoun fulásu le ladünabei.

²⁶ Ábati jíchaajan ubúnuruni, ába láburujan luágun Matías. Lúmagiñe óra ligía, ába ábanjali lan jádaangiñe apóstologu.

2

Liábin Sífiri Sándu

¹ Dan lachülürünbei luwéyuri fédu le Pentecostés, oúndaragu jáña sun lánigu Jesúsu lídan ában fulásu. ² Sódini ába lagaambún ában ireíni ñübinti siéluigiñe quei dan le láfurun ában garábali jéreti, ába lagaambún tídan sun múna to ñí jabei. ³ Ábati lasálrágún buri cátei joun camá ligémeri wátu, afánreinjóaña lun ñi lan ában murúsun lougiñe lábulugu cáda ában jádaangiñe. ⁴ Ába jabuínchun sun jagía láu Sífiri Sándu, ába jagúmeserun adímureja lídan buri ámu luwúyeri dimúrei lueí jerérun quei ladímuregüdüniña Sífiri Sándu.

⁵ Lídoun buri dan ligía, ñíburiñanu juríu Jerusalén ja gúnfulitiña lídan jafíñen, ñübintiña lídaangiñe sun fulásu ubouágu. ⁶ Dan le jagáambunbalin ireíni ligía, ába jóundaragunga gürígia, ibídiñeja joun cába lan jasáminara ladüga cáda ában jádaangiñe gürígia jagía, agáamba jamútiña lánigu Jesúsu adímureja lídan jerérun guánarü. ⁷ Ába laweíridun janígi, ába jariñagun jámagua.

—¿Ma funági Galiléana ja adímurejabaña? ⁸ ¿Ída liñáti wagáambubaliña adímureja lídan lerérun cáda ában wádaangiñe? ⁹ Añájein gürígia Pártiana ya, Médiana, Elámna, Mesopotámiana, Judéana, Capadócia, Póntona jáma Ásiana, ¹⁰ Fríjiana, Panfílina, Ejiptona lúma lídaangiñe buri fulásu África le yagüroun mémebei lueí Ciréne. Añájein giñe Rómána aganoútiña ya, añájein jádaangiñe, juríu ladüga juríu jamá jagübürigu, jíbiri, barü jamaali ligáburu jafiñen juríu. ¹¹ Añájein giñe gürígia Crétana jáma Arábiana, sun wagía agáamba wamútiña adímureja luágu luweírigun Búngiu lídan werérun guánarü.

¹² Weíríti janígi súngubei, ibídiñeja joun cába lan jasáminara, ába buri jálügüdagun jámagua.

—¿Cásan míni lan sun le?

¹³ Jíbiri, ába jéjerajan jáu lánigu Jesúsu, ába jariñagun.

—Bacháruañanúrügü jáña.

Le lariñagubei Pédro joun gürígia ja ñibaña

¹⁴ Ábati laráramun Pédro jáma ja jíbiri únsu apóstolugu, ába lariñagun láu umálali jéreti.

—Wügüriña Judéana jáma sun ja aganoúbaña Jerusalén, agáamba jumeí le lúnbei nariñaguni jun buídu, subúdi jumámugei ca lan lílabei cátei le jarijubei. ¹⁵ Mabácharuántiña wügüriña ja quei jarítangun, néfugubeigili bináafin guetó. ¹⁶ Cátei le, le jarijubei, ligia lé meja uágubei ladímureja Joél, le proféta, dan le lariñagunbei.

¹⁷ Lídoun buríme lagúmujoun wéyu, líña lariñagun Búngiu,

noúnajabei náni Espíritu jádoun sun gürígia,
 nadímurejaba jayúmulugugiñe jisáanigu.
 Nayáwadaguba joun irájüñü,
 lúma joun weíyaaña mútu.

¹⁸ Noúnajabei giñe náni Espíritu jádoun ja
 esériwidubaña nun lídoun buri wéyu ligía,
 wügüríña jáma würíña,
 ábame nadímurejan jayúmulugugiñe.

¹⁹ Narúfuduba buri cátei garíyawaseti siélu,
 narúfuduba seíni ubouágu.
 láubei jítaü seíni buri ligía, láu wátu geméti, lúma láu
 juánriñu láuti gumúlali.

²⁰ Labúrigaduba wéyu,
 láfuarame játi funáti quei jítaü,
 lubáragiñe lachülürün luwéyuri Wabúreme,
 le lúnbei ában lan wéyu weíríti, le marijíngilíbei líbe.

²¹ Áni sun ja amúriajatiña asálbaruni lúmagiñe
 Búngiu, jasálbaruba.

²² ‘Agáamba jumeí lubeíti le lúnbei naríñaguni,
 jugúya wügüríña Israelítagu. Jesúsu le Nazarétna,
 ában meja wügüri le larúfudubei Búngiu
 jigíbugiñe quei wügüri úraguati láu buri cátei
 weínamuti, miláguru, lúma buri seíni le ladügübei
 Búngiu jagánagua lídaangiñe, quei le jisúbudin.

²³ Láu sun líra, dan le ledéregerúnbei jun,
 quei ligáburi aráansejani le larítagebei Búngiu
 lúmagiñe furúmiñeti dan, ába jáfaruni jilágubei
 láu jedéregeruni joun wügüríña wuríbatíña lun
 jádaraguni luágu gurúwa. ²⁴ Ába leséfuruni Búngiu
 lídaangiñe lubáfu ouweni, sarágüda lumúti lúnya
 labágaridun, ladüga siñá lan gabáfu lan ouweni

luágu. ²⁵ Laríñajare urúei Davíd, dan le ladímurejan luágu Jesúsu.

Subúdi numúti luágu númabei lan Nabúreme Búngiu súnwandan,
noúbagiñeñein lun úa lan ni cáta lun lebélaagüdün anúfudei nídoun.

²⁶ Ligía lébubei téjerajan nanígi,
ába nadímurejan luágu ugúndani le nídaanbei.

Láu sun wügüri nan garaüwarügüti,
jeménigitina buágu luágu nabágaridayaba lan,

²⁷ ladüga mígirun bubóun nuwáni lídan jabára jiláaña,

mígirun amürüme lun lañáladun nógubu, áu le bánigu le jínsiñebei bun.

²⁸ Arúfuda bumúti üma le anügübei gürígia lídoun ibágarí magúmuchaditi nun,

áni babuínchagüdübadina láu ugúndani láu abúnja lan nubádu.

²⁹ ‘Nidújeñu, cátei furánguti le, luágu jilá lan meja wadúje Davíd, bunáwa ligía, gayáraagili waríjini lumúaja chülü lúmoun wéyu le. ³⁰ Davíd, ában meja proféta ligía, áni subúdi lumúti meja luágu aríñaga láali lan Búngiu lun luágu jádaangiñeba lan linébaanfan liábin Crístu, le lúnbei lañúurun luágu lála. ³¹ Adímurejati lubeíti Davíd luágu lásaarun Crístu lídaangiñe oúweni, luágu gíñe merédeboun lan luwáni lídan jabára jiláaña, mañáladun ligíame lúgubu. Ítara líña ladímurejan Davíd luágu Crístu camá jamuga aríagu líña lun, áni ítara líña lasúseredun. ³² Sarágüda lumúti Búngiu Jesúsu méme le lídaangiñe oúweni, sun wagía geféentiwa luágu líra. ³³ Ñurügüda lumúti

Búngiu lueígiñe loúnwenren láu sarágu uweírighuni, ába lerésibiruni Sífiri Sándu lúmagiñe Búngiu queísi laríñaguni Búngiu lun, lun gayáraabei lan loúnajani méme Sífiri Sándu ligía joun sun lánigu ubouágu. Ligía cátei le aríja jumáalibei lúma le agáamba jumáalibei guetó. ³⁴ Mára Davíd amúdeirubei siélun, aríñagati Davíd guánarügü.

Laríñajare Búngiu lun Nabúreme.

“Ñürüba lueígiñe noúnwenren,

³⁵ daríme níchuguniña báganiñu lábugiñoun bubáfu.”

³⁶ ‘Lúnti jasúbudiruni sun jugúya linásiñun Israél luágu Jesúsu méme lan le, le jádaragubei luágu gurúwa, adüga láali lan Búngiu lun ligíaba lan Wasálbaragüle, ligíame giñe Wabúreme.

³⁷ Dan jagáambunbalin cátei le, ába lebélorun igárigu tídoun janígi, ába jaríñagun lun Pédro lúma joun jíbiri apóstolugu.

—Wadújeñu, ¿cábasan wadüga?

³⁸ Ába laríñagun Pédro joun.

—Sáansi jumeí jigáburu ligíbugiñe Búngiu, badísei jugúyame cáda ában lídan líri Jesucrístu, ferúdonawa lámuga jífígoun, ru lámugei Búngiu Sífiri Sándu jun.

³⁹ Ladüga aríñagaali Búngiu luágu líchugubei lan giñe Sífiri Sándu jun, lúma joun jadügawagun, lúma joun ja aganoúbaña díse, lúma joun sun ja lagúarubaña Búngiu lun lánigu jamá.

⁴⁰ Láu buri dimúrei le lúma buri ámu, ladímureja Pédro joun, ába laríñagun joun.

—Séfu jumá lueí asúfuriruni le lúnbei liábin jawágun gürígia wuríbatíña ja.

⁴¹ Ítara liñáti ába jabásterun, ja adügübaña gásu láu lerérun, ába jayábin queí buri ürüwa mílu

gürígia lun jafiñerun luágu Jesucrístu wéyu ligía. ⁴² Ába jedéregeragun joúngua lun jafúnrendeiruni le jarúfudajabei apóstolugu joun, aganoúa jagía lídan úarani jámagua, ayúmuragua jagía buri lun Búngiu, oúndaragua jagía lun jeíginun fein to arítaguagülei luágu loúnwen Jesúsu, queísi meja laríñaguni joun apóstolugu lun jadügüni.

Jabágari furúmiñetiña lánigu Crístu

⁴³ Súngubei láuñanu luweírin anígi luágu buri seíni lúma buri miláguru le ladügübei Búngiu jádaangiñe apóstolugu. ⁴⁴ Sun ja afiñerubaña, lídaañanu ában, ába buríti jafánreinjani le jámati jádaangua. ⁴⁵ Jalúgurajeí buri jafúlasun lúma le jámati, ába jafánreinjani lebégi según lemégeirun cáda ában. ⁴⁶ Ságü wéyu joúndaragun témpulurugu lun jájuduragun lun Búngiu. Lárigiñe, ába joúndaragun lúbiñe ában jádaangiñe lun jeíginun fein to arítaguagülei luágu loúnwen Jesúsu, lúma lun jeígin le lánina ságü wéyu, lídan ában láu ugúndani lúma gudémegu. ⁴⁷ Ábaja jadímurejan weírigu luágu Búngiu, ábati jínsiñe jamá joun gürígia, ábatija anáajeina lániña Búngiu ja asálbareinabaña jánwoun.

3

Lareídagun ában meíbugunti

¹ Luágu ában wéyu, ába lídin Pédro lúma Juan témpulurugu ladaúnrún úrúwa rábounwéyu, le lórate ayúmuraguni lun Búngiu. ² Ságü wéyu, ñíñein lan ában wügüri meíbugunti lúmagiñe lagüriajouñ, barüwarügütíja añúura lubádu tubéneri témpulu le gíribei “Béna Buídumeraüti” lun lamúriajan seínsu

jáma ebélurutiña témpulurugun. ³ Dan le laríjinbaliña meíbugunti ligía Pédro lúma Juan jebélura lan témpulurúgun, ába lamúriajan seínsu jáma. ⁴ Ábati jaríjin Pédro lúma Juan luágun, ába laríñagun Pédro lun.

—Aríjabá wawágun.

⁵ Ába laríjin jawágun, agúraba yebe jíchugun seínsu lun. ⁶ Ába laríñagun Pédro lun.

—Maseínsutina, níchigaali le númati bun. lídan líri Jesucrístu le Nazarétna, sarába, beíbuga.

⁷ Ábati lárügüdüni Pédro lueígiñe lújabu le loúnwenren, ába liñúraguni, óra ligía, ába ledérebugudun lugúdi lúma lumúrugute. ⁸ Ábati lachúbarun lun laráramun, ába leíbugun. Ába lebélorun jáma témpulurugun, eíbugeina, achúbajeina, adímurejeina luágu luweírigun Búngiu. ⁹ Ába jaríjini sun gürígia eíbuga lúma adímureja luágu luweírigun Búngiu. ¹⁰ Weírititi janígi luágu le asúseredubei lun, quei subúdi jabálin wügüri ligía, subúdi jameí luágu ligía lan léñaja añúurubei amúriaja tubéneri témpulu le gíribei “Béna Buídumeraüti”.

Lapúrichijan Pédro témpulurugu

¹¹ Mígiragüdün lumútiñati meíbugunti le areídagubei Pédro lúma Juan, súnti gürígia, ába jeíbaagun láu luweírin janígi luágun tubáranda témpulu le gíribei Salomón, le ní jabei. ¹² Dan le laríjini Pédro cátei le, ába laríñagun joun gürígia.

—Jugúya Israelítagu, ¿ca uágu laweírída janígi? ¿Ca uágu jaríaguawa camá jamuga wagía areídaguagüdübalin wügüri le, eíbugagüdei láu wabáfu o láu lan wagúnfulin lúma Búngiu?

13 Máma líña, Búngiu, le Jabúngiute binádu wagübürigu Abrahám, Isáac lúma Jacób, ligía areidaguagüdübalin wügüri le lun líchuguni líñun-ágei uweiriguni lun Jesucrístu le Liraũ, ligíra lé meja jedéregerubei joun lúrudugu, áni dan lálugan Piláto lígiragüdüni, májatün. 14 Lubáragiñe jamúriajan lun lígirawagüdün Jesúsu le jarúmabei áni richágua, amúriajarügü jugúya lun lígirawagüdün ában gáfarajati. 15 Ítara líña jáfaruni le íchugubalin ibágari tímatimaati. Ába lásaaragüdüni Búngiu lídaangiñe ouweni, áni geféentiwa luágu líra. 16 Niján wügüri le jaríjubei áni subúdi jumeí, láu lubáfu méme Jesúsu ligía, lerésibira érei. Wafíñen luágu Jesúsu, ligía areidaguagüdübalin buídu buídu quei jaríjini.

17 ‘Subúdi náali, nidújeñu, luágu ibídiñe lán meja jun ca lan jadügübei dan le jáfarunbálin Jesúsu, jugúya jáma jábutinu. 18 Láu sun líra, gúnfuli lumúti Búngiu lé meja laríñagubei jádaangiñe profétagu, luágu lúnti lan lasúfuriruba lan Crístu. 19 Ligía lubeíti, ígira jumeí binádu jigáburi, giríbu jumá lun Búngiu, chibáwa lámuga jifígoun. 20 Ábameti gayára lan loúnajan Búngiu eméraaguni tun juwáni, oúnajaya leíme Jesúsu le Crístu, le aráanseelibeí lubáragiñe furúmiñeti dan woun. 21 Láu sun, lúnti lan leréderun Jesucrístu siélu guetó daríme laráanseruni Búngiu sun cátei quei laríñaguni jádaangiñe profétagu ja derégeguaañabaña jóungua lun, lídan meja dan le binádu. 22 Ítara líña lubeíti aríñagati meja Moisés joun binádu wagübürigu. “Loúnajaba Wabúreme Búngiu ában proféta jídaangiñe guánarügü quei loúnajanina. Ánja jumá lun sun le lúnbei laríñaguni jun, 23 ladüga

sun ja amájarutiña lun le laríñagubei proféta ligía, jagídarúba jádaangiñe lánigu Búngiu, ábame jagúnrinchawagún.”

²⁴ Ítara líña lubeíti, sun profétagu lúmagiñe Samuél darí lárigiñe, adímurejatiña libügürü buri cátei le lúnbei lasúseredun lídoun buri wéyu le. ²⁵ Jugúya lúnbei jerésibiruni sun le laríñagubei Búngiu jádaangiñe profétagu, luáguti gíñe jufúleisein darádu lé meja ladügübei Búngiu jáma binádu wagübürigu dan le laríñagunbei lun Abrahám. “Nabínirubaña sun gürígia ja ubouagubaña láu ában jádaangiñe binébaanfaangu.” ²⁶ Ába lanúadajani Búngiu Liraü lun loúnajani jun furúmiñe, jugúya juríu, lun labínirunün cáda ában jídaangiñe, láu laságarunün lídaangiñe luríban jigáburi.

4

Pédro lúma Juan jagíbugiñe gumádimatiña

¹ Ñígiña Pedro lúma Juan adímureja joun gürígia, ligía jayábin jafádirigun juríu, jáma jábutigu súdeara ja oúnigirubárun témpulu, jáma ja lídaanbaña jadámurin saduséogu. ² Gáñitiña ladüga jarúfudajan Pédro lúma Juan joun gürígia, aríñaga jagía luágu arúfudúa lan luágu jásaaruba lan gürígia lídaangiñe ouweni lúnya jabágaridun ladüga sará lan Jesús. ³ Ábati janügüniña adáüra, ába jádaruniña furísunrugun darí larúgan quei dárüjali lubeí. ⁴ Sarágu jáña jádaangiñe ja agáambubalin ugánu le jíchugubei apóstolugu afíñerutiña luágu. Ja afíñerubaña járügü wügüriña, queí buri seíngü mílu.

⁵ Larúgan, ába jóúndaragun jábutigu juríu, wügüríña weírigutiña lídan jafíñen, jáma arúfudajatiña lilúrudun Moisés, Jerusalén. ⁶ Ñíñein gíñe Anás le fádiri le íñutimaabei, Gáifasi, Juan, Alejandro jáma sun ja jádaangiñebaña lufámilian Anás. ⁷ Ábati jóúnajan anügei Pédro lúma Juan, ába jíchuguniña lamídan jadámurin, ába jaríñagun joun.

—¿Ca áu ubáfu, o ca ídan íri jareídaguagüdei wügüri le?

⁸ Buin líña Pédro láu Sífiri Sándu, ába lariñagun joun.

—Jábutigu juríu jáma wügüríña weírigutiña lídan wafíñen. ⁹ quei jálügüdüníwa luágu buíti le adügübei lun ában wügüri sánditi, ída líña lan lareídawaguágüdün, ¹⁰ buséntiwa lun jasúbudiruni, jugúya jáma sun gürígia ja Israelítagu, luágu láu lan lubáfu Jesucrístu le Nazarétna niján lubei wügüri le ya jigíbugiñe areídaguañu. Láu lubáfu Jesucrístu, le meme jádaragubei luágu gurúwa, le lásaaragüdübei Búngiu lídaangiñe oúweni, lareídagua. ¹¹ Jesúsú le, ligía queísi dübü le áubei jíchiga mebéreseni, jugúya le queíbaña ábunagutiña múna, áni ñübinjali Jesúsú lun ligíaba lan quei dübü le mégeiwatimaabei lídan bunáguau. ¹² Úati ámu lun lasálbaruníwa lueídügüya Jesucrístu, ladüga míchuti Búngiu ámu íri ubouágu lun gayára lan wasálbarun lueígiñe.

¹³ Dan jaríjini gumádimatiña luágu adímureja jamá Pédro lúma Juan manúfudeiga ni murúsun, áni subúdi jamei luágu máma jamá gürígia atúriajatiña sarágu, luágu gürígia jamá ja furúmieguarügü, ába laweíridun janígi, ábati jasúbudiruni luágu jádaangiñetiña lan já meja eíbugubaña lúma Jesúsú.

¹⁴ Queíti ñiñein lubeí wügüri le areídawaguágüdübei jáma, rára ligía, siñáti jaríñagun lúrudugu ni cáta.

¹⁵ Ábati jóunajaniña lúrudugu Pédro lúma Juan lúma wügüri le areídaguaalibei bougudin lueí jadámurin lun gayáraabei lan jayánujan jámagua. ¹⁶ Jaríñagati.

—¿Cábasan wadüga jáu wügüriña ja? Sun ja aganoúbaña Jerusalén subúdi jamúti luágu adüga jamáali lan miláguru le, áni siñáti wayéedagun láu.

¹⁷ Lun mabúruchagun lan ugánu luágu cátei le lídan sun fulásu, wewéridiraña lun madímurejandügüya jamá ni ca un lídan líri Jesúsu lúmagiñe ugúñe.

¹⁸ Ábati jagúarun joun lun jebélurun, ába jaríñagun joun lun ni lan ca uágu lun madímurejan jamá, marúfudajan jagíame lídan líri Jesúsu. ¹⁹ Ába jaríñagun Pédro lúma Juan joun.

—Samína jumá júngua ánjein buídu lubeí ligíbugiñe Búngiu lun ladügün le jubeíbei, ígira le lubeíbei Búngiu. ²⁰ Wagía, siñáti wámanichun láu cátei le arija wamáalibei lúma le agáamba wamáalibei.

²¹ Ábayati jewéridiruniña gumádimatiña, ába jígiragüdüniña. Madáritiña ída lúba lan jadügün ni cáta jáu ladüga adímurejatiña buri gürígia buíti luágu Búngiu luágu cátei le asúseredubei. ²² Wügüri le areídagubei láu miláguru ligía, sügü láu bián-wein irúmu láu.

Jamúriajan afiñetiña manúfudei lúma Búngiu lídan jesériwidun lun

²³ Dan le jáfuridun Pédro lúma Juan furísunrugugiñe, ába jóúdin le ñí jabei jíbirigu, ába jabájüdaguni sun le jaríñagubei jábutigu fádirigu jáma wügüriña weírigutiña joun. ²⁴ Dan

jagáambubalin, ába jayúmuragun sun jagía lun Búngiu, ába jaríñagun.

—Wabúreme, amürü Búngiubei le adügübalin siélu, ubouú, barána lúma sun cátei. ²⁵ Amürü, aríñagatibu láu lubáfu Sífiri Sándu liyúmulugugiñe David lé meja esériwidubei bun.

¿Ca uágu jagáñida ja mámabaña juríu, samína jagía lun jadügüni cátei le siñábei jadügüni? ²⁶ Inúraguatiña lurúeitegu ubouú joungua, oúndaraguatiña lábutigu fulásu lun jadügün wuríbani lun Wabúreme Búngiu lúma lun Crístu le lanúadajabei.

²⁷ Áni suséreti ítara, oúndaraguatiña Heródes luma Póncio Piláto lídan ubúruugu le, jáma ja mámabaña juríu, lúma jáma Israelítagu lun jadügün wuríbani lun Biraü Jesúsú le sándubei, le banúadajabei. ²⁸ Láu líra, adüga jamúti sun le baráansejabei lun lasúsereduba lan. ²⁹ Guetóti, Wabúreme, aríjabeí jasíadiruníwa, rúba anígi woun, wagía le esériwidubalibu, lun wadímurejan buágu manúfudeiga, ³⁰ gayára lámuga gíñe wareídaguágüdün sánditiña, adüga wagíame miláguru lídan líri Biraü Jesúsú le sándubei, láu bubáfu wawágu.

³¹ Dan le lásurun jayúmuragun, ába lánjingichun fulásu le ñí lubei joundaragua, ába jabuínchun sun jagía láu lubáfu Sífiri Sándu, ába japúrichijani lerérun Búngiu manúfudeiga.

Sun cátei jáni súngua luágu

³² Sun ja afíñerubaña, ában lábu jarítagn, ában lábu jabúseerun. Úati ni ában aríñaguti luágu lumégen luágu láni lan lábugua, sun cátei jáni

súngua luágu. ³³ Ába jasígirun apóstolugu adímureja luágu lásaarun Wabúreme Jesúsú lídaangiñe ouweni láu sarágu ubáfu, ábati labíniruniña Búngiu sun jagía sarágu. ³⁴ Úati ni ában jádaangiñe emégeiruti ni cáta ladüga sun ja gafúlasunbaña o gában, ába buri jalúgurunun, ába janügüni tebégi, ³⁵ ába jadéregeruni joun apóstolugu lun lafánreinjoún jádan ja emégeirutiña. ³⁶ Queíburi, ñíñein ában jádaangiñe ladügawagun Leví jádan, gíriti José, agüriajóuti luágu ubóju le gírabei Chípre, ába jáchuni apóstolugu Bernabé, míni lan líra, “Le Íchigubei Gurásu”. ³⁷ Wügüri ligía, ába lalúguruni lufúlasun, ába lanügüni seínsu edégera joun apóstolugu.

5

Jafígoun Ananías túma Safíra

¹ Ñíñein gíñe ában wügüri gíriti Ananías, túma Safíra, to lúmari, ába gíñe jalúgurun ában fulásu. ² Wügüri le, ába lanügün lídaangiñe seínsu, ába lídin láu líbiri joun apóstolugu, lafámura camá jamuga ligía rügüñein libíjin luágu fulásu. Áni subúsititi sun cátei tun lúmari. ³ Ábati laríñagun Pédro lun.

—Ananías, ¿ca uágu bígira lun lagañiruni Máfia baríttagun lun layéejagüdünibu lun Sífiri Sándu, lun beréderun láu líbiri seínsu le afáyeirúbei bun luágu fulásu? ⁴ ¿Ma funági bufúlasun meja fulásu? Lárigiñe balúguruni, ¿ma biseínsun lun badügüni le babúseerunbei láu? ¿Ca uágu basáminara badügüni cátei le? Búngiu bálugubei bayéedagun, máma wügüriña.

⁵ Dan lagáambuni Ananías cátei le, ába lábुरुjan ouwe. Súnti ja asúbudirubalin cátei le, ába janúfudedagun. ⁶ Ábati jayábin wügüríña, ába jouburaguni Ananías, ába janüğüni ábuna.

⁷ Queíburi ürüwa óra lárigiñe, ába tebélurun lúmari Ananías, ibídiñoun ni cáta tun luágu le asúseredubei.

⁸ Ába laríñagun Pédro tun.

—Aríñagabeí nun, ¿luágu ebégi le jaríñagubei jalúgurei fulásu?

Ába taríñagun.

—Ánja, luágu ebégi ligía.

⁹ Ábati laríñagun Pédro.

—¿Ca san uágu jebélura lídoun úaraduni lun jouchaguni láni Búngiu Espíritu ítara? Añatén ja anügübalin búmari ábuna, janügadibu gíñe.

¹⁰ Lídan méme óra ligía, ába táburujan ouwe lubádu lugúdi Pédro. Dan jebélurun wügüríña, jadáriroun jiláaru, ába jaságarunun, ába jábununun loubagiñe túmari. ¹¹ Súnti gürígia ja afíñebaña luágu Crístu jáma sun ja asúbudirubalin cátei le, ába janúfudedagun sarágu.

Sarágu buri miláguru lúma seíni

¹² Adáaguatiña buri apóstolugu sarágu seíni lúma miláguru jádan gürígia, ábati buri joundaragun sun afíñetiña lídan fulásu témpulurugu le giríbei “Barandá Salomón”. ¹³ Úati meja ni ában jádaangiñe ja mámabaña afíñetiña lun joundaragun jáma afíñetiña ladüga janúfude, láu sun jínsiñe jamá sun afíñetiña joun gürígia, sarágu. ¹⁴ Eíbu wéyu, eíbu jayábin gürígia lun jafíñerun luágu Jesucrístu, dándu wügüríña queísi würíña. ¹⁵ Quei jadüğüña

lan apóstolugu sarágu miláguru, ába jaságaraguniña gürígia sánditiña úmadoun tídan jabárari lun dan lan lásügürün Pédro, gayára lan jareídagun láurügü tadágarun liyáwa jawágu. ¹⁶ Ñübintiña gíñe sarágu gürígia lídaangiñe buri fulásu yaráfati lun Jerusaléoun jáu sánditiña jáma ja gawágutiña espíritu wuríbatíña, sun jagía areídaguátiña.

Jeíbaajóun Pédro lúma Juan

¹⁷ Léti fádiri le íñutimaabei jáma ja jánigu saduséogu ja lúmabaña, ába jabuínchun láu gimúgaü, ¹⁸ ába janüğüniña apóstolugu, ába jadáürüniña. ¹⁹ Ába ladáraruni ában láni Wabúreme Búngiu ánjeli tubéneri furísun áriebu ligía, ába láfuridagüdüniña, ába laríñagun joun.

²⁰ —Jeíba, jaráramame témpulurugu, ábame jabájüdagun joun ja ñíbaña luágu iséri ibágari le líchugubei Jesucrístu joun gürígia.

²¹ Dan jagáambuni cátei le, ába jóúdin témpulurugun bináafingua, ába jagúmeserun arúfudaja.

Súnti dan le, le fádiri le íñutimaabei jáma ja lúmabaña, ába jóúndaruniña líñun-ágei lúruđu, ja súnbaña Israelítagu weírigutiña, ába jóúnajan anügaña apóstolugu furísunrugugiñe. ²² Dan jachúlürünbei polisía furísunrugu, madári jamútiña ñi. Ába jagíribudun, ²³ ába jariñagun.

—Darúñu líña wadárirunun furísun, ñíñanu súdaara bénabu oúnigira, dan le webélurunbei, madáritiwa ni ában jádaangiñe apóstolugu ñi múnada.

²⁴ Dan le jagáambunbalin jábutigu fádirigu lúma jábuti súdaara ja oúnigirubarun témpulu cátei le, ába

jálügüdagun jóungua cába lánfuna ídan lébeda cátei le. ²⁵ Lídan óra ligía, ligía liábin ában wügüri, ába laríñagun joun.

—Ja wügüriña ja jádarubaña furísunrugun, añájein témpulurugu arúfudaja joun güriía.

²⁶ Ábati lídin jábuti oúnigirutiña jáu súdaara, ába janügüniña láu buídu, ladüga janúfude luei jachámuragun güriía dübü jawágun. ²⁷ Dan jachülürün jáu, ába jíchuguniña ligíbugiñe líñun-ágei lúrudu, ába laríñagun fádiri íñutimaati joun.

²⁸ —Wéridi wamáadün lun marúfudajandügüya jumá lídan líri Jesúsu, áni ¿ca jadüga? Buíngüda jumá sun Jerusalén láu le jarúfudajabei, áni buséntün jíchuguni dúru wawágun luágu loúnwen wügüri ligía.

²⁹ Ábati loúnabun Pédro jáma ja jíbiri apóstolugu, ába laríñagun.

—Lúnti wagáambuni Búngiu lun wadügüni le lubeíbei lubáragiñe le jabeíbei wügüriña. ³⁰ Le Jabúngiute binádu wagübürigu, ligía ásaaragüdübalín Jesúsu, le méme jáfarubei láu jádaraguni luágu ában gurúwa. ³¹ Rúlaali Búngiu uweíriguni lun, ñurügüdaleí lueígiñe loúnwenren, adüga láali Ábutime lúma Asálbaragülei, gayára lámuga jígiruni Israelítagu binádu jagáburi, lun giñe ferúdunawa lan jafígoun. ³² Geféentiwa luágu líra, geféenti giñe Sífiri Sándu le líchugubei Búngiu joun ja ñúdünbaña láu le lubeíbei.

³³ Dan jagáambunbalín líñun-ágei lúrudu cátei le, ába jagáñidun, ába yebe jabúseerun jáfaraguniña jilágubei. ³⁴ Ñíñein ában fariséo jádan lúrudugu, gíríti Gamaliél, maésturu lánina lilúrudun Moisés,

inébeti joun gürígia sarágu. Ába laráramun, ába lariñagun lun janügüniwa apóstolugu lídaangiñe adámurini luágu murúsun óra, gayára lámuga ladímurejan jámarügü lúrudu. ³⁵ Ába lariñagun joun gumádimatiña.

—Wügüriña Israélna, toúnigi jumátia láu le lúnbei jadügüni jáu wügüriña ja. ³⁶ Jarítagua jumátia luágu iñúragua lán meja Teudás lúngua aríñaga luágu ában lan wügüri weíriguti ligía, ába jafálaruni gádürü-san wügüriña, áni afarúati jilágubei, súnti ja afálarubalin, ába jawáragadagun, ába lagúmuchun sun cátei. ³⁷ Lárigiñe, lídan lidáani jabájüdüniwa gürígia, ligía liñúragun Júdas le Galiléana lúngua, sarágu jáña afálaruti lídan labúseerun yebe lagáragabagun luágun gumádi. Áfarúati gñe, ába gñe jawáragadagun sun ja afálarubalin. ³⁸ Ígira jumáña lubeíti wügüriña ja, memétera jumá jámoun. Ladüga ánjein jáni lubeí wügüriña cátei le jarúfudajabei lúma le jadügübei, lagúmuchaguba, ³⁹ ánjein láni lubeí Búngiu, siñá jubei agünrinchagua. Toúnigi jumá, mageíndagua jumá lúma Búngiu.

⁴⁰ Ába jánjanrun súngubei láu le lariñagubei. Ábati jebélaagüdüniña apóstolugu, ába jabeíchuniña, ába jariñagun joun lun jebé lan jadímurejan lídan líri Jesúsu. Lárigiñe, ába jígiragüdüniña, ⁴¹ Ába jáfuridun apóstolugu jámagiñe lúrudugu, gúndaañu láu larijiniña Búngiu queísi gürígia gadúnamatiña lun jasúfuriruni busíganu luágu líri Jesúsu. ⁴² Merédetiti jarúfudajan témpulurugu lúma tídan buri múna ságü wéyu, aríñaga jagía luágu Jesúsu lan Crístubei le agúrabajoúbei.

6

Jáluajouniwa sédü idejatiña

¹ Lídan dan ligía, quei agíbedeina jamátima afiñetiña luágu Jesucristu, ába jagúmeserun ja adímurejabaña güriégu adárira jadúnrun ja adímurejabalin jerérun juríu, ába jariñagun luágu mibíjin jamá würiña güriégu ja jiláañabaña úmari eígini dan le lafánreinjouniwa, ságü wéyu. ² Ábati joundaruniña dúusu apóstolugu afiñetiña, ába jariñagun joun.

—Mabuídunti lun wígiruni wapúrichijani lerérun Búngiu lun wagíaba lan afánreinjei eígini. ³ Ligía lubeíti nidújeñu, áluga jumá sédü wügüriña jídaangiñe ja gafíñerúati jawágu, ja chúbaña áu, ja derégeguatiña jóungua lun Sífiri Sándu le gumúti, lun jadügüni wadágimanu le. ⁴ Wagía, wedéregerubei wadáani lun ayúmraguni lun Búngiu luma lun warúfudajani lerérun.

⁵ Ába júaradun súngubei lídan cátei le, ába janúadiruní Estéban, le ában wügüri buín líña láu afiñeni luágu Jesucristu áni derégeguañu líña lúngua lun Sífiri Sándu le gumúti, Felípe, Prócoro, Nicanór, Timón, Parménas lúma Nicolás le Antioquíana, lé meja afálarubalin ligáburi jafiñen juríu. ⁶ Ába janügüniña le ñíjin jabeí apóstolugu, ába jayúmragun lun Búngiu jáu, ába jíchuguni jájabu jawágu lun jabíniruniña.

⁷ Ába gíbetimaajaña lan agáambuti lerérun Búngiu lídan sun fulásu, agánwoundeina jagía afiñetiña Jerusalén furése, ába giñe jafiñerun sarágu fádirigu juríu luágu Jesucristu.

Ladáürün Estéban

⁸ Adáaguatíja Estéban, le ábanbei wügüri le buínbei láu ubáfu lúma abíniruni lúmagiñeti Búngiu, miláguru lúma seíni jádan güri-gia. ⁹ Ábati jagúmeserun güri-gia asígeneja luágu, güri-gia jagía, tídaangiñetiña jalígilisin juríu to gírìboun “Idámunigu Joúnguaaña”, jáma Cirénena, Alejandríana, Cilíciana jáma Ásiana. ¹⁰ Siñáti joun lúma Estéban, ladüga láu lichú áu le líchugubei Sífiri Sándu lun ladímureja. ¹¹ Ábati jafáyeirun wügüriña lun jariñagun luágu agáamba jamáani adímureja wuríba luágu Moisés lúma luágu Búngiu. ¹² Ábati jafúdagüdüniña güri-gia, jáma arúfudajatiña lilúrudun Moisés, jáma wügüriña weirigutiña lídan jafíñen juríu, ába járügüdüni Estéban, ába janü-güni ligíbugiñoun líñun-ágei lúrudu. ¹³ Ába giñe jálugun yéetiña lun jariñagun luágu lerédera lan adímureja wuríba tuágu témpulu sándu lúma luágu lilúrudun Moisés. ¹⁴ Jariñaga.

—Agáamba wamúti lariñagun luágu lagünrinchaguboun lan Jesúsu Nazarétna témpulu, sáansi leíme igáburi le lígirubei Moisés woun.

¹⁵ Dánti jarijini lúrudugu jáma sun ja ñíbaña ligíbu Estéban, ítara líña camá ligíbu ában ánjeli.

7*Ladímurejan Estéban luágu lufúleisein*

¹ Ábati lariñagun fádiri le íñutimaabei lun Estéban.

—¿Inárüni sun cátei le?

² Ába loúnabun.

—Nidújeñu, nagübürigu, agáamba jumána. Weiriguti Búngiu, arúfudaguáti meja lúngua lun Wáguchi Abrahám dan le Mesopotámia lan,

lubáragiñe lídin agánawa Harán. ³ Ába laríñagun lun. “Ígirabeí bageíra jáma bidújeñu, beíba lídoun fulásu le lúnbei narúfuduni bun.” ⁴ Ábati láfuridun Abrahám Caldéagiñe, ába lídin agánawa Harán. Lárigiñe, ába loúnwen lúguchi, ába lanügüni Búngiu Abrahám lídoun fulásu le ñí lubei wagánawa guetó. ⁵ Míchuti ni murúsun múa lun lídan fulásu le, aríñagarügüti lun luágu lachülürüba lan dan lun lánibei lan ageíraü le jáu sun ladügüwagun, láu sún meja marájüñügili lan Abrahám lídan dan ligía. ⁶ Aríñagati Búngiu lun luágu jaganouba lan ladügawagun quei teréncha lídan jageíra ámu, luágu idámunibaña lan ñi, amúdirúa jagíame luágu gádürü-san irúmu. ⁷ Aríñagati giñe Búngiu lun. “Nagúseragüdübaña lílana fulásu le anügübaliña idámunime, lárigiñeme lásügürün gádürü-san irúmu, ábame jáfuridun ñígiñe, ábame jesériwidun nun lídan fulásu le.” ⁸ Adügati Búngiu ában darádu lúma Abrahám, ába lerésibiruni Abrahám circuncisión, liseínime darádu ligía. Ligía, dan lubeí lagüriajounbei liraü Abrahám le Isáac, ába lerésibiruni circuncisión luágu wídü wéyu láu, ítara giñe ladüga Isáac lun Jacób le liraü, adügaleí Jacób, le méme gíribei Israél, joun dúusu lirájüñü, ja jagübürigubaña dúusu türíbu ja gíribaña Israelítagu guetó.

⁹ ‘Lirájüñü Jacób ja, ja binádubaña wagübürigu, ába jagímugajan lun José le jamúlen, ába jalúguruni lun lanügün Ejíptoun quei idámuni. Ñíñein Búngiu lúma José, ¹⁰ ába leséfuruni lídaangiñe sun lidíjeri láu líchugun gunfaráandaü lun. Ába lagáñeiragüdüni lufúleisein Faraón, le lurúeite Ejípto lun, ába

líchuguni José ábutime ñi Ejípto lúma tídan lúban Faraón.

¹¹ ‘Ábati ladágarun ában ilámaü lídan fulásu le Ejípto lúma Canaán, deréti meja dan ligía, madáritiñati binádu wagübürigu cába lan jeíga.

¹² Ába lagáambun Jacób luágu níjein lan eígini Ejípto, ába loúnajaniña lirájüñü, ja binádu wagübürigu, ñi. Ligía furúmiñetibei jaweíyasun. ¹³ Le libíaman jouúdin, ába larúfudagun José lúngua joun líbugañanu lúma lamúlen, ítara líña lasúbudirúniña urúei lidújeñu José. ¹⁴ Ábati loúnajan José anügei Jacób le lúguchi jáu sun lufámilian, Ejíptoun, ürüwañanu-wein-queínsi gürígia jagía. ¹⁵ Ítara líña lídinbei Jacób agánawa Ejípto, le ñí lubei louwe, ñí lubei giñe jouwegua binádu wagübürigu. ¹⁶ Átiri irúmu lárigiñe, ába lanügüniwa jábu ñígiñe lídoun fulásu le gíribei Síquem, ába jabunún lídan umúajaü lé meja lagáñijabei Abrahám jámagiñe lirájüñü Hamor ñi Síquem.

¹⁷ ‘Dan le layárafadúnbei dan lun lagúnfulirun dimúrei le líchugubei Búngiu lun Abrahám, gíbeeña ladügawagun Israél Ejípto. ¹⁸ Ábati lagúmeserun ában urúei agúmadija Ejípto le ibídiñejabubei lun José. ¹⁹ Ába layéeraguniña urúei ligía warásan juríu, amúdiragua láña binádu wagübürigu, águragüdáña jasáanigu ja figígiña joun lun jouwegun, gumúgua lámuga warásan. ²⁰ Lídan dan ligía, ligía lagüriajoún Moisés, ában irájü buídumeraüti, ába jagüriajani lagübürigu jábiñe luágu ürüwa játi. ²¹ Dan lachülürünbei dan lun jáguruni, ába jáguruni, ába tabúduni liraü urúei Ejíptona, ába tagüriajani quei tiraü. ²² Ligía lafúnrendeirubalin Moisés lichú jáu

Ejípthona, áni gabáfutiti lídan le laríñagubei lúma le ladügübei.

²³ ‘Dan le bián-weínjali irúmu láu Moisés, ába lálugun lídin aríjaña lirásan ja ladügawagun Israél, ja ñíbaña Ejípto. ²⁴ Ába laríjin ában Ejípthona amúdiragua ában jádaangiñe, ába lídin Moisés íderaguei lidúje, ába leséfuruni láu láfaruni Ejípthona ligía jilágubei. ²⁵ Moisés, jarítaguati luágu jasúbudirúbei lan Israelítagu luágu ligíaba lan layúsura Búngiu lun jésefurún lídaangiñe le gádaanbaliña, jagía, masúbudirun jamúti. ²⁶ Larúgan, ába ladúnragun Moisés jáma biáma Israelítagu ageíndagua jámagua, ába yebe labúseerun laráandaragüdüniña jámagua. Ítara líña laríñagunbei joun. “Ában mémetia mútu jugúya, ¿ca uágu jageíndagua júmagua?” ²⁷ Ábati ládaruni wügüri le áluajabei wuríbu lúma le ában, ába laríñagun lun. “¿Ca íchubalibu ábutime lúma agúseragüdütime wádan? ²⁸ ¿Buséntibu gíñe báfarunina quei báfaruni Ejípthona ligíra gúñaarü?” ²⁹ Dan lagáambuni Moisés cátei le, ába lanúrajan, ába lídin Madiáoun. Ába leréderun agánawa ñi quei teréncha, ába jáguchi lan bián irájüñü ñi.

³⁰ ‘Bián-wein irúmu lárigiñe, ába lasáliragun ában ánjeli lun lídan fulásu mageírawati, yaráfa lun wübü le gíribei Sinaí, liábin lun quei wátu geméti lídan ában búbugati. ³¹ Ába laweíridun lanígi Moisés láu cátei le laríjubei, dánti layárafadun lúntima laríjini buídu, ába lagáambun laríñagun lumálali Wabúreme Búngiu. ³² “Áu Jabúngiute binádu bagübürigu, Lubúngiute Abrahám, Lubúngiute Isáac lúma

Jacób.” Ábati lagúmeserun Moisés adádagara láu anúfudei, májaali ni lun laríjin ñíjin. ³³ Ába laríñagun Búngiu lun. “Gidáboun bigeídin lueígiñe bugúdi, ladüga fulásu le ñí bubei rára, fulásu sánduti. ³⁴ Aríja náali jasúfurirun numútuniña Ejípto, agáamba náali jagúajan láu igárigu, neséfuraaña lubeíti. Jigábu lubeíti, noúnajadibu Ejípto.”

³⁵ ‘Láu sun mebéresen jamá láu Moisés, álügüda jameí ca lan íchubalin ábutime lúma agúseragüdütime, oúnaja lumúti Búngiu quei ábuti lúma quei eséfujati, adímurejeina Búngiu lídaangiñe ánjeli le asálragubei lun lídan búbugati. ³⁶ Moisés aságarubaliña binádu wagübürigu Ejíptogiñe, adüga ligía miláguru buri lúma buri cátei weíriguti lídan fulásu ligía, lídan Barána Funáti, lúma lídan fulásu mageírawati, luágu bián-wein irúmu. ³⁷ Moisés meme le, ligía aríñagubei joun Israelítagu. “Louñajaba Búngiu ában proféta jun jádaangiñe guánarügü jibíriña, quei loúnajanina. Adüga jumá gásu láu.” ³⁸ Lídan le añája lubeí Israelítagu adámurigu lídan fulásu mageírawati, Moisés méme le, ába ladímurejan lúma ánjeli luágu wübü le Sinaí, ába lásügüragüdüni lerérun ánjeli ligía joun binádu wagübürigu. Ligía le erésibirubalin ugánu le adúrarubei lun sun dan lúmagiñe Búngiu lun lásügüragüdüni woun.

³⁹ ‘Májatiña meja binádu wagübürigu jagáambuni Moisés, mebéreseruntiña láu, busénrügü jagía jagíribudun Ejíptoun. ⁴⁰ Ábati jaríñagun lun Aarón. “Buséntiwa lun badügün búngiugu woun lun jóúdin wabá wabá, ladüga ibídiñeti woun ca lan susébebei lun Moisés, le aságarubaliwa Ejíptogiñe.” ⁴¹ Ábati

jadügün ában tiyáwa bágasu lun jasándunme, ába jáfarun anímaalugu lun jadágaragüdün tun jasándun, ába jadügün fédu lun jagúndaarun láu cátei le jadügübei láu jájabu. ⁴² Ábati ladíreirun Búngiu jaweí, ába lígiruniña lun jájuduragun joun warúguma ja siélubaña. Ítara líña labürüdün tídan jalíburun profétagu.

Jugúya Israelítagu, ¿áfaratün funági anímaalugu lun jadágaragüdün nun lídan bián-wein irúmu le jáubei lídan fulásu mageírawati?

⁴³ Madügün jumúti líra, lubáragiñe lira, barü jumuti jisándun Molóc tídan lágei to jadügüboun lun,

túma tiyáwa warúguma to gíriboun Renfán, to giñe janügüboun quei jisándun, iyáwaü buri ja jadáagun guánarügü lun jájuduragun joun.

Ligía naságarubadün lubei jageíragiñe, noúnajaünme yagüroun méme luei Babilónia.

⁴⁴ ‘Lídan fulásu mageírawati, ñíñoun méja lúban Búngiu to gadíñurúwadiboun jáma binádu wagübürigu, ñí lubei lerédera Búngiu jáma. Adüga lumútu Moisés lúban Búngiu tugúya queisi larúfuduni Búngiu lun lun ladügünun. ⁴⁵ Nújeingua méja múna tugúya jáma jadügawagun binádu wagübürigu, ába janügünun jámawagua lídoun fulásu le ñí lubei wagánawa guetó, dán meja le lagáñeirubalin Josué wuríbu jawágu mútu ja mámabaña juríu já meja aganoúbaña ya. Ítara líña, nújeingua lubei lúban Búngiu tugúya lídan fulásu le darí lidáni Davíd. ⁴⁶ Daríti urúei Davíd fuleísei

ligíbugiñe Búngiu, ába labúseerún yebe ladügün ában témpulu lun laganoún Lubúngiute Jacób ñi, ⁴⁷ Salomón adügübarun témpulu tugúya, ⁴⁸ láu sun, maganoún lan Búngiu le weírigutimaabei tídan buri ligílisi to jadüga gürígia, quei meja laríñaguni proféta.

⁴⁹ Siélu nálabei le ñí lubei nañúura lun narúeijan, uboú, le ñí lubei neméraaguagüdei nugúdi.

¿Cába tuwúyeri múna jadüga nun? líña laríñagun Búngiu.

¿Cátei fulásu le ñí lubei gayára lan neméraagun?

⁵⁰ ¿Ma funági nadüga sun cátei le láu nújabu?

⁵¹ Ába lasígirun Estéban aríñaga joun.

—Ánjein jugúya, derégubeiñóun janígi, magáambaditün lun lerérun Búngiu, ítara jíña quei ja ibídiñejabúbaña lun Búngiu. Súnwandan májatün lun Sífiri Sándu, ítara jíña quei binádu jagübürigu. ⁵² ¿Ca jádaangiñe profétagu mouserun jabáña binádu jagübürigu wuríba? Ni ában, áfaragua jamútiña já meja adímurejabaña luágu liábin Crístu le richáguabei, guetóti dan liábin, ába jalúguruni joun láganiñu, ába jáfaruni jilágubei. ⁵³ Jugúya le erésibirubálin lilúrudun Búngiu jámagiñe ánjeligu, mídintün láu.

Loúnwen Estéban

⁵⁴ Dan jagáambunbalin cátei le, ába jagáñidun buídu, ába lacünrinjan jári luágu Estéban, le jagáñi lun. ⁵⁵ Ánjein Estéban, buin líña láu lubáfu Sífiri Sándu, ába laríjin siélu, ába laríjini luweírigun Búngiu, lúma Jesúsu rára lueígiñe loúnwenren Búngiu. ⁵⁶ Ába laríñagun joun.

—¡Aríja jumá! Aríagu níña lun siélu darágu, lúma Jesúsu le Wügüri Garaüwarügüti, lueígiñe loúnwenren Búngiu.

⁵⁷ Ába jadáuruni jarígei láu jájabu lueí jagáambuni, ába jayábin sun jagía luágun, agúarajeina. ⁵⁸ Ába jaságaruni ubúrugugiñe, ába jígirunun geféentiña janáangun lábugiñe laríaajan ában wügüri gíriti Sáulo, ába jachámuragun dübü luágun Estéban. ⁵⁹ Súnti añája lan achámuragua dübü luágun, ába layúmuragun Estéban lun Jesúsu, ába laríñagun.

—Nabúreme Jesúsu, resíbiboún nuwáni.

⁶⁰ Lárigiñe, ába lájuduragun, ába lagúaragun.

—Nabúreme, míchigabá dúru jawágun lueígiñe figóu le.

Lárigiñe laríñaguni le, ába loúnwen.

8

Leíbaajaniña Sáulo ja afíñebaña luágu Crístu

¹ Sáulo, gúndaatiti láu láfarún Estéban.

Wéyu méme ligía, ába lagúmeserun ában oúnwenbun eíbaajoúni jawágun ja afíñebaña luágu Jesucrístu, Jerusalén. Ába janúragun lídoun buri lirájüñü fulásu Judéa lúma Samária le míbetiña gürígia ñi, apóstolugu rügüñanu manúrajan. ² Ába jayábin wügüriña ja derégeguatiña jóungua lun Búngiu, ába jábununi Estéban láu sarágu íruni luágu loúnwen. ³ Ábati lasígirun Sáulo eíbaajaña afíñetiña, ábaja lebélorun tídoun sun múna lun laságaruniña wügüriña jáma würíña adúruujeina, ába loúnajaniña furisunrugun.

Lapúrichijoún ugánu buíti luáguti asálbaruni Samária

⁴ Apúrichija jamúti ja anúrajabaña Jerusaléngiñe ugánu buíti luágu chülü lan Jesucristu lun lasálbaruniña sun gürígia, sun le ñí lumuti jóudin.

⁵ Ába lídin ában jádaangiñe, gíriti Felípe, lídoun ában ubúrugú Samária, ába lagúmeserun adímureja joun ja ñíbaña luágu Cristu. ⁶ Ábaja jóundaragun gürígia, ru jagía jarígei lun le ladímurejabei Felípe, aríja jameí buri gíñe miláguru le ladáagubei.

⁷ Ladüga sarágu buri gürígia ja gawágutiña espíritugu wuríbatiña, areídaguátiña, ába buri jáfuridun espíritugu wuríbatiña jagía agúarajeina jádaangiñe, areídagua jagía sarágu derégüdaaña jamá, meíbuguntiña. ⁸ Súnti gürígia lídan fulásu ligía, gúndaatiña luágu cátei le.

⁹ Ñíñein ában wügüri lídan fulásu ligía, gíriti Simón, gabíñarajati meja, lüñajaali ayéejaña gürígia Samariána láu laríñagun joun luágu máma lan furúmiegurügü gürígia ligía. ¹⁰ Agáambaja jamútítija sun gürígia buídu, jámagiñe ja gudémegutiña dagá jámoun ja weírigutiña, ába jaríñagun.

—Ibíja lumúti gürígia le oúnwenbun lubáfu Búngiu.

¹¹ Adügatiñatíja gásu láu, ladüga lüñajaali ayéejaña láu labíñarajan. ¹² Dan le jafíñerunbei luágu ugánu le líchugubei Felípe joun luágu larúeijan Búngiu lúma luágu Jesucristu, dándu wügüriña quei würiña, ába jabásterún. ¹³ Simón meme ligía ába gíñe lafíñerun, ába gíñe labásterún, ába lagúmeserun

afálarei Felípe, le luweírín lanígi láu buri oúnwenbun buri miláguru lúma seíni le ladáagubei Felípe.

14 Dan le jagáambunbalin apóstolugu ja Jerusalénbaña luágu resíbi jamáali lan Samariána lerérun Búngiu, ába jóunajani Pédro lúma Juan ñi. 15 Dan le jachúlürünbei, ába jayúmuragun jawágu afiñetiña ja Samariána lun liábiba Sífiri Sándu jádoun, 16 ladüga miábingili lan Sífiri Sándu lídoun ni ában jádaangiñe, badíseirügügiña lídan líri Wabúreme Jesúsu. 17 Ábati jíchuguni Pédro lúma Juan jájabu jawágu, ába liábin Sífiri Sándu jádoun.

18 Dan le laríjinbei Simón luágu ñübin lan Sífiri Sándu jádoun güri-gia dan le jíchuguni apóstolugu jájabu jawágu, ába lálugun lagáñijani ubáfu ligía jámagiñe láu seínsu. 19 Ába laríñagun joun.

—Rújumei gíñe ubáfu le nun, lun dánme lan níchuguni nújabu luágu furúmieguárügü, lun gíñe lerésibiruni Sífiri Sándu.

20 Ábati laríñagun Pédro lun.

—Beíba máfiougatin láu sun biseínsun, ladüga jarítaguatibu luágu gayára lan lagáñijóun cátei le ledéweejan Búngiu. 21 Maríchatibu, mafánran bugúya lídan wesériwidun lun Búngiu, ladüga múaraantu banígi ligíbugiñe Búngiu. 22 Ígirabeí buríban le, ayúmuraguabá lun Búngiu, lun ferúduna lánibu luágu luríban barítangun. 23 Ladüga aríja numúti luágu buin tíña lan banígi láu wuríbani, áni ragüñu liñálibu Máfia.

24 Ábati laríñagun Simón.

—Ayúmuragua jumá lun Búngiu nuágu lun masúseredun lan ni cáta nun lídaangiñe le jaríñagubei.

25 Lárigiñe jíchugun fe luágu Jesucrístu lúma jadímurejani lerérun Búngiu lídan fulásu ligía, ába japúrichijani apóstolugu ugánu buíti luáguti lasálbaruniña Jesucrístu gürígia lídaangiñe jafígoun lídan sarágu lirájüñü fulásu Samária, luágu jaweíyasun járigoún Jerusaléoun.

Felípe lúma wügüri le Etiopiana

26 Lárigiñe cátei le, ába laríñagun láni Wabúreme Búngiu ánjeli lun Felípe.

—Aráansebá, beíba luágun sur lídaangiñe üma le arárirubei Jerusaléngiñe lun ubúrugun Gáza.

Ligía üma le ásügürübei lídaangiñe fulásu mageírawati. 27 Ába laráanserun Felípe, ába lídin. Luágu leíbuguniwágu, ába ladárirun ában wügüri Etiopiana lubá lubá. Wügüri ligía siñáti garaü lan, ában wügüri weíriguti, ligía giñe gamánijaribei láu sun tiseínsun Candáce to lurúeite Etiopía. Liábiñati wügüri ligía Jerusaléngiñe lárigi lídin ájuduragua lun Búngiu. 28 Lagíribuduñáti lageíroun, ñun tídan ában cárü, alíjeinaloún lilíburun proféta Isaías. 29 Ábati laríñagun Sífiri Sándu lun Felípe.

—Yaráfabá tuágun cárü túra.

30 Ába leíbaagun tuágun cárü, ába lagáambuni lalíjaña lan tídan lilíburun Isaías, ába laríñagun lun.

—¿Gunfaráanda bumútisan le balíjabei?

31 Ába laríñagun wügüri ligía lun.

—¿Ída lubági gunfaráanda náani, úaga cába lan afúnraanguáüdei nun?

Ába laríñagun lun Felípe lun ládinun lúmoun lun lañúurun loubagiñe.

32 Niján buri dimúrei le lalíjabei.

Quei mudún, lanügüwa lun lafarún jilágubei,
ítara quei leréderun mudún maníñu jagíbugiñe ja
ásarubalín líyu,
ítara líña gíñe maríñagun lan ni cáta.

³³ Ünabuti lanügün, áni michugúnwati lirícha lun,
siñábei ladímurejoún jawágu ladügawagun,
ladüga gumúja lan labágaridun ubouágu.

³⁴ Ába laríñagun wügüri ligía lun Felípe.

—Adügabeí fuleísei nun, aríñagabeí nun,
¿cáteisán le uágubei laríñagei wügüri le abürüjabei
dimúrei le, luouágu, ódi luágu ámu?

³⁵ Ábati lagúmeserun Felípe arúfudajei Lerérun
Búngiu lun, lúmagiñe le ñígiñe lubei lagúmesera
alíja, ába líchuguni ugánu luáguti Jesúsu lun. ³⁶ Dánti
le jásügürünbei lídaangiñe ában fulásu le ñí lubei
dúna, ába laríñagun wügüri ligía.

—Nijántia dúna, ¿siñátisan nabásterun?

³⁷ Laríñaga Felípe lun.

—Ánjein affíñe bubeí luágu Jesucrístu táu sun
banígi, gayáraati babásterun.

Laríñaga wügüri ligía lun.

—Afíñetina luágu Jesucrístu lan Liraübei Búngiu.

³⁸ Ábati laráramagüdünun cárü, ába jarárirun
biángubei jagía dúnarugún, ába labásterágüdüni
Felípe. ³⁹ Dan jamúdeirun dúnarugugiñe, ába
lanügüni láni Búngiu Espíritu Felípe ñígiñe, ába
maríjin láali lan wügüri ligía. Ába lasígiruni
leíbugun, gúndaañu. ⁴⁰ Ába ladáriragun Felípe lúngua
Azóto, ába lídin lídaangiñeina fulásu apúrichijeinaléi
ugánu luáguti Crístu darí lachülürün Cesaréa.

9

Lerésibiruni Sáulo Crístu queísi lasálbaragüle

¹ Sun dan ligía, merédeti lasíadiruniña Sáulo afiñetiña luágu Jesucrístu. ² Ligía lídinbei lúmoun fádiri íñutimaati lídan jafiñen juríu amúriaja gárada láutu ubáfu lun lídin tídan buri jalígilisin juríu to Damáscoboun áluajaña ja afálarubalin lémeri Crístu lun lanügüniña adáüragua Jerusalén, dándu wügüriña quei würiña. ³ Luágu leíbuguniwágu, dan yaráfaali lun Damáscó, sódini ába ladúnraagun ában larúgounga siélugiñe, geyégua láu. ⁴ Ábati láburujan Sáulo múarugún, ába lagáambun lariñagun ában umálali lun.

—Sáulo, Sáulo, ¿ca uágu beíbaajana?

⁵ Ábati lariñagun Sáulo.

—¿Cátabusan Nabúreme?

Ába lariñagun umálali ligía.

—Jesúsu áu, le méme beíbaajabei. ⁶ Sarába, belúba ubúrugun, lariñawagúba bun ñi cába lan badüga.

⁷ Wügüriña ja úarabaña lúma Sáulo lídan luweíyasun, ába jaráramun láu luweírin janígi ladüga agáamba jamúti umálali, áni maríjin jamúti le adímurejabei. ⁸ Ába lásaarun Sáulo múarugugíñe, dan le léfegechúnbalin lágu, maríjinjali. Ábati járügüdüni lújabu, ába janügüni ubúrugun Damáscó. ⁹ Ába leréderun ürüwa wéyu ñi maríjinga, meígin líña, mátun ni cáta.

¹⁰ Ñiñein ában afiñeti luágu Jesucrístu ñi Damáscó gíriti Ananías, le únbei layáwadagua Wabúreme Jesúsu, ába lariñagun lun.

—¡Ananías!

Ába loúnabun.

—Anája ya, Nabúreme.

¹¹ Ábati lariñagun Jesúsu lun.

—Beíba guetó guetó luágu ũma le gírabei Surúti, danme le bachúlürün lúbiñe Júdas, bálügüdajame luágu ában wügüri Társona gíríti Sáulo. Badárirubei ñi ayúmuragua lun Búngiu, ¹² áni ayáwadaguaali ában wügüri gíríti Ananías lun, ába líchuguni lújabu luágu lun gayára lan larijin.

¹³ Dan lagáambunbalin Ananías cátei le, ába lariñagun.

—Nabúreme, gíbeeñátia abájüdagutiña nun luágu wügüri ligía lúma luágu sun wuríbani le ladáagubei joun ja afiñebaña buágu, Jerusalén. ¹⁴ Guetó, liábiña ñájoun láu ubáfu jámágiñe jábutigu fádirigu lun ladáüraguniña sun ja bánigubaña.

¹⁵ Ába lariñagun Jesúsu lun.

—Beíba, ladüga anúadira náali wügüri ligía lun ladímurejan nuágu joun gürígia ja mámabaña juríu lúma joun jarúeitegu, lúma gíñe joun Israelítagu. ¹⁶ Narúfudubei sarágu cátei le lúnbei lasúfuriruni nueígiñe lun.

¹⁷ Ábati lídin Ananías lídoun fulásu le ñi lubei Sáulo. Ába lebélorun múnadoun, ába líchuguni lújabu luágu, ába lariñagun lun.

—Nidúje Sáulo, loúnajañadina Wabúreme Jesúsu le arúfudagubei lúngua bun luágu ũma le ñígiñe lubei biábin, lun gayáraaya lan barijin, lun gíñe berésibiruni Sífiri Sándu.

¹⁸ Lídan óra ligía, ába leíguadun camá jamuga arúraü lueígiñe lágu, ábaya larijin. Lídan óra ligía, ába labásterún. ¹⁹ Lárigiñe, ába leígin, ábaya

lejéredun, ába leréderun átiri wéyu jáma afiñetiña ja aganoúbaña Damáscó.

Lapúrichijan Sáulo Damáscó

²⁰ Ába lagúmeserun Sáulo apúrichija tídan buri jalígilisin juríu, laríñaga luágu Jesúsu lan Liraübei Búngiu. ²¹ Súnti ja agáambubalín, ába laweíridun janígi, jaríñagati.

—¿Másan niján wügüri léñaja eíbaajabáliña ja afálarubalin Jesúsu Jerusalén? ¿Ma ligía méme le ñübinbei ya lun lanáanguniña adáüra, lun ledéregeruniña joun jábutigu fádirigu juríu?

²² Ábatimá lapúrichijan Sáulo láu anígi, arúfudei luágu Jesúsu lan Crístubei le lúnbei lasálbaruniña gürígia lídaangiñe jafígoun, darí lun labúlieidaguágüdün jáu juríu buri ja aganoúbaña Damáscó.

Leséfurun Sáulo jaweí juríu

²³ Lárigiñe sarágu wéyu, ába jelédegun juríu lun jáfaruni Sáulo jilágubei, ²⁴ ába lasúbudirawagüdün le jabúseerubei jadügün lun Sáulo. Wéyuagu, áriebu, jagúrabajanja juríu luágu béna le áfuridagülei le láni ubúrugú Damáscó lun jáfaruni jilágubei. ²⁵ Ába jíchuguni afiñetiña lídoun ában faníñe weíríti, ába jarárigüdüni áriebu lueígiñe baríeru le geyégubei láu ubúrugú, ába leséfurun.

Sáulo ubúrugú Jerusalén

²⁶ Dan le lachülürünbei Sáulo Jerusalén, ába yebe lálugun ládaragun lúngua jádoun afiñetiña, sun jagía, janúfudetiña lueí, ladüga mafíñetiñá yebe luágu afiñejali lan luágu Jesucrístu. ²⁷ Ába lanügüni Bernabé jagíbugiñoun apóstolugu. Ába labájüdagun

joun luágu laríjini Sáulo Jesúsu luágu leíbuguniwágu, lúma luágu ladímurejan Jesúsu lun, lúma luágu lapúrichijan Sáulo furáangu luágu Jesúsu ubúrugu Damásco. ²⁸ Ábati jerésibiruni Sáulo queísi jánigu, ába leíbugun jáma Jerusalén, ²⁹ apúrichijeina luágu Wabúreme Jesúsu furáangu. Lárigiñe ladímurejan luágu Jesúsu jáma juríu ja adímurejabaña güriégu, asígeneja ligía jáma, ába jabúseerun jáfaruni jilágubei. ³⁰ Dan le jasúbudirúnbalin afíñetiña cátei le, ába janügüni Sáulo ubúrugin Cesaréa, nígiñe ába jóunajani Társoun.

³¹ Lídoun buri dan ligía, buíti jóuserúniwa afíñetiña luágu Jesucrístu ja aganoubaña Judéa, Galiléa, lúma Samária. Ába jedérebugudún lídan jafíñen luágu Jesucrístu, falájamei le lubeíbei, resíbi jagía gurásu lúmagiñe Sífiri Sándu. Ába agánwoundeina jamá afíñerutiña.

Lareídagun Enéas

³² Dan le lebélujaña lubeí Pédro lídan buri fulásu lun líderaguniña ja afíñeñaabaña luágu Jesucrístu, ába giñe lídin aríjaña lánigu Búngiu ja ubúrugubaña Lída. ³³ Ñi ladárira ában wügüri gíriti Enéas, wídü irúmu láu gabánarugu láu derégüdaü. ³⁴ Ába laríñagun Pédro lun.

—Enéas, areídaguagüda lumútibu Jesucrístu. Sarába, aráanseboún bigábana.

Ába lásaarun Enéas óra ligía. ³⁵ Ába jaríjini sun ja aganoubaña fulásu buri Lída lúma Sarón, ába jígiruni binádu jafíñen, ába jafíñerun luágu Jesúsu.

Tágyugun Dórcas

³⁶ Lídan meja dan ligía, ñíñoun meja ában afíñetu aganoútu Jópe, gíritu Tabíta, lídan jerérun gúriégu, gíritu Dórcas. Wúri tugúya, súnwandan táu adúga buíti, íderagua tugúya gudémetiña. ³⁷ Lídoun dan ligía, ába tasánderun Dórcas, ába touñwen, lárigiñe jágawagüdünun, ába jaríwachaguagüdünun. ³⁸ Yaráfati Jópe lun Lída le ñí lubei Pédro, queíti jagáambuni afíñetiña luágu níjein lan ñi, ába jóúnajan bián wügúriña aríñaga lun.

—Queímoun Jópe, oufuda.

³⁹ Ábati lídin Pédro jáma. Dan le lachülürünbei, ába janügüni tídoun rúmu to ñí tubei jiláaru, ába jagúriridágun sun würiña ja jiláguaañábaña úmari láu, ayájuaaja tárigi, arúfudajoún buri dínugu túma simísi tó buri tájüchaguboún Dórcas dán meja moúnwengiru, lun. ⁴⁰ Ába láfuridagüdüniña Pédro sun ja ñíbaña, ába lájuduragun, ába layúmuragun lun Búngiu. Ábati laríjin tuágun jiláaru, ába laríñagun tun.

—Tabíta, sarába.

Ábati téfegechuni tágu, dan taríjini Pédro, ába tiñúragun túngua. ⁴¹ Ába lárügüdüní tújabu, ába lásaaragüdünun. Lárigiñe, ába lagúarun joun würiña jagía jáma jíbiri afíñetiña ja ñíbaña, ába larúfudunun joun, wínwañu. ⁴² Ába lagaambún cátei le lídan sun ubúругu Jópe, ába sarágu jamá afíñerutiña luágu Jesucrístu. ⁴³ Ába leréderun Pédro sarágu dan lídan ubúругu ligía, lúbiñe Simón le aráansejabei úraü.

10

Loúnajan Cornélio ougei Pédro

1 Ñĩnein ában wügüri ubúругu Cesaréa gíriti Cornélio, gumándan joun súdaara ja Italiána.

2 Wügüri ligía jáu sun lufámilian, derégeguatiña jóungua lun Búngiu, judúguatiña lun Búngiu láu sun máma jamá juríu. Rúti buri gíñe sarágu seínsu lun jíderawagún juríu, áni súnwandan layúmuragun lun Búngiu. 3 Luágu ában wéyu, queí buri ladaünrún úrúwa rábounwéyu, ába lasáliragun ában láni Búngiu ánjeli lun, furáangu, ába laríñagun lun.

—¡Cornélio!

4 Ába leréderun Cornélio aríaguei ánjeli ligía láu sarágu anúfudei, ába laríñagun.

—¿Ca babúseerubei, Nabúreme?

Ába laríñagun ánjeli ligía lun.

—Agáamba láali Búngiu bayúmuragun, aríjaleí buri cátei le badügübei lun bíderaguniña gudémetiña. 5 Oúnajabá lubeíti wügüriña ubúругu Jópe lun jóuguni Simón, le gíñe gíríbei Pédro, lun liábin bun. 6 Lúbiñe Simón le aráansejabei úraü, le gábanbei láru barána.

7 Dan le ñüdünjali ánjeli le adímurejabei lúma Cornélio, ába lagúarun joun biáma jádaangiñe lumúsuniña lúma ában lisúdaaran, súdaara ligía, ában wügüri derégeguati lúngua lun Búngiu, leménigira Cornélio. 8 Ába labájüdaguni sun cátei joun, ába louñajaniña ubúругu Jópe.

9 Larúgan amídirugu, sun ayárafadeina jamá wügüriña ja lun Jópe, ába lamúdeirun Pédro luágun tábulugu múna le fadábei, ayúmuragua lun Búngiu.

10 Weíríjaliti liláma óra ligía, busénjali leígin. Dan le añája lan aráanserei leígin, ába lasáliragun ában cátei lun ítara. 11 aríja lumúti lánjunrenchun siélu,

ába tiábin ában cáatoun camá jamuga gamísa weírítu gürágu lueígiñe gádürü tarígei, tiábin arárireina múarugun. ¹² Tídan gamísa tugúya, ñíñanu sun jawúyeri anímaalu, gádürügua tugúdi, jéwe, jáma dunúru. ¹³ Ábati lagáambun laríñagun ában umálali lun.

—Sarába Pédro, áfarabá jádaangiñe anímaalu ja lun beigin.

¹⁴ Ába loúnabun Pédro.

—Uá, Nabúreme, meígiñajágidina ni cáta le wanügübei quei mabuídunti según lilúrudun Moisés.

¹⁵ Ábayati ladímurejan umálali ligía lun, ába laríñagun lun.

—Le cátei le labuíduragüdün Búngiu, maríñagabá luágu luágu mabuídun lan.

¹⁶ Ürüwañein weíyaasu lasúseredun cátei le, lárigiñe, ábaya tamúdeirun gamísa tugúya siélun.

¹⁷ Súnti niján lan Pédro láu luweírín arítaguni luágu, asáminara ca lan laníchigubei cátei le laríjubei, ligía jachülürün luwügüriñan Cornélio, álügüdajeína tuágu lúban Simón. ¹⁸ Dan jachülürün tubéneri múna, ába jálügdajan rein ánjein ñí lubei lagánawa ában gírítí Simón le gíñe únbei jaríñaga Pédro.

¹⁹ Queíti buga nijágu lan Pédro asáminara luágu cátei le asáliragubei lun, ába laríñagun Sífiri Sándu lun.

—Añája ürüwa wügüriña álugabu, ²⁰ raríba, oúfudabá, beíba jáma láu afíñeni ladüga áu lan oúnajabalíña.

²¹ Ábati larárirun Pédro le ñíjin jabeí wügüriña ja loúnajabaña Cornélio, ába laríñagun joun.

—Áu le jáluajabei. ¿Ca gabügürübalün?

²² Ába jariñagun.

—Loúnajan gumándan le gíribei Cornélio wagía, ában wügüri surúti, derégeguati lúngua lun Búngiu, jínsiñeti joun sun juríu. Nñübinti ában ánjeli aríñaga lun lun loúnajan ougabu lun bídin lúbiñe, lun lagáambuni le lúnbei baríñaguni lun.

²³ Ábati lebélaagüdüniña Pédro, ába jeréderun lúma ñi áriebu ligía. Larúgan, ába lídin Pédro jáma, ñüdüntiña giñe jádaangiñe afiñetiña ja aganoubaña Jópe jáma.

²⁴ Larúgan, ligía jachülürün Cesaréa, le ñi lubei Cornélio agúrabajaña jáu lidújeñu jáma jabuídun-ágei lumádagu ja lamísurajabaña. ²⁵ Dan lachülürün Pédro, ába láfuridun Cornélio erésibirei, ába lájuduragun ligíbugiñe láu sarágu inébesi. ²⁶ Ába liñúraguni Pédro, ába lariñagun lun.

—Ráramabá, wügüri giñe áu bíledi.

²⁷ Súnti niján lan adímureja lúma, ába lebélorun, ába ladárirun sarágu gürígia adámuriñu ñi. ²⁸ Ábati lariñagun Pédro joun.

—Subúsi jumúti luágu mája lan wafíñen wagía juríu lun jóundaragun juríu jáma ja mámabaña juríu quei jugúya, ni lun webélurun tídoun jában luei wasálirun mabuídunga ligíbugiñe Búngiu. Wel, arúfuda láali Búngiu nun luágu mabúseerun lan lun nouseruniña ja mámabaña juríu queisi gürígia mabuíduntiña. ²⁹ Ligía nánjanrunbei niábin dan le bouñajanbei nuágu. Buséntina jamúgati nasúbudiruni ca lan lébubei jóúnajan nuágu.

³⁰ Ábati loúnabun Cornélio.

—Ūrūwa wéyu guetó, queíburi óra le, ñáñadina núbiñe ayúmragua lun Búngiu ladaürün ūrūwa rábounwéyu, queísi wéchun, ligía lasálrágun ában wügüri nun táu ában dáüguaü mirítu.

³¹ Ába laríñagun nun. “Cornélio, agáamba láali Búngiu bayúmragun, jarítaguaaliti luágu buri cátei le badügübei lun bíderaguniña gudémetiña.

³² Oúnajabá lubeíti wügüriña ubúruгу Jópe ougei Simón le gíñe gíríbei Pédro, lúbiñe ábanya Simón aráansejati úraü, le gábanbei láru barána, ñi lagánawa.” ³³ Ába lubeíti nouñajan ougabu furése, áni buítiti badüga biábin. Guetóti awánja sun wagía ya ligíbugiñe Búngiu, buséntiwati wagáambuni le laríñagubei Wabúreme Búngiu bun lun baríñaguni woun.

Lapúrichijan Pédro lúbiñe Cornélio

³⁴ Ábati lagúmeserun Pédro adímureja, ába laríñagun.

—Subúdi náali guetó luágu ában lan lábu lanügüniña Búngiu sun gürígia. ³⁵ Resíbirügü lumútiña sun ja inébejabúbaña lun áni adüga jameí le buídubei, dándu juríu quei ja mámabaña juríu. ³⁶ Adímurejati Búngiu joun ladügawagun Israél, adímurejeina ugánu luáguti gayára lan jaráandarun gürígia luma Búngiu lídaangiñe Jesucrístu, le Jabúremebei sun gürígia. ³⁷ Jugúya, subúdi jumúti cátei le asúseredubei jageíra juríu buídu, le agúmeserubei Galiléa lárigiñe lapúrichijan Juan, áni abásteragüdaja ligía. ³⁸ Subúdi jumúti luágu rúlaani Búngiu lubáfu Sífiri Sándu lun Jesúsú Nazarétna, luágu meja gíñe ladágun buíti, luma lareídaguagüdüniña ja asúfurirubaña lábugiñe lubáfu

Máfia. Ladügünbalin buri meja cátei le, ladüga ñíñein lan Búngiu lúma. ³⁹ Wagía geféentiwa luágu sun cátei le ladügübei Jesúsu Jerusalén lúma lídan sun líbiri jageíra juríu. Lárigiñe, ába jáfaruni jilágubei láu jádaraguní luágu ában gurúwa. ⁴⁰ Sarágüda lumúti Búngiu lídaangiñe oúweni luágu lürüwan wéyu, ába larúfudaguágüdüni lúngua wínwañu woun. ⁴¹ Marúfudagúnti lúngua joun sun gürígia, lueídügüya woun, wagía le anúadaja láañabaña Búngiu lúmangiñe binárü quei geféentiña luágu lásaarun lídaangiñe oúweni. Jóutiwa lúma, gurá wagía lúma lárigiñe lásaarun lídaangiñe oúweni lúnya labágaridun. ⁴² Ába loúnajaniwa apúrichija joun gürígia luágu, lun giñe waríñaguni luágu rúlaali lan Búngiu Jesúsu méme le lun lagúseragüdüniña ja wínwangiñabaña jáma ja jiláguaañabaña dánme le lagíribudun ubouágun. ⁴³ Adímurejaaña meja giñe sun profétagu luágu Jesúsu lúmangiñe binárü, luágu sun lan ja afíñebaña luágu, resíbi jamáni ferúdun luágu jafígoun.

Jerésibiruni ja mámabaña juríu Sífiri Sándu

⁴⁴ Ñígili Pédro adímureja, ligía liábin Sífiri Sándu jádoun ja agáambajabalin ladímurejan. ⁴⁵ Játi juríu ja afíñetiña luágu Jesucrístu ja ñübinbaña úara lúma Pédro, ába laweíridun janígi láu liábin Sífiri Sándu jádoun ja mámabaña juríu. ⁴⁶ Agáamba jamútiña adímureja dimúrei le mámabei jerérun, adímureja jagía luágu luweírigun Búngiu. ⁴⁷ Ábati laríñagun Pédro.

—¿Majoúabei funági lun jabásterún gürígia ja, quei resíbi jamáli lubeí Sífiri Sándu queígubeirügü wagía?

48 Ába líchugun dimúrei lun jabásterun lídan líri Jesucrístu. Lárigiñe, ába jayúmuragun lun Pédro lun leréderun átiri wéyu jáma.

11

Labájüdagun Pédro joun tílana ligílisi to Jerusalénboun luágu le asúseredubei Jópe

¹ Ába jagáambuni apóstolugu jáma jíbiri afíñetiña ja Judéabaña luágu ánjaaña lan giñe ja mámabaña juríu lun láni Búngiu ugánu luáguti Wasálbaragüle, Jesucrístu. ² Dánti le lagíribudun Pédro Jerusaléoun, ába jachúrajani juríu ja afíñetiña, ³ jaríñaga.

—¿Cámesan bídin aríjaña ja mámabaña juríu, áni jou amürü jáma?

⁴ Ábati labájüdaguni Pédro sun le asúseredubei joun lúmagiñe lagúmeseja, ába laríñagun.

⁵ —Ubúruguañadina Jópe, ayúmuragua lun Búngiu, ligía naríjin ában cátei lasáliragun nun camá jamuga ában gamísa weírítu tarárirun siélugiñe, gürágu lueígiñe gádürü tarígei, tiábin chülü le ñí nubei.

⁶ Dan le naríjin tuágun buídu lun naríjin ca lan tídaanbei, ába naríjin anímaalugu gádürügua tugúdi ñi, anímaalugu gáñitiña, jéwe, jáma dunúru. ⁷ Ába nagáambun laríñagun ában umálali nun. “Sarába Pédro, áfarabá jádaangiñe, joubei.”

⁸ Ába naríñagun. “Uá, Nabúreme, ladúga meígiñajágidina ni cáta le wanügübei quei mabuídunti según lilúrudun Moisés.” ⁹ Ábayati ladímurejan umálali siélugiñeti ligía nun, laríñaga nun. “Le cátei le labuíduragüdün Búngiu, mariñagabá luágu luágu mabuídun lan.”

¹⁰ Ürüwañein weíyaasu lasúseredun cátei le, lárigiñe,

ábaya tamúdeirun siélun. ¹¹ Lídán óra ligía, ligía jachülürün ürüwa wügüriña tídoun múna to ñí nubei, oúnajóutiña Cesaréagiñe álugana. ¹² Ába laríñagun Sífiri Sándu nun lun nídin jáma láu afiñeni. Ñüdüntiñá giñe sísi afiñetiña ja núma. Dan wachülürün Cesaréa, ába webélurun sun wagía lúbiñoun ában wügüri, ¹³ le abájüdagubei woun luágu nege laríjin ában ánjeli rára lúbiñe, ába lán nege laríñagun ánjeli ligía lun. “Oúnajabá wügüriña lun jóudin ubúrugu Jópe oúgei Simón le gíñe giríbei Pédro, ¹⁴ laríñagubei bun ída lúba lan gayára lan basálbarun jáu sun bufámilian.” ¹⁵ Dan nagúmeserúnbei adímureja joun, ába liábin Sífiri Sándu jádoun queí meja liábin wádoun furúmiñe. ¹⁶ Ábati naríttagun luágu lé meja laríñagunbei Wabúreme. “Inárüni luágu badíseigüda lan Juan láu dúna, ánjein Búngiu, labásteragüdübadün láu Sífiri Sándu.” ¹⁷ Ánjeinti ru lubálin Búngiu líbe le líchubei woun, wagía le afiñeelíbei luágu Jesucrístu, joun, ¿cátanañadináti lun neréderubei lan le labúseerubei Búngiu ladüga?

¹⁸ Dánti le jagáambuni afiñetiña ja Jerusalénbaña cátei le, ába jámanichun. Ába jadímurejan luágu luweírigun Búngiu, ába jaríñagun.

—¡Rújali lubeí giñéti Búngiu ubáfu joun ja mámabaña juríu lun jasáansiruni jagáburi, lun gayára lan jabíjin ibágari magúmuchaditi!

Ligílisi to Antioquána

¹⁹ Dan le láfarúnbei Estéban, ába giñe jagúmeserun eíbaajaña ja jíbiri afiñetiña, ába janúrajan jíbiri chülü Fenícia, Chípre, luma Antioquía. Ñi jíchigei ugánu

luáguti lasálbaruniña Jesucrístu gürígia lídaangiñe jafígoun jóunrügü juríu, máma joun ámu gürígia. ²⁰ Ánjeinti afíñetiña ja Chíprena jáma Cirénena, ába jachúlürün Antioquía, ába gíñe jadímurejan joun ja mámabaña juríu, ába jíchuguni ugánu luáguti Wabúreme Jesucrístu joun lun jasálbarun. ²¹ Níñein lubáfu Búngiu jáma afíñetiña jagía, sarágu ja mámabaña juríu, ába jígiruni binádu jafiñen, ába jafiñerun luágu Jesucrístu.

²² Dan lachúlürünbei ugánu le lábun jagáambun afíñetiña ja Jerusalénbaña, ába jóunajani Bernabé Antioquíoun. ²³ Dan lachúlürünbei Bernabé, ába laríjini luágu binílaaña lan Búngiu gürígia ja mámabaña juríu, ába lagúndaarun sarágu. Ába labímejaniña súngubei lun jafálaruni Wabúreme Búngiu táu sun janígi. ²⁴ Bernabé, ában meja wügüri buíti, derégeguati lúngua lun Sífiri Sándu le gumúti, buin líña gíñe láu afíñeni luágu Jesucrístu, ítara líña lagáñeirun sarágu gürígia lun Jesucrístu.

²⁵ Lárigiñe, ába lídin Bernabé Társo áluajei Sáulo, dan ladáriruni, ába lanügüni Antioquíoun. ²⁶ Ába jeréderun ñi jáma tílana ligílisi ában irúmu, arúfudaja joun sarágu gürígia. Ní Antioquía lagúarúa joun afíñetiña “Cristiánugu” furúmiñe.

²⁷ Lídan dan ligía, ába jóúdingua já buri profétagu Jerusaléngiñe lun Antioquíoun. ²⁸ Ában jádaangiñe, gíríti Ágabo, ába laráramun jádan afíñetiña, ába laríñagun láu le lasúbudirágüdübei Sífiri Sándu lun luágu liábiba lan ában oúnwenbun ilámaü lídan sun ubou, áni suséreti lídan lidáni larúeijan Cláudio. ²⁹ Ábati jóúndaragun afíñetiña ja Antioquiana lun

jounajan seínsu joun afíñetiña ja Judéabaña según le jayáraati íchiga. ³⁰ Ítara líña jadügüni, ába jounajani seínsu ligía lúma Sáulo joun tábutigu jalígilisin afíñetiña Judéana.

12

Loúnwen Jacóbo lúma ladaürün Pédro

¹ Lídán dan ligía, ába lagúmeserun urúei Heródes eíbaajaña jádaangiñe afíñetiña. ² Ába láfaragüdüni Jacóbo le lamúlen Juan táu efeín, ³ queíti laríjin láu gúnda jamá juríu láu cátei le, ába gíñe lanügüni Pédro adáúra. Lídán buri wéyu le fédu le ídaanbei teigúa fein magánatu ísi lasúsereda cátei le. ⁴ Lárigiñe lanügüni Heródes Pédro adaúra, ába ládaruni furísunrugun jáu díisi-sísi súdaaragu oúnigira gádürü gádürü, larítangun lún yebe laságaruni jagíbugiñe lílana fulásu lárigiñe fédu lun lagúserun. ⁵ Níñein lubeíti Pédro furísunrugu toúnigiwañu buídu, merédeti jayúmuragun tílana ligílisi lun Búngiu luágu.

Leséfuruni Búngiu Pédro furísunrugúgiñe

⁶ Áriebe le lubáragiñe wéyu lé yebe lúnbei laságaruni Heródes Pédro jagíbugiñoun gürígia, larúmuguña Pédro jamídaangua bián súdaara, gürágu ligía láu bián güríngüri, jámaya bián súdaara luágu béna oúnigira. ⁷ Sódini, ligía lasálaragun ában láni Wabúreme ánjeli, ába larúgoundún furísunrugu. Ába lagúuruni ánjeli ligía louúbawagu, ába lagáguduni, ába laríñagun lun.

—Sarába furése.

Ábati láburujan güríngüri lueígiñe lújabu Pédro,
⁸ ába laríñagun ánjeli ligía lun.

—Murúbei bubélitin, daúbounme bigeídin.

Lárigiñe ladügüni Pédro sun líra, ába laríñagun
 ánjeli ligía lun.

—Daúboun babíte, falábana.

⁹ Ába láfuridun Pédro lárigi ánjeli ligía, ibídiñoun
 lun ánjein inárüni lubeí lúmoun máma lan inárüni
 cátei le ladügübei ánjeli ligía. Genégetimáati
 lun camá gewenediñein. ¹⁰ Ába jásügürün jáu
 furúmiñetiña oúnigirutiña, sügü jamaña jabíaman,
 dánti le jachülürün luágun béna le gürábu le
 ümadagiñebei, ába lánjunrenchun lúngua. Ába
 jáfuridun, lárigiñe jánjiñuragún ában üma, ába
 lígiruni ánjeli ligía Pédro lábugua. ¹¹ Ligíaali
 lárügüdagun Pédro lúngua, ába laríñagun.

—Aná guetó, subúdi náali luágu oúnaja láali lan
 Búngiu ánjeli lun leséfurunina lueí Heródes lúma lueí
 sun lé yebe jabúseerubei juríu jadügün náu.

¹² Asáminareína ligía Pédro luágu cátei le, ába lídin
 túbiñoun María to lúguchu Juan Márkos, le ñí jabei
 sarágu gürígia adámuriñu ayúmuragua lun Búngiu
 luágu. ¹³ Dan lacaüjan luágu lubéneri bürürü,
 ába táfuridun ában irájü músu, gíritu Róde, aríja ca
 lan agúajabei. ¹⁴ Dan tasúbudiruni luágu Pédro lan
 luágu lumálali, bulíei tumúti tánjunrenchuni béna,
 le luweírin tugúndan, ábarüga teíbaagun múnadoun
 awísaja luágu niján lan Pédro bénabu. ¹⁵ Ábati
 jaríñagun tun.

—¡Lülüjaali báu!

Ába tariñagun joun luágu choúru tan luágu ligía
 lan. Ába jaríñagun.

—Máma ligía, fágua láfurugu.

¹⁶ Niján mémeti Pédro acaünja luágu béna. Dan jánjunrenchuni, ába laweíridun janígi dan le jaríjini.

¹⁷ Ába líchugun seíni joun láu lújabu lun jámanichun, ába labájüdaguni joun ída líña lan laságaruni Búngiu furísunrugúgiñe, lárigiñe, ába laríñaga joun.

—Abájüdagua jumeí cátei le lun Jacóbo lúma joun jíbiri afíñetiña.

Ábati láfuridun, ába lídin lídoun ámu fulásu.

¹⁸ Dan larúgadunbei, niján luwúyerigu samínaü jádan súdaara, ladüga ibídiñeti joun ca lan susérebei lun Pédro. ¹⁹ Ába loúnajan Heródes áluajei, quei madári jamáni, ába lálügüdaguniña súdaara já buga oúnigirubalin, lárigiñe, ába láfaraguágüdüniña jilágubei. Lárigiñe, ába láfuridun Heródes Judéagiñe, ába lídin agánawa Cesaréa.

Loúnwen Heródes

²⁰ Weíríti ligáñi Heródes jáma gürígia ja aganoúbaña Tíro lúma Sidón, ánjein jagía, ába jebélurun lídoun ában arítaguni lun jóúnajan wügüriña lun jadímurejan lúma luágu jafúleisein. Dan le jachúlürün, ába jagáñeiruni Blásto, ában wügüri íñuguti láni Heródes, lun líderaguniña adíljei sun cátei, ladüga lageíragiñe Heródes jabíja eígini.

²¹ Ába lagúaragüdüñ Heródes jawágu luágu ában wéyu, wéyu ligía, ába ladáürunun lanáangun to lanáangun urúei, ába lañúurun luágu lála le ñígiñe lubeí lagúmadija, ába ladímurejan joun. ²² Ábati jagúmeserun gürígia agúaraja.

—¡Máma wügüri adímurejabei, búngiu adímurejabei!

²³ Lídán óra ligía, ába lasándiragüdüni láni Búngiu ánjeli Heródes, ladüga lanáangun lúngua luágu jerérun güriúa, míchu lumúti linébase Búngiu lun, ába jeígini jéweraü, ába loúnwen.

²⁴ Abúruchagueínatimá ligíati ugánu le láni Búngiu, apúrichioúati lídan sun fulásu.

²⁵ Dan jagúmuchuni Bernabé lúma Sáulo jawádigimari, ába jagíribudun Jerusaléngiñe barúina jamei Juan Márcos jámagua.

13

Jagúmeseruni Bernabé lúma Sáulo jawádigimari apúrichijeí Lerérun Búngiu

¹ Tídan ligílisi to Antioquíabout, ñíñanu profétagu jáma maésturugu. Wügüriña jagía. Bernabé, Simón, le únbei jaríñaga Wuríti, Lúcio le Cirénena, Manaén le agüriarúbei úara lúma Heródes le gumádimati Galiléa, lúma Sáulo. ² Luágu ában wéyu dan le jájuduragun lun Búngiu, ayúnara jagía, ába laríñagun Sífiri Sándu joun.

—Dírei jumei Bernabé lúma Sáulo nun lun wadágimanu le únbei nanúadiraña.

³ Lárigiñeti jayúmuragun lúma jayúnarun, ába jíchuguni jájabu jawágu Bernabé lúma Sáulo, ába jóunajaniña luágu jawádigimari.

Japúrichijan Bernabé lúma Sáulo lídan fulásu le Chípre

⁴ Ítara líña loúnajaniña Sífiri Sándu Bernabé lúma Sáulo, ába jóúdin Seléucia, ñígiñe, jádina lun jóúdin luágun ubouju le Chípre. ⁵ Dan jachülürün lídan ubúrugu le gíribei Salamína, líbiri méme Chípre, ába jagúmeserun apúrichijeí lerérun Búngiu tídan

jalígilisin juríu. Ñüdünti gíñe Juan Márcos jáma, íderaguaaña. ⁶ Eíbuga jamúti sun ubouju ligía chülü lúmoun fulásu le gíribei Páfos. Ñi jadárira ában juríu gíríti Barjesús, garíyajati wügüri ligía, ye ligía, laríñaga luágu proféta lan. ⁷ Garíyajati ligía lúmañein gumádimati le Sérjio Páulo, ában wügüri janíchiguti. Ába loúnajan gumádimati ligía luágu Bernabé lúma Sáulo ladüga busén lan lagáambuni lerérun Búngiu. ⁸ Ánjein garíyajati ligía, le méme gíribei Elímas, sigéne lumútiña lueí yebe lafíñerun gumádimati luágu le jaríñagubei lun luágu Jesucrístu. ⁹ Sáuloti, le méme gíribei Páblo, buin líña láu lubáfu Sífiri Sándu, ába laríaguni Elímas, ¹⁰ ába laríñagun lun.

—¡Yéetibu, buin bíña láu wuríbani, liraü Máfia amürü, lágani sun le buídubei! ¿Ca uágu meréde lubeí beyéjan luágu lémeri Búngiu le surúbei? ¹¹ Guetó láburuja ligáñi Búngiu buágun, berédera maríjinga luágu átiri dan.

Lídan óra ligía, ába labúrigadún láu, ába láluajan cába lan árüjei lújabu, ladüga maríjinjali lan. ¹² Dan laríjini gumádimati cátei le, ába lafíñerun luágu Jesucrístu, weíríti lanígi láu le jarúfudajabei luágu Wabúreme Jesucrístu.

Páblo lúma Bernabé ubúругu Antioquía

¹³ Ába láfayarun Páblo jáma líbirigu Páfosgiñe lun ubúrugun Péрге, le lídaanbei fulásu gíríti Panfília. Ánjein Juan Márcos, ába lígiruniña, ába lagíribudun Jerusaléoun. ¹⁴ Lárigiñe, ába jásügürün Péргеgiñe lun ubúrugun Antioquía, le lídaanbei Pisídia. Ába jebélurun lídan wéyu le eméraaguagülei tídoun

jalígílisin juríu, ába jañúurun ñi. ¹⁵ Lárigiñeti taliijoúniwa líburu to lánina lilúrudun Moisés túma buri líburu to jabürüjaboun profétagu, ába jóúnajan ábutigu aríñaga joun.

—Wadújeñu, ánjein níjein lubeí dimúrei lun jaríñaguni joun gürígia ja, aríñaga jumeí guetó.

¹⁶ Ábati lásaarun Páblo, ába ladügün seíni joun láu lújabu lun jámanichun, ába laríñagun.

—Agáamba jumá, wügüríña Israelítagu júma jugúya le ájuduragubei lun Wabúngiute. ¹⁷ Búngiu le Jabúngiute Israelítagu, anúadaja lumútiña meja binádu wagübürigu lun lánigubaña lan, ába ladügüniña ábanme oúnwenbun násiñun dán meja le añájagua lan agánawa quei teréncha Ejípto, lárigiñe, ába laságaruniña lídaangiñe fulásu ligía láu lubáfu. ¹⁸ Awánda lumúti Búngiu luríban jagáburi lídan fulásu mageírawati quei buri biánwein irúmu. ¹⁹ Lárigiñe, ába lagúmochaguagüdüni sédü násiñun ja aganouítiña Canaán lun líchuguni jafúlasun joun binádu wagübürigu luára gádürüsan-dimí irúmu. ²⁰ Lárigiñe, ába líchugun gürígia lun jagúseragüdüniña darí lúmoun lidáani proféta Samuél. ²¹ Ábati jamúriajan ában urúei lun ligíaba lan agúmadiraña, ába líchuguni Búngiu Saúl joun jarúeiteme luágu biánwein irúmu, Saúl ligía, liraü Cis, ladügawagun Benjamín. ²² Lárigiñe, ába lagídaruni Búngiu arúeijani lueí Saúl, ába líchuguni lun Davíd, le uágubei laríñaga. “Darína Davíd, liraü Isaí, ában wügüri le áubei nagúndaara, áni ladügübei sun le nabúseerubei.” ²³ Jádaangiñe ladügawagun Davíd ligía liábin Jesúsu le loúnajabei Búngiu lun jasálbarun Israelítagu, quei meja laríñaguni.

²⁴ Lubáragiñebei liábin Jesúsu ubouágun, apúrichijati Juan joun sun Israelítagu, laríñaga joun luágu lúnti lan jasáansiruni jagáburi, badísei jagíame. ²⁵ Dan le layárafadúnbei dan lun loúnwen Juan, ába laríñagun. “Mámatia áu le uágubei jarítagua luágu áu lan, liábiba ában nárigi, ni cáta áu loubagiñe, madúnatina ni íbini lun nafáragadunun ligeídin.”

²⁶ ‘Nidújeñu, jugúya le jarájüñübei ladügawagun Abrahám, júma jugúya le mámabei ladügawagun Abrahám, inébejabutün lun Búngiu. wagía gürígia ja únbaña loúnajoúa ugánu le luáguti Wasálbaragüle.

²⁷ Já meja gürígia ja aganoúbaña Jerusalén jáu sun jábutigu, ibídiñetí yebe joun ca lan Jesúsubei, úa ligía gunfaráanda jamáni jerérun profétagu, láu sun aliijoúa lan jerérun tídan jalígilisin ságü luwéyuri eméraaguni, jagía guánarügüti gúnfuli jamúti le bürüwañubei láu jasiádiruni Jesúsu lun loúnwen. ²⁸ Láu sun madári jamá lidúnrun Jesúsu lun gayára lan jáfaruni jilágubei, amúriajatiña lúma Piláto lun láfaragüdüni jilágubei. ²⁹ Dánti le adüga jamáali sun le taríñagubei Lerérun Búngiu luágu, ába jarárigüdüni lueígiñe gurúwa, ába jíchuguni lídoun lumúaja. ³⁰ Ába lásaaragüdüni Búngiu lídaangiñe ouweni lúnya labágaridun. ³¹ Arúfudaguati Jesúsu lúngua wínwañu luágu sarágu weíyaasu joun ja ñübinbaña lúma luágu luweíyasun Galiléagiñe lun Jerusaléoun, jagíati geféenbaña luágu joun gürígia guetó.

³² ‘Wíchiguñein lubeíti ugánu le jun, luágu darádu lé meja ladügübei Búngiu jáma binádu wagübürigu ³³ gúnfuli láali woun, wagía le jadügawagun, láu lásaaragüdüni Jesúsu, quei laríñaguni tídan

lilíburun, lídan libíaman Sálmo. “Niraü amürü, rúnaali ubáraü le bun ugúñe.” ³⁴ Aríñaga láali meja Búngiu luágu lásaaragüdüni Jesúsu lídaangiñe ouweni lun mañáladun lan lúgubu, dan laríñagun tídan líburu to Lerérun. “Níchugubei abíniruni le uágubei nariñaga lun Davíd bun, gayáraati beménigidun luágu.” ³⁵ Laríñaga gíñe Davíd lídan ábanya Sálmo. “Mígirunbadibu lun lañáladun lúgubu Biraü le jínsiñebei bun.” ³⁶ Davíd, seríwiti méja joun ja lánina lidáani quei laríñaguni Búngiu lun, lárigiñe, ába louñwen, ába labunún le ñí lubei jabunúa lagübürigu, ába lañáladun lúgubu. ³⁷ Ánjeinti Jesúsu, sarágüda lumúti Búngiu lídaangiñe ouweni, mañáladunti lúgubu. ³⁸ Nidújeñu, lúnti lubeíti jasúbudiruni luágu lídaangiñe lan Jesúsu ferúdunawa lan wafígoun. Ligía ugánu wanügübei jun. ³⁹ Lídaangiñeti gíñe, chibáwaali lubeí sun wafígoun, sun wagía le afíñebei luágu, gidáwa ligía wadúnrun ligíbugiñe Búngiu, cátei lé meja siña lubei lilúrudun Moisés adüga. ⁴⁰ Toúnigi jumá lubeíti lueí láburujan ligáñi Búngiu juágoun queísi jaríñaguni profétagu dan le jaríñagunbei.

⁴¹ Jugúya le éjerajabei náu, weírilá janígi, áni gumúgua jumá,
ladüga áu le Búngiubei, nadügüba cátei weínamuburiti, daríme lun mafíñen jumá, íbini jabájüdaguni ámu jun.

⁴² Dan le láfuridunbei Páblo jáma lánigu tídaangiñe ligílisi, ába jamúriajan jáma lúnya jadímurejan joun luágu buri cátei le lewéñegua dimáasu. ⁴³ Dan lagúmuchun jadámuridagun ligílisirugu, sarágu jádaangiñe juríu jáma buri ja ígirubalin binádu

jafíñen lun jafálaruni jafíñen juríu, ába jafálaruni Páblo lúma Bernabé. Ába jadímurejan Páblo lúma Bernabé jáma, ába jaríñagun joun lun jasígirun eménigira luágu lareídun Búngiu.

⁴⁴ Lewéñegua dimáasu, le luwéyuri eméraaguni, ába jóúndaragun jíbe-ágei lílana fulásu lun jagáambuni lerérun Búngiu. ⁴⁵ Láu jaríjin juríu sarágu gürígia agáambajei lerérun Búngiu, ába jeméendüjan, ába jagúmeserun asígenerei Páblo, anába jameí líri Jesúsu. ⁴⁶ Ábati jadímurejan Páblo lúma Bernabé manúfudeiga, ába jaríñagun.

—Lúnti yebe wíchuguni ugánu lúmagiñeti Búngiu luágu Wasálbaragüle jun furúmiñe, jugúya le juríu, quei mabúseerun jumá jerésibiruni ugánu ligía, láu líra jarúfuduñein luágu madüna jumáni ibágari le magúmuchaditi, ítara líña weíbugagubeíti apúrichija joun ja mámabaña juríu. ⁴⁷ Ladüga ítara líña lariñaguni Wabúreme woun.

Níchuguñadibu lun bíchuguni larúgounga joun ja mámabaña juríu,
lun gayáraabei lan jasálbarun ja aganoúbaña lídan lagúmujóun fulásu ubouágu.

⁴⁸ Dan jagáambuni ja mámabaña juríu cátei le, ába jagúndaaragun, ába jagúmeserun aríñaga luágu buídu lan láni Búngiu ugánu, ába jafíñerun sun ja lúnbaña jafíñerun luágu Jesucristu, ja lúntiñabaña ibágari le magúmuchaditi. ⁴⁹ Ítara líña lapúrichijoún lerérun Búngiu lídan sun fulásu ligía. ⁵⁰ Ába jadímurejan juríu jáma würíña gúnfulitiña, inébewa jagía, lúma jáma wügüriña weírigutiña ñi ubúrugu, ába jínchajániña lun jeíbaajaniña Páblo lúma Bernabé darí lun jabúguniña lídaangiñe fulásu ligía.

51 Ábati jáfuruduní calíqui lueígiñe jagúdi, arúfudei luágu mabuídun lan jóuserun lílana fulásu ligía, ába jóúdin ubúrugun Icónio. 52 Gúndaañu jáña afíñetiña Antioquía luágu jabágari lúma Cristu, weíriti jedéregeragun jóungua lun Sífiri Sándu.

14

Páblo lúma Bernabé ubúругu Icónio

1 Ába jebélurun Páblo lúma Bernabé tídoun jalígilisin juríu ubúругu Icónio, ába japúrichijan, buíti jadímurejan darí lun jafíñerun sarágu, dándu juríu quei máma juríu, luágu Jesucrístu. 2 Juríu ja mafíñebaña luágu Jesucrístu, ába jínchajaniña ja mámabaña juríu, amísiñedagúdaña afíñetiña joun. 3 Ligía jeréderunbei Páblo lúma Bernabé sarágu dan ñi, ába jadímurejan furáangu, manúfudeiga, jeménigiñu luágu Búngiu, arúfuda lumúti Wabúreme luágu inárüni lan cátei le japúrichijabei luágu lareídun, láu líchuguni ubáfu joun lun jadáagun seíni lúma miláguru. 4 Fánreinguañu jáña lílana ubúругu ligía, jíbiri jámagiñeñanu juríu, jíbiri jámagiñe apóstolugu. 5 Játi juríu jáma ja mámabaña juríu, ába jebélurun lídoun ában arítaguni jáma gumádimatiña lun jeíbaajaniña apóstolugu lúma lun jachámuragun dübü jawágun. 6 Ánjein Páblo lúma Bernabé, ába jasándiruni, ába jóúdin lídoun buri fulásu le gíribei Lístra lúma Dérbe, biáma fulásu le láni méme fulásu le Licaónia, lúma geyégua láu, 7 apúrichija jamúti gíñe ugánu luáguti Wasálbaragüle Jesucrístu ñi.

Jachámuragun dübü luágu Páblo lídan fulásu le Lístra

⁸ Nĩnein ában wügüri meĩbugunti, Lístra, ñun líña ladüga ítaragubeĩnein lan lúmagiñe lagüriajoun, meĩbugungubeíti. ⁹ Lagáambajañe in wügüri ligía le laríñagubei Páblo, láu laríjin Páblo luágun, ába lasúbudiruni luágu afiñe lan wügüri ligía luágu gayára lan lareídagun. ¹⁰ Ábati laríñagun Páblo lun láu umálali jéreti.

—Ráramabá luágu bugúdi.

Ába lachúbarun wügüri ligía arárama, ába lagúmeserun eĩbuga. ¹¹ Dan jaríjini gürígia cátei le ladügübei Páblo, ába jagúmeserun agúaraja lídan jerérun Licaóniana, jaríñaga.

—¡Raríjaña búngiugu quei jagáburi wügüriña wámoun!

¹² Jaríñaga luágu Bernabé búngiu Júpiter, luágu Páblo búngiu Mercúrio, ladüga ligía lan adímurejabei. Nújein lúban jabúngiute Júpiter bougudiñoun luei ubúругu, ¹³ ába liábin lufádirin Júpiter ñigiñe barúina wügüriña bágasu lúma buri fulúri luágun lubéneri ubúругu, busénti yebéti ligía jáma buri gürígia lun jáfaruniña bágasu jagía lun jadágaragüdün joun Páblo lúma Bernabé. ¹⁴ Dan jasúbudiruni Páblo lúma Bernabé cátei lan jabúseerunbei gürígia ja jadügün, ába jajeíridagunun janáangun le luweírin lubéresen cátei le joun, ába jádaragun jóungua jádoun gürígia agúarajeina.

¹⁵ —¡Wügüriña! ¿cámesan jabúseera jadügüni cátei le? Wügüriña giñétia wagía quei jugúya, wayábiña aríñaga jun lun jígiruni cátei buri le mabuídunbei, lun jafálaruni Búngiu le wínwanbei, le adügübalin siélu lúma ubou, barána lúma sun cátei le lídaanbei. ¹⁶ Lídan meja dan le sügüjalibei,

ígira lumútiña meja Búngiu gürígia lun jadügüni le jabúseerubei, ¹⁷ láu sun, arúfuda láani joun gürígia cáteiñein lan láuja buídu le ladügübei joun. Rúti júya woun lúma alúbajani buíti, ru ligía eígini buídurügüti woun, belúgüda lumúti ugúndani tídoun wanígi.

¹⁸ Láu sun aríñaga jamáni Páblo lúma Bernabé sun cátei le joun, jénreengu mémegili jeréderuniña gürígia lueí jáfaruniña bágasu jagía lun jadágaragüdün joun.

¹⁹ Ábati jachülürün juríu Antioquíagiñe lúma Icóniogiñe, ába jagáñeiruni jarítangun gürígia lun jachámurangun dúbü luágun Páblo. Lárigiñe, ába jadúruguduní bougudín lueí fulásu, sun jaríñangun luágu jiláali lan. ²⁰ Dan le jagúriridágun afíñetiña láu Páblo, ába lásaarun, ábaya lebélorun fulásurugún. Larúgan, ligía lídin lúma Bernabé ubúrugun Dérbe.

²¹ Lárigiñe lapúrichijaní ugánu luáguti Wasálbaragüle ñi Dérbe, le ñí jabei sarágu gürígia afíñerutiña luágu Jesucrístu, ába jagíribudun, ába jouúdin Lístra, Icónio lúma Antioquía. ²² Rútiña gurásu joun afíñetiña ja lídaanbaña buri fulásu ligía, aríñaga jagía joun lun jasígirun derégüdagu lídan jafíñen, aríñageina jagía joun luágu lúnti lan wasúfurirun sarágu lun gayára lan webélorun lídoun larúeijan Búngiu. ²³ Rútiña giñe ábutigu lídan cáda jadámurin afíñetiña. Lásunti jayúmurangun lúma jayúnarun, ába jedéregeruniña lábun laríaajan Búngiu le uágubei jafíñera.

Lagíribudun Páblo lúma Bernabé Antioquíoun

²⁴ Lárigiñe, ába jásügürün Pisídiagiñe, ába jachülürün Panfília. ²⁵ Ába japúrichijaní ugánu

luáguti Jesucrístu ubúругu Péрге, líbiri méme Panfília, ábati jóúdin Atálioun. ²⁶ Ñígiñe jádina, ában jóúdin Antioquíoun, le fulásu le ñíjin lubei jóúnajoúa lábugiñe laríaaan Búngiu adúgei wadágimanu le jagúmuchubei guetó. ²⁷ Dan jachúlürün Antioquía, ába jóúndaraguniña tánigu jalígílisin afíñetiña, ába jabájüdaguní sun cátei le ladügübei Búngiu jáu joun, lúma luágu lánjunrenchuní Búngiu béna joun ja mámabaña juríu lun gíñe gayáraabei lan jafíñerun luágu Jesucrístu lun jasálbarun. ²⁸ Ába jeréderun Páblo lúma Bernabé sarágu dan jáma afíñetiña ñi.

15

Adámuridagúni Jerusalén

¹ Ligía jayábin wügüríña Judéagiñe lun Antioquíoun, ába jagúmeserun arúfudaja joun afíñetiña luágu lun lan jasálbarún, mósu lan jerésibiruni wügüríña circuncisión, quei laríñaguni lilúrudun Moisés. ² Barüti Páblo lúma Bernabé ában sigénei weíriti jáma luágu cátei ligía, lagúmujoún óra, ába loúnajoún Páblo, Bernabé, jámaya ámu wügüríña Jerusaléoun lun jóúdin aráanserei cátei le jáma apóstolugu jáma tábutigu ligílisi to ñíboun.

³ Ja tánigu ligílisi to Antioquíaboun oúnajabaliña, lídaanti jaweíyasun, ába jásügürün loúbawagugiñe Fenícia lúma Samária, abájüdagueina jagía luágu jígiruni ja mámabaña juríu binádu jafíñen lun jafálaruni Crístu. Ába jagúndaaragun sun afíñetiña láu ugánu le.

⁴ Dan jachúlürünbei Páblo lúma Bernabé Jerusalén, ába jerésibiruniña tílana ligílisi, jáma apóstolugu, jáma tábutigu ligílisi, ába jabájüdagun

Páblo lúma Bernabé joun luágu sun le adüga láalibei Búngiu jádaangiñe. ⁵ Ñiñanu jádaangiñe jadámurin fariséogu ja afiñetiña luágu Crístu, ába jaráramun, ába jariñagun.

—Lúnti jerésibiruni wügüriña afiñetiña ja mámabaña juríu circuncisióñ, lúnti giñe jagúnfulirun lúma lilúrudun Moisés.

⁶ Ábati jóundaragun apóstolugu jáma tábutigu ligílisi lun jatúriajaní cátei le. ⁷ Láriñe sarágu dimúrei, ába lásaarun Pédro, ába lariñagun.

—Nidújeñu, subúdi jumúti luágu binárü lán meja lanúadirana Búngiu jádaangiñe lun níchuguni ugánu le lánina asálbaruni joun ja mámabaña juríu, lun giñe gayáraabei lan jafiñerun luágu Jesucrístu. ⁸ Búngiuti, le subúdijabúbei tun anígi, arúfuda lumúti luágu resíbi lániña ja mámabaña juríu láu líchuguni Sífiri Sándu joun quei líchuguni woun. ⁹ Manügün lumútiwa Búngiu ámu jaweí, jarúmagüda lumútu giñe janígi láu jafiñen luágu Jesucrístu. ¹⁰ ¿Cáti uágu lalóuguada jafiñen guetó luágu le adüga láalibei Búngiu, ru jugúya ában ijürügu jawágun afiñetiña ja, le wásiñerubei wagía guánarügü anüga —ni wagía ni binádu wagübürigu? ¹¹ Afiñetiwa luágu sálbaadiwa lan láurügü wafiñerun luágu Jesucrístu, madügünga wagía ni ámu cátei lun wabíjini, sálbaadiwa láu lareíni Wabúreme Jesucrístu. Ítara méme líña giñe jasálbarun ja mámabaña juríu.

¹² Ábati jámanichúnga, ába jagáambuni sun le jariñagubei Bernabé lúma Páblo joun luágu buri seíni lúma miláguru le ladügübei Búngiu jádaangiñe, jagánagua ja mámabaña juríu. ¹³ Dan le lásurun jadímurejan, ába lariñagun Jacóbo.

—Nidújeñu, agáamba jumána. ¹⁴ Abájüdaguaali Simón Pédro woun ída líña lan fuleísei lániña Búngiu ja mámabaña juríu, láu lanúadajan jádaangiñe lun lánigume. ¹⁵ Ítara líña cátei le quei lé meja jabürüjabei profétagu tídan Lerérun Búngiu.

¹⁶ Gumúguaali jarúeijan ladügawagun Davíd, queísigubeirügü tagúmuchagun ában múna eíguadutu.

Lachülürüba wéyu nun, áu le Búngiu, lúnyame naríjin jawágun ladügawagun Davíd, ábame níchuguni ubáfu lun ában jádaangiñe lun larúeijan jádan.

¹⁷ Nadügübei líra lun gayáraabei lan jayábin sun jíbiri gürígia lun jáluajanina queísi Jabúreme, lun jayábin sun ja mámabaña juríu nun, ja anúadaja náñabaña lun nánigume.

¹⁸ Ítara líña naríñagun, áu le Búngiu, le asúbudirágüdübalin cátei le lúmagiñe buga binádu dan.

¹⁹ ‘Ligía naríñagunbei luágu moun láni wíchugun sarágu lúruđu jawágun ja mámabaña juríu, ja ígirubalín binádu jafíñen lun jafálaruni Búngiu, ²⁰ buídurügüti láu labürüjoún joun lun jebé lan jeígin eígini le adágarawagüdüti joun sándu, madáagun jagíame cátei buri jáma ja úmatiña mamárieidun jamá, meígin jagíame jágürügü anímaalu ja tigíwarügütiña lugúndun máfuridunti játa jádaangiñe, meígin jagíame játa anímaalu. ²¹ Buíti lun jagúnfulirun lúma buri cátei le lun jíchugun inébesei joun juríu, ladüga lúmagiñe bugája binádu dan, añájein gürígia apúrichijati lilúrudun

Moisés lídan ságü fulásu, aliijóúati lúruđu luágu tídan buri jalígílisin juríu ságü luwéyuri eméraguni.

²² Ábati jarítangun apóstolugu jáma tábutigu ligílisi jáma sun tilana ligílisi janúadajan wügüríña jádaangiñe, lun jóúnajaniña Antioquía úara lúma Páblo lúma Bernabé. Ába janúadiruni Júdas, le gíríbei Barsabási, lúma Sílas, bián wügüríña weírigutiña jádan afíñetiña. ²³ Ába jóúnajan ában gárada jáma, láriñajare tídan gárada tugúya.

“Wagía le apóstolugu, tábutigu ligílisi, jáma sun jíbiri afíñetiña, mábuga wáña joun wadújeñu lueígiñe Jesucrístu ja mámabaña juríu ja aganoúbaña Antioquía, Síria, lúma Cilícia. ²⁴ Agáambaadiwa luágu añájein lan gürígia ñüdüntiña yágiñe ibídiñoun woun ebéreseja jun láu jadímurejan, áni dájaña ámu arítangun jídoun láu jaríñangun jun luágu mósu lan jerésibiruni wügüríña circuncisión, queísi laríñangun lilúrudun Moisés. ²⁵ Ligía wúwaradúnbei lídan warítangun lun wanúadajan gürígia wádaangiñe lun jóúdin aríjaün úara jáma wadújeñu Bernabé lúma Páblo ja jínsiñebaña woun sarágu, ²⁶ ja rújamaalíbei jabágari lídoun pelíguru lueígiñe Wabúreme Jesucrístu. ²⁷ Woúnajañanu lubeíti Júdas lúma Sílas jun, jadímurejaba júma lun jafúnraanguagüdüni sun cátei le tídaanbei gárada to woúnajaboun jun, jun. ²⁸ Maríbaanti larijín lun Sífiri Sándu lúma woun, míchugúniwa lan ámu ijürügu jun lueídügüya murúsun cátei le, le lunbei jadügüni. ²⁹ lun meígin jumá úwi le jáni anímaalu ja adágarawagüdütiña joun sándu, meígin jugúyame jítaü, ni úwi le jáni anímaalu ja tigíwarügütiña, madáangun jugúyame

cátei buri jama gürígia ja mamárieidúntiña júma. Ánjaün areídagua júngua lueí buri cátei le, buídubei jadüga. Buídu lámuga lídin jun.”

³⁰ Lárigiñeti jóúnajoún luágu jaweíyasun, ába jóúdin Antioquía. Dan le jachülürünbei ñi, ába jóúndaraguniña afiñetiña, ába jíchugunun gárada joun. ³¹ Dánti le jalíjanbarun afiñetiña, ába jagúndaarun sarágu luágu gurásu le tíchugubei joun.

³² Quei gíñeti gabáfu jamá Júdas lúma Sílas lun ladímurejan Búngiu jayúmulugugiñe, ába jíchugun gurásu joun afiñetiña láu ladímurejan joun, ru jagía idérebugu lun jafiñen. ³³ Lárigiñe jásügürün átiri dan ñi, ába jayoúragun afiñetiña joun lubá jagíribudun jámoun já meja oúnajabaliña Jerusalén.

³⁴ Ánjeinti Sílas, ába leréderun. ³⁵ Reídeitiña gíñe Páblo lúma Bernabé Antioquía, ába jasígirun arúfudajei lúma apúrichijeí ugánu luáguti Crístu, jagía jáma sarágu ámu.

Lagúmeseruni Páblo libíaman luweíyasun apúrichija

³⁶ Átiri dan lárigiñe, ába laríñagun Páblo lun Bernabé.

—Queímounya aríjaña afiñetiña lídan sun ubúrugú buri le ñí lubei apúrichija wamáali lan ugánu luágu Crístu, aríja wamámuga ída jáña lan.

³⁷ Busénti yebe Bernabé janüğüni Juan Márcos jámagua, ³⁸ májati Páblo janüğüni ladüga meja ígira láaña lan Panfília, masígiti jáma lídan wadágimanu.

³⁹ Lárigiñe sarágu sigénei, múaradúntiña luágu cátei le darí lun jafánreinragun jawáriuagua. Ába lanüğüni Bernabé Márcos, ába jóúdin Chípre, ⁴⁰ ába lanüğüni Páblo Sílas. Lárigiñe jedéregeruni afiñetiña

Páblo lúma Sílas lújaburugun Búngiu, ába jóúdin, ⁴¹ ába jásügürün Síriagiñe lúma Cilíciagiñe, íchaajeina gurásu joun afiñetiña ligílisirugu.

16

Lídin Timoteo úara jáma Páblo lúma Sílas

¹ Ába jachülürün Páblo lúma Sílas lídoun buri fulásu le Dérbe lúma Lístra, le ñí lubei jadárira ában afiñeti gíriti Timotéo, tiraü ában würi juríu afiñetu luágu Jesucrístu, güriégu lúguchi. ² Afiñetiña ja aganoúbaña Lístra lúma Icónio, buíti jadímurejan luágu. ³ Busénti Páblo lun lídiba lan Timotéo jáma, íchigeina ugánu luáguti Crístu, ába lerésibiruni Timotéo circuncisión lueí wuríba lan joun juríu ja aganoúbaña lídan buri fulásu ligía, quei subúdi jamáni luágu merésibirun láani circuncisión ladüga güriégu lan lúguchi. ⁴ Súnti fulásu le ñígiñe lumúti jásügüra, jasúbudirágüdüni cátei le jaríñagubei apóstolugu jáma tábutigu ligílisi ja Jerusalénbaña joun afiñetiña, ába jéredun jawágu lun jagúnfulirun lúma jagúmadin. ⁵ Ába lubeíti jedéraagüdün tílana ligílisi lídan jafiñen, ába jagánwoundun afiñetiña ságü wéyu.

Lasálragan ában wügüri Macedóniana lun Páblo

⁶ Májati Sífiri Sándu lun jíchugubei lan ugánu luágu Crístu Ásia. Ábati jásügürün labádinaguagiñe Fríjia luma Galácia, ⁷ ába jachülürün luágu fadáguau le Mísia. Ñígiñe yebe jarítagua lun jebélurun loúbawagun Bitínia, májati láni Jesúsú Espíritu le méme Sífiri Sándu lun jadügüni. ⁸ Ábati jóúdin surúrugu Mísioun, ába jarárirun Tróas.

9 Ñi lasáliragua ában wügüri Macedóniana lun Páblo, áriebu, rára ayúmuragua lun, lariñaga lun. “Queímoun Macedónia íderagua bámugawa.”

10 Lárigiñe lasáliragun wügüri ligía lun Páblo, ába waráansejan lun woúdin Macedónia láu wafíñen luágu lagúajaña lan Búngiu woun lun wíchuguni ugánu luágu Crístu le Wasálbaragüle joun Macedóniana.

Páblo lúma Sílas ubúругu Filípos

11 Ábati wáfayarun Tróasgiñe, ába woúdin sügülügü luágun ubouju le Samotrácia, larúgan, ligía wachülürün Neápolis. 12 Ñígiñe ába woúdin Filípos, Filípos lábugiñeñein lagúmadijan Róma, ligía giñe ubúругu le weírigutimáabei luágu louba Macedónia. Reídeitiwa átiri wéyu ñi. 13 Luágu ában wéyu le luwéyuri eméraaguni, ába wáfuridun bougudin lueí ubúругu, lárún dúna, lídan ában fulásu le ñi lubeija layúmurawagúa lun Búngiu. Ába wañúurun ñi, ába wíchuguni ugánu luágu Crístu joun würíña ja oúndaragubáña ñi. 14 Ñíñoun ában jádaangiñe, gíritu Lídia, ubúругuna Tiatíra, tifisiute alúguraja gamísa fínutu to gúchu tágu. Judúguatu würi tugúya lun Búngiu, tagáambajañádiwa, ába lánjunrenchunun Búngiu tanígi lun tadügün gásu láu le lariñagubei Páblo. 15 Ába tabásterun jáu sun tílana túban, lárigiñe, ába tayúmuragun woun ítara.

—Ánjein afíñe jubeí luágu afíñe nan le tímatimaati luágu Wabúreme Crístu, reídei jumá ya núbiñe.

Jéretu wawágu, ába weréderun.

16 Luágu ában dan, dan le woúdiña lan lídoun fulásu le ñi lubeíñaja layúmurawagúa lun Búngiu,

ába wadúnragun túma ában irájü gawágutu ában espíritu wuríbati le íchugubei ubáfu tun lun tasábiujan. Ában idámuni irájü tugúya, ibíjatutíja sarágu seínsu joun tabúriña láu tasábiujan. ¹⁷ Ába tagúmeserun irájü to afálarawa, wagía lúma Páblo, agúarajeina tugúya ítara.

—Gürígia ja, jesériwiduña lun Búngiu le íñubei, jadímurejaña luágu üma lánina asálbaruni lídaangiñe figóu jun.

¹⁸ Gíbeti wéyu táu adügei cátei le darí lun tebéresedun lun Páblo, ába lagáragun, ába laríñagun lun espíritu le tídaanbei.

—Lídan líri Jesucrístu, gumádi numútibu lun báfuridun tídaangiñe.

Ába láfuridun espíritu ligía tídaangiñe lídan méme óra ligía.

¹⁹ Dan le jaríjin tabúriña luágu siñáli lan jagáñeirun seínsu tueígiñe, ába jarügüdüni Páblo lúma Sílas, ába janügüniña jagíbugiñoún ábutigu lamídaangua ubúrgu. ²⁰ Ába jarúfuduniña jagíbugiñe gumádimatiña, ába jaríñagun.

—Wügüriña juríu ja, jachágaraguñein wabúrugute, ²¹ jarúfudajaña igáburi le wásiñerubei erésibira ni adüga ladüga Rómana wagía.

²² Ábati jiñúragun gürígia jóungua jawágu, ába jarágachaguágüdüniña gumádimatiña, ába jíchugun dimúrei lun jabeichúniwa láu wéwe. ²³ Lárigiñe sarágu abeichúni, ába jádaruniña furísunrugún, ába jaríñagun lun oúnigiruti adaürütiña lun goúnigi lániña buídu. ²⁴ Dan libíjini oúnigiruti lúrudu le, ába ládaruniña lídoun lagúmujoún tarígeirugu furísun, ába legélenchuni jagúdi.

²⁵ Queí buri luágun amídi árieibu, ñíñanu Páblo lúma Sílas ayúmuragua lúma erémuja urému lun Búngiu, ja jíbiri, agáambaja. ²⁶ Sódini, ába liábin ában oúnwenbun járabaganáli, ába lánjingichuni tuágaburi furísun. Lídan óra ligía, ába lánjunrenchun sun béna, safá ligía sun güríngüri le jawágubei adaürütiña. ²⁷ Ába lagágudun oúnigiruti, dan laríjin luágu júnren líña lan sun tubéneri furísun, ába laságarunun lefeínte lún yebe láfaragun lúngua, sún yebe laríñagun luágu ñüdüngua jamá adaürütiña. ²⁸ Ába lagúaragun Páblo lun.

—Máfaraguabá búngua, awánja ya sun wagía.

²⁹ Ábati lamúriajan oúnigiruti lámpu, ába lebélorun eíbaagueina, adádagareina láu anúfudei, ába láguragun lúngua lubádu jagúdi Páblo lúma Sílas. ³⁰ Ába laságaruniña furísunrugugiñe, ába laríñagun joun.

—Wügüriña, ¿ca cátei lúnbei nadügüni lun nasálbarun?

³¹ Ába jaríñagun lun.

—Afíñebá luágu Wabúreme Jesucrístu, ábame basálbarun jáu sun tílana búban.

³² Ába jíchuguni ugánu luáguti Crístu lun jáu sun ja lúbiñebaña. ³³ Lídan méme óra ligía, láu sun áriebujali lan buídu, ába lachíbuni bíti buri le jawágubei, ábati labásterun jáu sun lufámilian. ³⁴ Lárigiñe, ába lanügüniña lúbiñoun, ába líchugun eígini joun, jmáti lugúndan jáu sun lufámilian láu jafíñerun luágu Búngiu!

³⁵ Larúgan bináafin, ába joúnajan gumádimatiña polisía aríñaga lun oúnigiruti lun lígiragüdüniña

Páblo lúma Sílas. ³⁶ Ábati laríñagun oúnigiruti lun Páblo.

—Oúnajaaña gumádimatiña aríñaga nun lun nígiragüdünün, gayáraajali lubeíti jídin darángilañu.

³⁷ Ába laríñagun Páblo joun polisía.

—Láu sun Rómana wamá, beíjamutiwa jagíbugiñe gürígia, míchigunga dan woun lun wadímurejan waweígiñegua, dágua jamáwa furísunrugun, ¿guetó buséntiña jígiragüdúniwa arámudaguárügü? ¡Máfuridunbadiwa! Nübin jamá aságarawa.

³⁸ Ába jabájüdaguni polisía cátei le joun gumádimatiña, ába janúfudedagún gumádimatiña dan le jasúbudiruni luágu Rómana jamá Páblo lúma Sílas. ³⁹ Ábati jóudin amúriaja ferú dun jáma, ába jaságaruniña, ába jayúmuragun joun lun jáfuridun ñígiñe ubúrugugiñe. ⁴⁰ Dan le jáfuridunbei furísunrugugiñe, ába jóudin túbiñe Lída, lárigiñe jaríjiniña afíñetiña lúma jíchugun idérebugu joun, ába jasígiruni jaweíyasun.

17

Chagáguai ubúru gu Tesalónica

¹ Lídán jaweíyasun Páblo lúma Sílas, sügütiña Anfípolisgiñe lúma Apolóniagiñe, ñígiñe, ába jachülürün ubúrugun Tesalónica le ñí tubei ában jalígilisin juríu. ² Quei léchun Páblo, ñüdünti tidan ligílisi tugúya, adímurejati jáma ürüwa dimáasu, ságü luwéyuri eméraaguni. ³ Arúfudajati joun quei tariñaguni Lerérun Búngiu luágu lúnti lán meja lasúfurirun Crístu, lárigiñeme lan loúnwen, aba lánme lásaarun lídaangiñe oúweni lúnya labágaridun. Laríñaga buri joun.

—Jesúsu méme le uágubei nadímureja jun, ligía Crístubei le lúnbei liábin asálbaraña gürígia.

⁴ Ábati jafíñerun jádaangiñe juríu, ába júaradun lúma Páblo lúma Sílas. Afíñetiña gíñe sarágu ja mámabaña juríu ja judúguatiña lun Búngiu, jáma sarágu würíña weírigutiña. ⁵ Juríu ja mafíñebaña luágu Jesúsu lan Crístubei le lunbei liábin, magúndaantiña láu cátei le, ába jóundaragun wügüríña wuríbatiña ja eíbugañajádügübaña ümada, ába jachágaraguágüdüniña gürígia ñi ubúru. Ába jaságarajanun lúban Jasón, áluajaña Páblo lúma Sílas lun jaságaruniña lun jedéregeruniña jájaburugún gürígia. ⁶ Queíti madári jamániña ñi, ába janügüni Jasón jáma átiri jádaangiñe afíñetiña jagíbugiñoún gumádimatiña lídan ubúru ligía, ába jagúaragun aríñaga.

—Wügüríña ja, ja ebéresejabaña lídan sun fulásu, chülüjaña gíñe ñájoun, ⁷ resíbi láaña Jáson lúbiñe. Sun jagía dürügua jamúti lilúrudun Urúei César, ladüga aríñagatiña luágu níjein lan ámu urúei, ában nege gíriti Jesúsu.

⁸ Dan jagáambuni gumádimatiña jáma sun jíbiri gürígia cátei le, ába jachágaragun. ⁹ Jáson jáma ja jíbiri, ába jafáyeijan, ába jígirawagüdüniwa.

Páblo lúma Sílas ubúru Beréa

¹⁰ Furése furése, dan le labúrigadun, ába jóunajaniña afíñetiña Páblo lúma Sílas ubúrugun Beréa. Quei jachülürün ñi, ába jóudin tídoun jalígílisin juríu. ¹¹ Juríu ja ñíbaña, buítimaati jagáburi jawei ja Tesalónicabaña, resíbi jamúti ugánu luáguti Crístu láu ugúndani, ságüti wéyu jalíjanun Lerérun Búngiu lun jaríjini ánjein inárüni

lubei le aríñawagúbei joun. ¹² Sarágu jáña lubeíti afiñerutiña jádaangiñe, afiñe jagía giñe sarágu ja mámabaña juríu, dándu würiña weírigutiña quei wügüriña. ¹³ Dan le jasúbudirunbalin juríu ja Tesalónicabaña luágu lapúrichijañein lan giñe Páblo Lerérun Búngiu Beréa, ába joudin achágaraguágüdaña gürígia ñi. ¹⁴ Ába jóunajani afiñetiña Páblo furése lun lídin lacóstoun, leréderame Sílas lúma Timotéo Beréa. ¹⁵ Ja ñüdümbaña láu Páblo, ába jáfayajan lúma chülü ubúругu Aténas. Lárigiñe, ába jagíribudun barüina jagía dimúrei lun Sílas lúma Timotéo lun jóudin lárigi Páblo lídan lufúresen.

Páblo ubúругu Aténas

¹⁶ Sun niján lan Páblo Aténas agúrabajei Sílas lúma Timotéo, medéraguágüdünti larítangun láu laríjini ubúругu ligía buin jáu bürübün sándu. ¹⁷ Ligíaja ladímurejaanbei tídan jalígílisin juríu lúma jáma ja mámabaña juríu ja ájuduragubaña lun Búngiu, adímureja ligía buri ságü wéyu jáma gürígia ja ümadarugubaña, ñí lubei jadámuridagua. ¹⁸ Ñíñanu jádaangiñe wügüriña ja atúriajabalin jarúfudajan epicúreogu, jáma ja atúriajabalin jarúfudajan estóicogu, ába jadímurejan lúma. Jaríñaga jíbiri.

—¿Cáfunasan lariñagubei wügüri le woun, líbebei ladímurejan?

Jaríñaga jíbiri.

—Camátia ladímurejaña jawágu ámu búngiugu.

Jaríñagunbeiti ítara ladüga lapúrichijan Páblo joun luágu Jesúsu lúma luágu ásaaruni lídaangiñe oúweni.

¹⁹ Ábati janügüni lídoun ában fulásu gíriti Areópago,

le ñi lubeíja jóundaragua lun jagáambagun jóungua, ába jaríñagun lun.

—¿Gayáraati wasúbudiruni cátei lan iséri cátei le barúfudajabei? ²⁰ Cátei lé buri bariñagubei woun, terénchati woun, buséntiwati wasúbudiruni ca lan laníchigubei.

²¹ Sun Aténasna, jáma teréncha ja aganoúbaña ñi, marítaguntiña luágu ámu cátei lueídügüya luágu jaríñagun lúma jagáambun cátei iséri.

²² Ábati laráramun Páblo jamídaangua ñi Areópago, ába laríñagun.

—Wügüríña Aténasna, aríja numúti luágu afíñe jumá jawágu jisándun, ²³ ladüga dan le aríajaena nubálin fulásu buri le ñí lubei jájuduragua joun jisándun, darítina ában latárü le ñí lubei bürüwañu lan dimúrei le. “Lun Búngiu le ibídiñewabei”. Búngiu le, le únbei jájuduragua, le ibídiñebei jun, ligía Búngiu le uágubei nadímureja jun.

²⁴ ‘Ligía Búngiu le adügübalin ubou lúma sun cátei le ubouagubei, ligía labúremebei siélu luma ubou. Maganoúnti tídan ligílisi to jadüga gürígia, ²⁵ memégeirun lumúti gíñe le gayáraabei jadügüni gürígia luágu lufúleisein, ligía guánarügü íchugubei íbágari lúma garábali, lúma sun cátei woun, sun wagía.

²⁶ ‘Lídaangiñe ábanrügü wügüri ladügaña sun néchaanigu lun jaganoún lídan sun fulásu, aráanseleí dan le lúnbei jabágariduni lúma fulásu le lúnbei ñíba lan jagánawa. ²⁷ Adüga lumúti Búngiu sun líra lun gayáraabei lan jáluajani gürígia, gayára lámuga jadáriruni láu jáluajani, láu sun inárüni lan luágu madíse lan Búngiu lueí cáda ában wádaangiñe.

²⁸ Ladüga lídaangiñeti Búngiu awánjein lubeí, gabágari wagía, eíbuga wagía ligíbuagu uboú le, quei jaríñaguni poétagu jídaangiñe. “Lirájüñü Búngiu wagía.” ²⁹ Queíti lirájüñü wabeí Búngiu, moún lumuti wanügüni Búngiu quei ában sándu le gólu, o pláta o dübü le jadüga wügüríña quei jarítangun luágu ítara líña lan Búngiu. ³⁰ Mebéresegúnti méja Búngiu láu cátei le jadügübei gürígia lágugiñe libídiñe joun, ánjein guetó, aríñagati joun sun gürígia lídan sun fulásu lun jasáansiruni jouuserun. ³¹ Ladüga anúadajaali Búngiu ában wéyu lun ligíaba lan wéyu lagúseragüdüniña gürígia ja uboúagubaña láu ísuruni láu ában wügüri le anúadaja láalibei, wügüri ligía, ligía Jesucristubei, arúfuda lumúti woun láu lásaaragüdüni Jesúsú lídaangiñe ouweni lúnya labágaridun.

³² Dan le jagáambubei luágu ásaaruni lídaangiñe ouweni, ñíñanu jádaangiñe, ába jéjerajan láu, jíbiri ába jaríñangun.

—Lídaanbagúbei ámu dan wagáambeí badímurejan luágu buri cátei le.

³³ Ábati lígiruniña Páblo. ³⁴ Ába jafíñerun jádaangiñe luágu Jesucristu, ába jafálaruni. Ñíñein Dionísio jádan, lé meja ában jádaangiñe ábutigu lídan fulásu le gíríbei Areópago, túma gíñe ában würi gírítu Dámaris, jámaya ámu gürígia.

18

Páblo ubúruгу Corínto

¹ Lárígíñe cátei le, ába láfuridun Páblo Aténasgíñe, ába lídin ubúruгу Corínto. ² Ñi ladárra ában juríu gírítu Aquíla, túma lúmari to gíríboun Priscíla,

Póntona jagía. Málügili lueígiñe jayábin Itáliagiñe, jayábinbei nígiñe ladüga líchugun urúei Cláudio dimúrei lun jáfuridun sun juríu Rómagiñe. Ába lídin Páblo aríjaña, ³ queíti ában lan lifísiute jáma—tadáawagun quiámpu—ába leréderun jáma lun jawádigimaridun lídan ában. ⁴ Ságüti wéyu le lidáani eméraguni, lídin Páblo tídan jalígilisin juríu adímureja, áni gáñei láaña buri dándu juríu quei ja mámabaña juríu lun jafíñerun luágu Jesucrístu.

⁵ Dan jachülürün Sílas lúma Timotéo Macedóniagiñe, ába líchaagun Páblo lúngua le gumúti apúrichijeí Lerérun Búngiu. Ariñagati joun juríu furáangu luágu Jesúsú lan Crístubei le jagúrabajabei lun lasálbaruniña lídaangiñe jafígoun. ⁶ Ánjaña juríu, ába jasígeneruni le lubeíbei, anábagua buri jameí. Ábati láfurudunun Páblo labíte jawágun, arúfudei joun luágu mínsiñe lan jagáburi lun, ába laríñagun joun.

—Ánjaünme eféridira jídaangiñe, mámaalime nídaangiñeti. Lúmagiñe guetó, neíbuga apúrichija joun ja mámabaña juríu.

⁷ Ába láfuridun tídaangiñe jalígilisin juríu, ába lídin lúbiñoun ában wügüri gíriti Jústo, wügüri ligía, judúguati lun Búngiu, ñi toubagiñe ligílisi lagánawa. ⁸ Críspo, le tábuti jalígilisin juríu, ába lafiñerun luágu Wabúreme Jesucrístu, jáu sun títana lúban. Sarágu gíñe jádaangiñe Coríntona, dan jagáambunbalin ugánu luáguti Jesúsú, ába jafíñerun, ába jabásterún. ⁹ Ábati lasáliragun Wabúreme Jesúsú lun Páblo luágu ában áriebu, ába laríñagun lun.

—Manúfudebá, bapúrichija méme, mámanichabá,

¹⁰ ladüga anájein búma, úabei ni ában agúruruti buágu lun ladügün wuríbani bun. Añájein sarágu güriǵia lídan ubúruǵu le ja lúnbaña nánigubaña lan.

¹¹ Reídeiti lubeíti Páblo ában irúmu dimí ñi Corínto arúfudajei Lerérun Búngiu joun lílana fulásu.

¹² Lídan dan le Galión lan gumándanbei Acáya, ába jóundaragun juríu lun járügüdüni Páblo. Ába janügüni ligíbugiñoun lúruǵu lun lagúserawagüdün.

¹³ Ába jariñagun lun gumándan.

—Wügüri le, leréde arúfudaja joun güriǵia lun jájuduragun lun Búngiu láu ában igáburi le múaraanbei lúma lúruǵu.

¹⁴ Dán yebe ladímureja lan Páblo, ligía lariñagun Galión joun juríu.

—Lun jamúga ában lan wuríbani o dúru jürüti ladügübei wügüri le, níchaaguña jamúga núngua lun nagáambunün, jugúya juríu, ¹⁵ quei luágu lan dimúrei buri, lúma íri, lúma jilúrudun, aráanse jumeí júngua, ladüga mabúseeruntina nagúseragüdün luágu buri cátei le.

¹⁶ Ába labúgaguniña ñígiñe. ¹⁷ Ábati járügüdüni sun güriégugu Sóstenes le tábuti jalígilisin juríu, ába jabúleiseiruni ñi guánarügü ligíbugiñe gumándan. Mebéreseǵunti Galión láu líra.

Lagíribudun Páblo Antioquíoun, lagúmeseruni lürüwan luweiyasun apúrichija

¹⁸ Lárigiñe líra, ába leréderun Páblo átiri dan ñi Corínto. Lárigiñe, ába layouúragun joun affíñetiña, ába lídin Síria úara túma Priscíla lúma Aquíla. Ába lásaruni lídiburi lídan ubúruǵu Céncrea lubáragiñe ládinun, lun lagúnfulirun láu ában méja darádu le ladügübei lúma Búngiu. ¹⁹ Dan le jachúlürün

ubúругu Éfeso, ába lígiruniña Páblo Priscíla lúma Aquíla lun jeréderun ñi lídan ubúругu ligía. Lubáragiñe lígiruni Páblo Éfeso, ába lídin ligílisirugu adímureja jáma juríu. ²⁰ Ába jamúriajan lúma lun leréderun méme ñi jáma, májati. ²¹ Ábati layóuragun joun, laríñaga joun.

—Mósu ñi nan Jerusalén lubá fédu le lúnbei ladügün, nagiribudayaba aríjaün ánjein busén Búngiu.

Ába ládinun, ába lídin Éfesogiñe. ²² TÜRÜti Cesaréa, ñígiñe ába lídin Jerusalén abúsura joun tílana ligílisi, lárigiñe, ába larágachun Antioquíoun. ²³ Lárigiñe lásügürün átiri dan ñi, ábaya láfuridun, ába leíbuguni sun fulásu Galácia lúma Fríjia ában ában, íchaajeina dügüdaguaü joun afíñetiña.

Lapúrichijan Apólos ubúругu Éfeso

²⁴ Lídan dan ligía, ába lachülürün ában juríu gíriti Apólos ubúругun Éfeso, Alejandríana juríu ligía. Gapúrichijati, áni subúdi lumúti gíñe Lerérun Búngiu buídu buídu. ²⁵ Subúditi luáguti Asálbaragülei le lúnbei liábin lun, áni apúrichijati luágu Asálbaragülei ligía táu sun tarúman lanígi. Sun le larúfudajabei luágu Jesúsu, inárüni, láu sun lougua lan lasúbudirun luágu, le rügüñein larúfudajabei Juan le abásteragüdjabei luágu Jesúsu le lúnbei liábin lárigiñe, lasúbudira. ²⁶ Luágu ában wéyu, dan le ladímurejaña lan Apólos tídan jalígilisin juríu láu sarágu ichóuruni, ába jagáambuni Priscíla lúma Aquíla. Dan lagúmuchun lapúrichijan, ába janügüni Priscíla luma Aquíla jábiñoun lun jafúnraanguagüdünitima luáguti Jesúsu

le Wasálbaragülebei lun, luma luáguti cátei le larúfudajabei. ²⁷ Dánti le labúseerunbei Apólos lídin louúbawagun Acáya, lúmagiñeñanu afiñetiña Éfeso lun lídin, ába jóúnajan ában gárada joun afiñetiña ja ñíbaña Acáya lun jerésibiruni buídu. Dan lachülürünbei Apólos Acáya, íderagua lumútiña ja lafiñeragüdübaña Búngiu luágu Jesúsu, láu lareíni, ²⁸ arúfuda lumúti joun gürígia láu richaũ le siñá jamuti asígenera, luágu marícha lan le jarúfudajabei juríu, arúfudaleí joun tídaangiñe Lerérun Búngiu luágu Jesúsu lan Crístu le jagúrabubei lun lasálbaruniña.

19

Páblo ubúruyu Éfeso

¹ Sun niján lan Apólos ubúruyu Corínto, ligía lásügürün Páblo labádinaguagiñe buri fulásu, ába lachülürün Éfesoun ñi lubeí ladárrira sarágu afiñetiña. ² Ába laríñagun joun.

—¿Resíbi jumútisan Sífiri Sándu dan le jafiñerunbei luágu Jesucrístu?

Jaríñaga lun.

—Uá, magáambungubeígidiwa yebe luágu níjein lan Sífiri Sándu.

³ Ábati laríñagun joun.

—¿Cáti luwúyeri badísei jerésibirubei?

Jaríñaga lun.

—Le labásterágüdün Juan.

⁴ Laríñaga Páblo joun.

—Labásterágüdüniña méja Juan gürígia, arúfudei luágu sáansi jamáali lan jóuserun, aríñagati gíñe

joun luágu lúnti lan jafíñerun luágu le lúnbei liábin lárigiñe—luágu Jesúsu le Crístubei, le Jasálbaragüle.

⁵ Dan jagáambuni cátei le, ába jabásterun lídan líri Wabúreme Jesúsu. ⁶ Dánti le líchugunbalin Páblo lújabu jawágu, ába liábin Sífiri Sándu jawágun, ában jadímurejan dimúrei buri teréncha, ába buri ladímurejan Búngiu jayúmulugugiñe. ⁷ Jawáraañanu dúusu wügüriña jádan súngubei.

⁸ Ürüwañein játi láu Páblo abásija tídoun jalígilisin juríu le ñi lubeíja lapúrichija, adímureja ligíaja furáangu luágu larúeijan Búngiu, afíñegüda láña gürígia luágu. ⁹ Níñanu giñe, edéreragüdütu janígi, májatiña jafíñerun, adímurejarügü jagía wuríba luágu lémeri Crístu jagíbugiñe gürígia. Ábati ladíreirun Páblo jaweí, ába lanügüniña ja afíñebaña luágu Jesucrístu tídoun ában lescuéla to ñi lubei larúfudaja ában wügüri gíríti Tiránno, ábaja ladímurejan ságü wéyu joun, ñi. ¹⁰ Ítara líña lasígirun luágu bián irúmu, sánti ja aganoúbaña loubawagu Ásia, agáamba jamúti ugánu luáguti Wabúreme Jesúsu, dándu juríu quei ja mámabaña juríu. ¹¹ Adügati buríti Búngiu oúnwenbun buri miláguru lídaangiñe Páblo, ¹² darí lun tánügüniwa buri músue o anáanguni to dagáaru luágu lúra joun sánditiña, ábaja jareídagun, furí jagíaja espíritugu wuríbatiña jádaangiñe.

¹³ Níñanu juríu eíbugañajádügütiña, aságajatiña giñe espíritugu wuríbatiña jaweí gürígia, álugatiñá yebe jayúsuruni líri Wabúreme Jesúsu lun jaságajaniña, jaríñaga buri joun espíritugu.

—Gumádi numútibu lídan líri Jesúsu, le uágubei lapúrichija Páblo, lun báfuridun.

14 Níñanu sédü lirájüñü ában juríu gírítí Escéva, jábuti méja fádírígu, jádan ja adügübalin buri cátei le. 15 Níjein ában jadügüni, ába loúnabuniña espírítu wuríbati ligía.

—Subúdi numúti Jesúsu, subúdití gíñe nun cátei lan Páblobei, ánjein jugúya, ¿cátaün?

16 Ába lachüragun wügüri le láubei espírítu wuríbati lúngua jawágun, gabáfuti sügü jáu súngubei, ába labúleiseiruniña buídu, ába jeibaagun ñígiñe surúsu lúma láu buri bíti jawágu. 17 Agáamba jamúti sun ja aganoúbaña Éfeso cátei le, juríu jáma máma juríu, ába janúfudedagun, weírítí linébedun líri Wabúreme Jesúsu joun.

18 Sarágu gíñe buri jádaangiñe ja afíñerubaña, ába jayábin agúfeserei buri cátei wuríbati lé meja jadügübei, 19 sarágu gíñe buri jádaangiñe já meja gabíñarajadibaña, ába janügünun jalíburun buri, ába jágdunun jagíbugiñe súngubei. Dan jabájüdünbalin tebégi líburu buri tugúya, gebégitu queí buri dimí-san mílu murúsun seínsu le pláta. 20 Ítara líña abúrchagueína lan ugánu luáguti Jesúsu, arúfudeinaleí lubáfu lun lasáansiragüdüni jagáburi gürígia.

21 Lárigiñe sun cátei le, ába laráanserun Páblo lun lídin aríjaña afíñetiña Macedónia luma Acáya, lubá lasígiruni luweíyasun Jerusaléoun. Aríñagati gíñe luágu lárigiñe lanme lídin Jerusalén, lídiba lan gíñe Róma. 22 Ábati loúnajan biáma jádaangiñe ja íderagubalin lubá, Macedónia, wügüriña jagía, Timotéo luma Erásto, ligía, ába leréderun átíriraüya dan Ásia.

Chagáguauü ubúruğu Éfeso

²³ Lídan dan ligía, ñíñein ában oúnwenbun achágaraguní Éfeso jaweígiñeti ja afálarubalin lémeri Crístu, ²⁴ lídaangiñeti ában wügüri gíriti Demétrio, ladáawagun cátei láuti pláta lifísiutebei. Wügüri ligía, adáaguati tirájüñü ligílisi láu pláta to tilígilisin sándu to gíriboun Diána, belútiti sarágu seínsu joun ja ñadágimeinbaña lúma. ²⁵ Ábati loundaruniña ja ñadágimeinbaña lúma úara jáma ámu ja ñadágimeintiña ámu físiu le lenége jafísiute, ába laríñagun joun.

—Wügüriña, subúdi jumúti luágu ñulú lan wabágarí láu físiu le, ²⁶ agáamba jumáli, aríja jumeí ída líña lan lídin Páblo aríñaga luágu máma jamá búngiugu sándu ja jadügübaña wügüriña, áni gíbeeña gürígia jafíñeragüdün, mámarügü ya Éfeso, lídan gíñe líbe-ágei Ásia. ²⁷ Ñóunguati cátei le, ladüga gayáraabei weféridiruni wabísínisin, gayáraabei gíñe teféridiruni tilígilisin búngiu Diána tuweírigun, ábame tanügün búngiu Diána to únoun jájuduragua sun gürígia Ásia lúma lídan sun ubouú quei ni cáta.

²⁸ Dan le jagáambunbalin cátei le, ába jagáñidun buídu, ába jagáragun.

—¡Weírigutu Diána to jabúngiute Éfeson!

²⁹ Ñíñeinti ában oúnwenbun achágaraguní lídan sun ubúruğu ligía. Ába járügüdüni Gáyo lúma Aristárco, biáma wügüriña Macedóniana ja úarabaña lúma Páblo, ába jadúruguduniña chülü tuágun múna to ñi lubeíja jóundaragua. ³⁰ Álugatí yebe Páblo lebelurun lun ladímurejan joun gürígia ñi lun ladírirun sun cátei, mígirun jamúti afíñetiña

lun lebélorun. ³¹ Níñanu gíñe jádaangiñe ábutigu ñi Ásia lumádagu Páblo, oúnajatiña gíñe dimúrei lun lun mebélurun lan ñjin. ³² Níti lídan adámurini, jíbiri agúaragua ában cátei, jíbiri agúaragua ámu, ladüga chagágujaña gürígia, jibe-ágei, ibídiñeti joun ca lan lébubei jadámuridagun. ³³ Níñanu jádaangiñe gürígia, ába jafúnraanguágüdüni cátei le lun Alejándro, le jádajabei juríu ligíbugiñoún guríriguaü lun ladímurejan luágu jafúleisein. Ába ladügün Alejándro seíni láu lújabu lun jámanichun, lun ladímurejan luágu jafúleisein jagíbugiñe gürígia. ³⁴ Dan jasúbudirunbalin luágu juríu lan, ába jagúarajan sun jagía lídan ában, yaráfa lun bián óra.

—¡Weírigitu Diána to jabúngiute Éfesona!

³⁵ Dánti le gálumagüda láaña abürüjati le láni ubúrugü ligía gürígia, ába laríñagun.

—Gürígia Éfesona, sun gürígia subúdi jamúti luágu Éfesona lan oúnigirubárun tilígilisin búngiu Diána, túma tiyáwa to áburujaboun siélugiñe. ³⁶ Quei úa lan ni ában lun lasígeneruni cátei le, gáluma jumá, madüga jumá ni cáta masáminarunga jumei buídu. ³⁷ Wügüríña ja, ja janügübaña ñájoun, míwerujan jamágiru jilígilisin, madímurejan jagía wuríbati tuágu jubúngiute. ³⁸ Ánjein níjein lubei cátei uáguti labúseera Demétrio jáma ja ñadágimeinbaña lúma líchugun jadúnrun, ligía níjein lubei agúseragüdüti lúma agúseragülei, gayáraati jídin ligíbugiñoún lúrudu lun ladímurejan cáda ában lueígiñegua. ³⁹ Ánjein ámu lubei cátei jamúriajabei, lúnti laráanserún lídan ában adámurini

le richáti, ⁴⁰ ladüga gayáraabei laríñawagúniwa luágu wagúbujaña lan wuríbani ladüga cátei le asúseredubei ugúñe, ibídiñebei woun cába lan wounabagüle ánjava álügüdúwa luágu chagáguau le.

⁴¹ Lárigiñe laríñaguni cátei le, ába lagúmuchaguagüdüni adámuridaguni.

20

Luweíyasun Páblo Macedónioun lúma Grécioun

¹ Dan le lagúmuchunbei chagáguau Éfeso, ába louñajan Páblo jawágu afíñetiña lun jayábin lun, gayára lámuga líchugun gurásu joun, ábati louburuniña, ába layóuragun joun, ába lídin Macedónioun. ² Luágu luweíyasun, chülügueina líña jámagiñe afíñetiña lídan buri fulásu le idaangiñebei lásügüra, ru ligía sarágu dügüdaguau joun láu lerérun. Ítara líña lachülürün lídoun ageíraü le Grécia. ³ Reídeiti ürüwa játi ñi Grécia, ládina yebe ugúnein lun lídin Síria, ligía lagáambun luágu jelédeguña lan juríu lubá. Ábagubeíti laráanserun lun lagíribudun múarugugiñe, sügüina ligíaya Macedónigiñe. ⁴ Gíbetiña wügüriña ñüdüntiña úara lúma. Sópater, le liraü Pyrrhus, Beréagiñe, Aristárco lúma Segúndo, Tesalónicagiñe, Gáyo, Dérbegiñe, Timotéo giñe, lúma giñe Tíquico lúma Trófimo, Ásiana. ⁵ Afíñetiña ja, ába joudin wabá, ába jagúrabuniwa ubúru Tróas. ⁶ Wagía, lárigiñe fédu le teigín fein to magánaboun ísi, ába wáfuridun Filíposgiñe tídan ugúnein, seíngü wéyu lárigiñe, ligía wátürün Tróas, le ñí lubei wúwarada

jáma ja ñüdümbaña wabáragiñe, ába weréderun ñi sédü wéyu.

Bisída láni Páblo ubúruğu Tróas

⁷ Samúdi gúnoun, ába jóúndaragun afiñetiña lun jeígin fein le jarítaguagüle luágu loúnwen Crístu, Páblo arúfudajabei joun. Queíti gaweíyasúnbei lan larúgan, ába lasígirun adímureja joun darí lúmoun amídi áriebu. ⁸ Íñuñanu lídan lürüwan túbanana múna to ñí lubei jóúndaragua, ñíñein sarágu lámpu durúngu. ⁹ Níñein ában irájü agáambaja, ñun líña luágu funédere, Eútico líribei. Queíti lílúbei lapúrichijan Páblo áriebu ligía, ába ladábudun lágu irájü ligía, ába larúmugun ñi, ába leíguadun lídaangiñe lürüwan túbanana múna, múarugun. Dan le jarárirunbei lun jiñúraguni, jiláali. ¹⁰ Ábati larárirun Páblo, ába laróúnrun ligíbuagu irájü ligía, ába loúburuni. Ába laríñagun joun afiñetiña.

—Madíjeri jumá, gabágariyaali.

¹¹ Ábayati lawárirun Páblo, ába jafánreinragunun fein, ába jeígin. Ábati lasígirun adímureja darí larúgadun, ligíaali lídin. ¹² Irájüti buga ligía, ába janügüni ágyu winwañu, sun jagía láu ugúndani láu.

Weíyaasu lúmagiñe Tróasgiñe lun Milétoun

¹³ Ába giñe woúdin, ába wádinun tídoun ugúnein, ába woúdin chülü Asón, le ñí lubei lúnti lan wabúduni Páblo quei wadáradun, ladüga busén lan lídin Asón múarugugíñe. ¹⁴ Dan le wadúnragun lúma ñi Asón, ába ládinun wáma, ába woúdin Mitiléne. ¹⁵ Larúgan, ába wáfuridun ñigiñe, sügüina wagía ligíbugiñe ubóuju Quío, ában wéyu lárigiñe, ligía wachülürün ubóuju Sámos. Ába weméraagun

ubúругu Trojílio, larúgan, ligía wachülürün ubúругu Miléto. ¹⁶ Mátürüntiwa ubúругu Éfeso luágu waweíyasun ladüga mabúseerun lan Páblo leréderun sarágu dan ageíraü Ásia, busénti lachülürün Jerusalén furése lun ñi lan lubá fédu le Pentecostés ánjein gayára.

Lapúrichijan Páblo joun tábutigu ligílisi, Éfeso

¹⁷ Dánti le Milétojadiwa, ába loúnajan Páblo jawágu tábutigu ligílisi Éfeso lun jayábin Miléto aríjei, ¹⁸ dan le jachülürünbei, ába laríñagun joun.

—Subúdi jumúti ída líña lan nigáburi lúmagiñe furúmiñeti wéyu nachülürün Ásioun. ¹⁹ Sun dan le jagánaguañadina lubeí, seríwitina lun Búngiu láu únabuni, láu sarágu águiraü, súfuri áu sarágu láu cátei lé buri jabúseerubei juríu jadügün nun. ²⁰ Merédeti napúrichijan jun luágu cátei le lúnbei buídubei lan jun, arúfudaja áu jun furáangu lídan guríriguaü lúma júbiñe. ²¹ Dánda joun juríu quei joun ja mámabaña juríu, aríñagaadina luágu lúnti lan jasáansiruní jouuserun ligíbugiñe Búngiu, lúma lun jafíñerun luágu Wabúreme Jesucrístu. ²² Guetó lubeíti neíbuga Jerusalén, loúnajan Sífiri Sándu. Ibídiñeti nun cába lan asúsereda nun ñi, ²³ lé rügüñein nasúbudirubei, luágu sun lan ubúругu le ñí lumuti nídin, aríñagati Sífiri Sándu nun luágu nadaürüba lan, nasúfuriruba sarágu, Jerusalén. ²⁴ Úati ni cáta lídaangiñe áuti nebéresera, ni nibágari guánarügü, mebégiti ni cáta nun, adúgarügü náali ligía le uágubei loúnajana Búngiu láu ugúndani darí lúmoun lagúmujoún, lun nadímurejani ugánu buíti luágu línsiñejabu Búngiu.

25 ‘Guetó, choúru numúti luágu maríjindügüya láadina lan ni ában jídaangiñe, jugúya lé meja únbei napúrichija luágu larúeijan Búngiu. 26 Ligía naríñagunbei jun ugúñe luágu masándiragun nan núngua láu dúru lueígiñe ni ában jídaangiñe, 27 ladüga subúdigüda náali sun laráansejan Búngiu jun, marámuduntina ni cáta jueí. 28 Toúnigigua jumá lubeíti júngua, toúnigi jumáñame afíñetiña ja líchugubaña Sífiri Sándu lun joúnigiruniña, ja tánigu lilígilisin Búngiu, ja lagáñijabaña láu líta Liraü guánarügü. 29 Subúdi numúti luágu dánme lan nídin, jayábinba lan ámu álua jagünrinchaguni jafíñen, quei lebélorun geígusi jádoun mudún áfaraguaña. 30 Níbaña jídaangiñe guánarügü, lubáragiñe jamúga jarúfudajani inárüni, jarúfudajabei iyéeni lun jafálaruniña afíñetiña. 31 Toúnigi jumá lubeíti, jarítagua jumeí luágu úrúwa lan irúmu náu ewéridijaün wéyuagu áriebu, ayájua buri áu.

32 ‘Guetóti, nidújeñu, derége numútün lun Búngiu lúma lun ugánu le luáguti línsiñejabu, le gabáfubei lun léredagüdüni jafíñen lúma lun líchugun ubáraü jun siélu jádan ja derégeguáañabaña joúngua lun. 33 Mabúseerun nágili ni liseínsun ni ában, ni lanáangun, 34 lubáragiñe líra, subúdi jumúti luágu ñadágimein nan lun nibíjini le nemégeirubei lúma le jemégeirubei ja númabaña. 35 Súnwandan narúfudajan jun luágu ítara líña lan luwádigimariniwa lun jíderawagún ja níjeinbei jemégeirun, luágu gíñe lúnti lan larítawagún luágu dimúrei le lariñagubei Wabúreme Jesúsu dan le lariñagunbei. “Gúndaatimáati le íchugubei sügü láu

le erésibirubei.”

³⁶ Lárigiñe laríñaguni Páblo cátei le, ába lájuduragun, ába layúmuragun lun Búngiu jáma súngubei. ³⁷ Ába jayájun súngubei láu igárigu, ába jóuburuni Páblo, ába jachúuruni. ³⁸ Jírutiñati ladüga laríñagun joun luágu maríjindügüya jamáli lánme. Ába jóudin íchaajei tuágu ugúnein.

21

Luweiyasun Páblo ubúrugun Jerusalén

¹ Dan le wígiruniña afíñetiña, ába woúdin sügülügü lídoun fulásu le gíribei Cos, larúgan, ában woúdin Ródas, ñígiñe Ródasgiñe woúdin lun Pátara. ² Ñi Pátara wadárira ában ugúnein teíbuga Fenícia, ába wádinun tídoun, ába woúdin. ³ Dan wásügürün, ába waríjini ubóju le Chípre, ába wígiruni lueígiñe wabaúna, ába wasígirun darí wachülürün Síria. Queíti taráriguágüdüba lan ugúnein lídan ubúругu le gíribei Tíro, ába warárirun ñi. ⁴ Áluaja wamútiña afíñetiña ja ñíbaña, ába weréderun sédü wéyu jáma ñi. Ába lawísaruniña Sífiri Sándu luágu lasúfuriruba lan Páblo Jerusalén, ába jaríñagun lun lun mídin lan. ⁵ Dan lásügürün sédü wéyu ligía, ába woúdin. Sun afíñetiña jáu jámarigu jáma jasáanigu, ñüdüntiña íchaajawa chülü boúgudi lueí ubúругu, ñi béyabu ába wájuduragun ayúmuragua lun Búngiu. ⁶ Ábati woúburagun woúngua jáma, ába wádinun tídoun ugúnein, jagía, ába jagíribudun jábiñoun. ⁷ Ába wagúmuchuni waweíyasun baránaja lúmagiñe ubúrugugiñe Tíro darí Tolemáida, le ñí lubei wabúsura joun afíñetiña, ába weréderun

ában wéyu jáma ñi. ⁸ Larúgan, ába láfuridun Páblo wáma, wagía le lúmabei, ába wachülürün ubúругu Cesaréa. Ñi wouúdin lúbiñe Felípe le apúrichijabalin ugánu luáguti Jesucrístu, ába gíñe jádaangiñe sédü wügüriña já meja anúadajoubaña Jerusalén lun jeténirun lun le jemégeirubei afíñetiña, ába weréderun lúma. ⁹ Gasáaniguti Felípe gádürü würiña irájüñü ja máfuridungiña, ibíja jamúti ubáfu lúmagiñe Búngiu lun ladímurejan jayúmulugugiñe. ¹⁰ Átiri wéyu wáu ñi, ligía lachülürün ában proféta Judéagiñe, gíriti Ágabo, ¹¹ liábiña aríjawa. Ába lanügüni lubélitin Páblo, ába lagüraguni lugúdi guánarü lúma lújabu láu, ába laríñagun.

—Laríñajare Sífiri Sándu luágu ítara lúba lan jagüraguni juríu labúreme bélitin le ubúругu Jerusalén, ábame jedéregeruní joun ja mámabaña juríu.

¹² Dan wagáambuni cátei le, wagía jáma Cesaréana, ába wayúmuragun lun Páblo lun mídin lan Jerusalén. ¹³ Ába laríñagun Páblo.

—¿Ca uágu jayájua, írudagüdána? Aráansetina mámarügü lun nagürawagún Jerusalén, aráansetina darí lun nouñwen lueígiñe Nabúreme Jesúsu.

¹⁴ Quei siñá wamani larítagun agáñeira, ába wígiruni, ába waríñagun lun ladügüniwa lugúndan Búngiu.

¹⁵ Dan le gumújali webélujan ñi, ába waráanserun, ába wouúdin Jerusalén. ¹⁶ Ñüdütiña jádaangiñe afíñetiña wáma Cesaréagiñe, ñíñein ában Chíprena jádan, gíriti Mnasón, lüjali lueígiñe lafíñerun luágu Jesucrístu, lúbiñeba wagánawa.

Bisída láani Páblo Jacóbo

¹⁷ Dan wachülürün Jerusalén, ába jerésibiruníwa afíñetiña láu ugúndani. ¹⁸ Larúgan, ába wouúdin lúma Páblo aríjei Jacóbo, ñíñanu gíñe sun tábutigu ligílisi Jerusalén. ¹⁹ Ába labúsurun Páblo joun, ába labájüdaguni sun cátei le ladügübei Búngiu lídaangiñe joun, jádan ja mámabaña juríu. ²⁰ Dan le jagáambunbalin ugánu le, ába jadímurejan luágu luweírigun Búngiu. Ábati jaríñagun lun Páblo.

—Wadúje, arijabásan, añájein sarágu mílu juríu afíñerutiña luágu Jesucrístu, áni sun jagía, aríñagatiña luágu lúnti lan lasígirúniwa lilúrudun Moisés. ²¹ Ariñawagúaaali joun luágu arúfudaja ban joun sun juríu ja aganoúbaña lídan jageíra ja mámabaña juríu lun madügün jamá gásu luágu lé meja lariñagubei Moisés, áni aríñaga bán nege joun lun merésibirun jamá jasáanigu circuncisión, mafála jameíme wagáburi, wagía juríu. ²² ¿Cábasan wadúga? Joúndaragubátia juríu dánme le jasúbudiruni luágu chülújadibu lan, lun jadügün wuríbani bun. ²³ Niján cátei le lúnbei badügüni. Añájein gádürü wügüriña ya wádan, gásu jagúnfulirun ában darádu lúma Búngiu. ²⁴ Barúbaña búmagua, ábame barúmadaguágüdün búngua jáma ligíbugiñe Búngiu según wagáburi, wagía juríu, fáyeibeíme le jagástarubei lun jagúnfulirun lúma jadáradun, lárigiñeme gayáraajalíme jásaragüdüni jádiburi. Ítara lúba jaríjini sun juríu luágu iyéeni lan le aríñawagúbei joun buágu, gúnfulirügütibu lan gíñe lúma lilúrudun Moisés quei lubúdubu. ²⁵ Ánjeinti jawágu ja mámabaña juríu áni afíñejaña luágu Búngiu, abürüjaadiwa joun lun madíjeri jamá

luágu buri cátei le, lúnrügü meígin jamá úwi le dagágüdawaali joun sándu, ni jítaü, ni anímaalu le tigiwarügüti, lun gíñe úa lan ni ában agámariduti würi to mamárieiduntu lúma.

Járügüdüni Páblo adáüra tídan témpulu

²⁶ Ábati lanügüniña Páblo gádürü wügüriña jagía, larúgan, ába larúmadaguagüdün lúngua jáma, ába lebélorun témpulurugun awísaja ídaba lan lagúmucha jawéyuri gádürü wügüriña jagía lun jarúmadun, léme lidáani jadágaragüdün cáda ában jádaangiñe lun Búngiu.

²⁷ Dan lé yebe yaráfaali lun lagúmuchun sédü wéyu ligía lubá lagúmuchun jarúmadun ligíbugiñe Búngiu, ába jaríjini jádaangiñe juríu Ásiana Páblo témpulurugu, ába jachágaraguágüdüniña gürígia. Ába járügüdüni Páblo, ²⁸ ába jagúaragun.

—¡Wügüriña Israelítagu, íderagua jumáwa! Niján wügüri le eíbugubalin sun fulásu arúfudaja joun sun gürígia wuríba luágu wanásiñun, luágu lilúrudun Moisés, lúma tuágu témpulu to, belúgüdaali gíñe gürígia ja mámabaña juríu témpulurugun awíyedei fulásu sándu le ligíbugiñe Búngiu.

²⁹ Jaríñagunbei ítara ladüga meja jaríjini Páblo ubúruгу lúma Trófimo le Éfesona, jarítaguatíñati luágu barülaani témpulurúgun.

³⁰ Ába jachágaragun sun lílana fulásu, ába jayábin gürígia eíbaagueina. Ábati járügüdüni Páblo, ába jadúruguduní bougudin tueí témpulu, ába jadáuraguni béna furése. ³¹ Busénjaña yebe jáfaruni jilágubei, ligía lachülürün ugánu lun gumándan luágu chagágujaña lan sun lílana ubúruгу Jerusalén.

³² Ábati loúndaraguniña gumándan lisúdaaranigu jáma jábutigu, ába lachülürün eibaagueina le ñíjin jabeí gürígia. Dan jaríjini gumándan jáma súdaaragu, ába lásurun jabeíchuni Páblo. ³³ Ábati layarafadun gumándan, ába lárügüdüni Páblo, ába lagüraguágüdüni láu bián güríngüri, lárigiñe, ába lálügüdajan cátei lan, lúma ca lan lidúnrunbei. ³⁴ Ámuñegueinarügüti cátei jaríñagun gürígia, siñátiti gunfaráanda lan gumándan ni cáta ladüga ireíni le jadügübei, ába lanügagüdüni jábiñoun súdaara. ³⁵ Dan le jachülürünbei luágu testépute múna, ába janügüni súdaara Páblo oúyuajeina lueí jáfaruni gürígia jilágubei, ³⁶ ladüga jayábiña súngebui jarígi agúarajeina.

—¡Jilála!

Ladímurejan Páblo lueígiñegua

³⁷ Dan lé yebe jádaraali lan Páblo múnadoun, ába lariñagun lun gumándan le jáubei súdaara.

—¿Gayáraati nadímurejan búma?

Ába lariñagun gumándan lun.

—¿Geréngaditibu güriégu? ³⁸ ¿Máma lubeí bugúya Ejíptona lé meja adügübei ában mabúchajaü luágu ában dan, ába lanügün gádürü mílu wügüriña gáfarajatiña lídoun fulásu mageírawaguti?

³⁹ Lariñagati Páblo lun.

—Máma áu, juríu áu, Társona, ában fulásu weíriguti Cilícia. Adügabá fuleísei nun lun bígirunina lun nadímurejan joun gürígia.

⁴⁰ Ába líchugun gumándan üma lun, ába laráramun Páblo luágu estépu, ába líchugun seíni láu lújabu joun gürígia lun jámanichun. Dan le manígaali, ába

ladímurejan joun lídan hebréo, le jerérun juríu, ába laríñagun.

22

¹—Nidújeñu jáma jagübürigu, agáamba jumeí le lúnbei naríñaguni jun nueígiñegua.

² Dan jagáambun ladímurejan joun lídan jerérun, ábatima jámanichaguágüdün. Ábati laríñagun joun.

³—Juríu áu, le gumúti, ubúru Társo louúbawagu Cilícia nagüriajouá, ya Jerusalén naweírda. Lábugiñe larúfudajan Gamáiel natúriaja, úarati larúfudajan lúma jalúrudun binádu wagübürigu. Jouchatina súnwandan lun nesériwidun lun Búngiu táu sun nanígi, queígubeirügü ligáburu jadügüni jugúya ugúñe wéyu. ⁴ Áu, eíbaaja numútiña meja lánigu Cristu darí náfaraguniña jilágubei, barügua áu wügüriña furísunrugun. ⁵ Geféenti fádiri íñutimaati jáu sun jábutigu juríu luágu rújama gárada nun joun wapaísanu ja Damáscobaña. Nñüdüntina ñi áluajaña afíñetiña luágu Cristu lun nanügüniña ñájoun lun nasúfuriragüdüniña.

Labájüdaguní Páblo luáguti lasáansiragun ligáburu

⁶ ‘Dan luáguñadina lubeí üma, yaráfaadina lun nachülürün Damáscu, queíburi amídirugu, sódini ligía ladúnraagun ában oúnwenbun larúgounga siélugiñe náu, ⁷ ába náburujan múarugun. Ába nagáambun laríñagun ában umálali nun. “Sáulo, Sáulo, ¿ca uágu beíbaajanina?” ⁸ Ábati naríñagun. “¿Cátabusan Nabúreme?” Laríñaga nun. “Jesúsu le Nazarétna áu, le méme beíbaajabei.” ⁹ Aríja jamúti ja úarabaña núma larúgounga ligía, ába janúfudedagun,

magáambun jamúti lumálali le adímurejabei nun. ¹⁰ Ábati nariñagun. “¿Cábagi nadüga, Nabúreme?” Ába lariñagun nun. “Sarába, beíba luágu buweíyasun Damáscoun, ñíba lariñawagúa sun le lúnbei badügüni bun.” ¹¹ Queíti maríjingüda láadina lubei buga larúgounga ligira, ába járügüdüni ja númabaña nújabu dari wachülürün Damáscou.

¹² Ñiñein ában wügüri Damáscou gíriti Ananías, gúnfuliti buídu lúma lilúrudun Moisés, sun juríu ja aganoubaña Damáscou adímurejatiña buídu luágu wügüri ligía. ¹³ Ába liábin Ananías aríjana, dan lachülürün, ába laráramun nubádu, ába lariñagun nun. “Nidúje Sáulo, ibíjayabei baríjin lárigoún.” Lídan méme óra ligía, ába léfegechun nágu, ába naríjini. ¹⁴ Ábati lariñagun nun. “Anúadaja láadibu Jabúngiute binádu wagübürigu lúmagiñe binárü lun basúbudiruni lugúndan, lúma lun baríjini Jesúsu le richáguabei, lun bagáambuni lumálali, ¹⁵ ladüga bíchuguba lan fe luágu Jesúsu joun sun gürígia, abájüdaguabeíme le aríja báalibei lúma le agáamba báalibei. ¹⁶ Guetóti, ¿ca uágu badárasaja? Sarába, badíseibá jeménigiñu luágu Wabúreme lun lachíbun bifígoun.”

Labájüdagun Páblo luágu loúnajoún apúrichija joun ja mámabaña juríu

¹⁷ ‘Dan nagíribudun ubúrugun Jerusalén, luágu ában wéyu dan le nídin témpulurugu ayúmuragua, ába lasáliragun Nabúreme Jesúsu nun, ¹⁸ ába lariñagun nun. “Furíba yágiñe Jerusaléngiñe, oúfuda, ladüga madügünbaña juríu gásu láu le baríñagunbei nuágu lídan fulásu le.” ¹⁹ Ábati nariñagun lun.

“Nabúreme, subúdi jamúti luágu ññüdü nán buri méja tídan sun jalígílisin afíñetiña anáajaña ja afíñebaña buágu furísunurugun, beí buri náña. ²⁰ Dan le láfarúnbei Estéban jilágubei, le bánigu lé meja adímurejabei buágu, ñíñadina, gúndaatina láu jáfaruni, áu oúnigirubárun janáangun ja áfarubalín.” ²¹ Ába laríñagun Nabúreme nun. “Beíba, ladüga nouñajadibu díse, apúrichija joun ja mámabaña juríu.”

Páblo lújaburugu gumándan

²² Agáamba jamúti chülü lúmoun ladímurejan luágu lídin apúrichija joun ja mámabaña juríu, ába jagúmeserun agúaraja.

—¡Áfara jumeí jilágubei! ¡Maríchatí lun labágaridun!

²³ Queíti jasígirun agúaraja, achüjoun buri janáangun, achüja calíqui íñun le jagáñi, ²⁴ ába laríñagun gumándan lun ladarúniwa Páblo jábiñoun súdaara, ába loúnajan abeíchei lun ladímurejan, lun lasúbudirúniwa ca lan uágu jagúaraja gürígia luágu ítara. ²⁵ Dan le gürágua jamáali lun jabeíchuni, ába laríñagun Páblo lun jábuti súdaara le ñíbei.

—¿Garíchatünsan lun jabeíchun ában wügüri Rómána, magúserunga ligía?

²⁶ Dan le lagáambuni jábuti súdaara cátei le, ába lídin aríñaga lun gumándan.

—Toúnigibátia láu le lúnbei badügüni, Rómanatia wügüri le.

²⁷ Ábati lídin gumándan luágun Páblo, ába laríñagun lun.

—¿Inárüni luágu Rómána ban?

Laríñaga Páblo lun.

—Ánja.

²⁸ Ábati laríñagun gumándan.

—Fáyeitina sarágu seínsu lun Rómana nan.

Laríñaga Páblo.

—Ánjein áu, ñi nagüriajóua.

²⁹ Ába jígiruni já yebe lúnbei jabeíchuni furése, liábin gíñe gumándan, dan le lasúbudiruni luágu Rómana lan Páblo, ába lanúfudedagun lueígiñe lagüraguni.

Páblo jagíbugiñe lúrudugu juríu ja íñutimáabaña

³⁰ Larúgan, busénti gumándan lasúbudiruni ca lan lidúnrunbei Páblo jarúma juríu, ába lagídaruni güríngüri lueí, ába loundaraguágüdüniña jábutigu fádirigu jáma lúrudugu juríu ja íñutimáabaña, ábati laságaruni Páblo, ába líchuguni jagíbugiñe.

23

¹ Ába laríjin Páblo jawágun lúrudugu jagía, ába laríñagun joun.

—Nidújeñu, jarúmati nasándiragun núngua ligíbugiñe Búngiu chülü lúmoun wéyu le.

² Ábati louñajan Ananías, fádiri le íñutimaabei, lun jagáyuajan ja yaráfabaña ñi luágun liyúma Páblo.

³ Ába laríñagun Páblo lun.

—¡Lagáyuajaba Búngiu buágu, biángua tigíbu bugúya le! Ñun bíña ñi lun bagúseragüdüniña quei laríñaguni lúrudu, ¿cáti uágu bagáyuagüda nuágu, adúraaguei lúrudu?

⁴ Ába jaríñagun ja níbaña lun.

—¿Ítara liñásan banábuni fádiri le íñutimaabei le láni Búngiu?

⁵ Ába lariñagun Páblo.

—Nidújeñu, ibídiñetí yebe nun luágu fádiri lan le íñutimaabei, ladüga tariñajare Lerérun Búngiu. “Madímurejaanbadibu wuríba luágu ában agúmadijati bageíra.”

⁶ Subúdi lumúti Páblo luágu jánigu lan saduséogu jíbiri ja ñíbaña, jíbiri, jánigu fariséogu, ába lariñagun láu umálali jéreti.

—Nidújeñu, fariséo áu, jádaangiñetiña fariséogu nagübürigu, áni jagúseragüdüñadina ladüga afíñe nan luágu jásaaruba lan jiláaña lídaangiñe ouweni lúnya jabágaridun.

⁷ Dan le lariñagunbálin cátei le, ába jagúmeserun fariséogu jáma saduséogu asígeneja jámagua, ába lafánreinragun adámurini. ⁸ Ladüga jariñajare saduséogu luágu másaarunbaña lan jiláaña lídaangiñe ouweni, úatiña nege gíñe ánjeligu, ni espíritugu, ánjañati fariséogu, afíñetiña luágu sun cátei le. ⁹ Jareínchati súngubei, ába jásaarun jádaangiñe arúfudajatiña lilúrudun Moisés ja ñíbaña, áni fariséogu gíñe jagía, ába jariñagun.

—Wügüri le, úati ni cáta wuríbati ladüga, áni ánjeindügü ában lubeí espíritu adímurejabei lun o ában lan ánjeli, toúnigi wamátia lueí wadárirún oucha weréderuni luwádigimari Búngiu.

¹⁰ Weírjali sigénei darí lun lanúfudedun gumándan lueí jáfaruni Páblo jilágubei. Ábati louñajaniña lisúdaaranigu lun jaságaruni Páblo lídaangiñe adámurini lúnya janügüni jábiñoun súdaara.

¹¹ Le ában árieibu, ába lasálriragun Wabúreme Jesúsú lun Páblo, ába laríñagun lun.

—Manúfudebá, Páblo, ladüga ítara quei rújadibu lan fe nuágu ya Jerusalén, bíchuguba giñe fe nuágu, Róma.

Aráansejaní lun láfarúniwa Páblo jilágubei

¹² Larúgan, ába jebélurun juríu lídoun úarani lun jáfaruni Páblo jilágubei, ába jaríñagun láu íñaraguni ligíbugiñe Búngiu luágu meíginbaña lan, mátun jagíame ni cáta darí jáfaruni. ¹³ Jougiñe bián-wein wügüríña ja aríñagubalin cátei le. ¹⁴ Ábati jouđin jámoun jábutigu fádirigu lúma jámoun wügüríña weirigutiña jádan juríu, ába jaríñagun.

—Aríñagaadiwa láu íñaraguni luágu meíginbadiwa lan ni cáta darí wáfaruni Páblo jilágubei. ¹⁵ Guetóti, jugúya jáma ja jíbiri lúrudugu íñutimaatiña amúriaja jumá lúma gumándan lun lanügüni jun jarúga, jaríñagame lun luágu lun lántima jálügüdüni luágu dúru le rúwaalíbei luágu jabúseera jaríjini. Wagía, aráanseñu wába lun wáfaruni lubáragiñe lachülürün.

¹⁶ Ába lachülürün cátei le lábun lagáambun tiraü lítu Páblo, ába lídin jábiñoun súdaara asúbudiragüdei lun Páblo. ¹⁷ Ábati lagúarun Páblo lun ában jádaangiñe jábutigu súdaara, ába laríñagun lun.

—Barübei irájü le lúmoun gumándan, níjein cátei lun laríñaguni lun.

¹⁸ Ába lanügüni jábuti súdaara lúmoun gumándan, ába laríñagun lun.

—Wáti adaürüti Páblo nun, ába lamúriajan núma lun nanügüni irájü le bun ñájoun, níjein nege cátei lun laríñaguni bun.

19 Ába lárügüdüni gumándan lújabu irájü ligía, ába lanügüni lun jábugua jamá, ába laríñagun lun.

—¿Ca babúseerubei baríñagun nun?

20 Ábati laríñagun irájü ligía lun.

—Belújaña juríu lídoun úarani lun jamúriajan búma lun banügüni Páblo jagíbugiñoun lúrudugu íñutimaatiña lún nege jálügüdünitima luágu lidúnrun. 21 Mafíñerabá joun, añájein jóugiñe bián-wein jawügüriña arámudagu jabá úmada agúrabajei lun jáfaruni jilágubei. Aríñagaaña láu íñaraguni ligíbugiñe Búngiu luágu meíginbaña lan, mátun darí jáfaruni Páblo, guetó aráanseñu jáña, jagúraba rügüñein boúnabagüle.

22 Ábati loúnajani gumándan irájü ligía águyu, aríñageina ligía lun lun maríñagun lan ni ca un luágu abájüdagua láali lan cátei le lun.

Loúnajoún Páblo lun gumádimati le Félix

23 Ába lagúarun gumándan joun bián jádaangiñe jábutigu súdaara, ába laríñagun joun lun jaráanserun bián-san súdaara lun jóudin Cesaréa eibu, úara jáma ürüwa-wein-díisi ja jawágutiña gabáyu, jáma bián-san ja táutiña efeín, lun jóudin ladaúnrun néfu gúñoun. 24 Aráansegüdáti gíñe gabáyu lun laweínjaniña Páblo, ru ligía dimúrei lun jachülüragüdüni Páblo lúmoun gumádimati Félix láu magádiei. 25 Oúnajati ában gárada jáma, laríñajare tídan gárada tugúya.

26 “Lúmagiñetu Cláudio Lisías lun gumádimati Félix le weírigubei, mábuga níña bun. 27 Niján wügüri le, le noúnajabei bun, daújamaali yebe juríu áni jáfaraali yebe jilágubei, dan le

nasúbudirúnbalin luágu Rómana lan, ába nídin jáu nisúdaaranigu, ába neséfuruni. ²⁸ Queíti nabúseerun nasúbudiruni ca lan lidúnrunbei jarúma, ába nanüğüni jagíbugiñoun lúrudugu juríu íñutimaatiña. ²⁹ Lidúnrun jarúma luáguti buri cátei le luáguti jalúrudun, úati iríchaü lun láfarún jilágubei, ni íbini lun ladaürün. ³⁰ Quei lachülürün lábun nagáambun luágu jaráansejaña lan juríu lun jáfaruni jilágubei, ligía lébubei noúnajani bun madárasajaanga. Aríñagaadina gíñe joun ja íchugubaña lidúnrun lun búma lan jaráanserei le jánibei lúma.”

³¹ Ábati janüğüni súdaara Páblo quei laríñawagúniwa joun, áriebu, chülü Antípatris. ³² Larúgan, ligía jagíribudun súdaara ja eíbubaña, súdaara ja jawágubaña gabáyu, ába jasígiruni jaweíyasun láu Páblo. ³³ Dan le jachülürünbei Cesaréa, ába jedéregerunun gárada lun gumádimati, derége jameí gíñe Páblo. ³⁴ Lárigiñe lalíjanun gumádimati gárada, ába lálügüdajan jalíana lan Páblo, dánti le lasúbudirúnbalin luágu Cilíciana lan, ³⁵ ába laríñagun lun.

—Nagáambubadibu dánme le jayábin ja íchugubaña bidúnrun.

Ábati líchugun dimúrei lun líchugúniwa Páblo tídoun palásiu tó meja lábunaguboun Heródes, jáu oúniri.

24

Ladímurejan Páblo lueígiñegua ligíbugiñe Félix

¹ Seíngü wéyu lárigiñe, ába lachülürün Ananías, fádiri le íñutimaabei, ubúrugun Cesaréa jáu wüğüriña jádaangiñe juríu weírigutiña, lúma ában

wügüri le subúdíjabuti lun lúruđu, gíríti Tértulo. Ába jayábin lúmoun gumádimati lun jíchugun lidúnrun Páblo. ² Dan le lanügüniwa Páblo jagíbugiñoún, ába lagúmeserun Tértulo íchiga lidúnrun, laríñaga.

—Luágu bareíni, gumádimati, lújadiwa láu darángilaü ya wageíra, buíti leíbugun sun cátei ya fulásurugu súnwandan lábugiñe lichú báu. ³ Ibíja wamúti sun le, áni teínqui wamútibu luágu. ⁴ Lun magídarun wamáni bidáani sarágu, amúriajatina búma lun badügün murúsun fuleísei woun lun bagáambuniwa luágu murúsun óra. ⁵ Niján wügüri le Páblo, beréseti, lerédera afánreinraguagüdaña juríu lídan sun fulásu, ligía gíñe ában jádaangiñe lichügüdinabei jadámurin nazarénugu. ⁶ Álugati gíñe lawíyedagüdünun témpulu ligíbugiñe Búngiu láu lebélaagüdün ában wügüri le mámabei juríu tídoun. Ába wárügüdüni, ába yebe wabúseerun wagúseragüdüni láu ligáburu walúrudun, ⁷ ába leméterun gumándan Lísias ñíjin, ába lagídaruni waweí láu érei, ⁸ ába laríñagun luágu ja lan íchugubaña lidúnrun lúnti lan jayábin búmoun. Gayáraati bálügüdaguni Páblo, subúdi bámugei inárüni luágu sun cátei le, le waríñagubei luágu.

⁹ Juríu buri ja ñíbaña, aríñagatiña gíñe luágu inárüni lan sun le laríñagubei Tértulo. ¹⁰ Ába ladügün gumádimati seíni lun Páblo lun ladímurejan, ában laríñagun Páblo.

—Lau sun nugúndan nadímureja nueígiñegua bigíbugiñe ladüga subúdi náani luágu lúmagiñe lan sarágu irúmu bagúseragüdajan lídan fulásu le. ¹¹ Gayáraati bálügüdajan ánjein inárüni lubeí le lúnbei naríñaguni bun. Dúsurügügili wéyu

lueígiñe nachülürün ubúrugun Jerusalén lun nájuduragun lun Búngiu, ¹² madárirúnwatina asígeneja ni ca úma, ni achágaraguágüdaña gürígia témpulurugu, ni tídan buri tíbiri jalígilisin juríu, ni lídan buri ámu fulásu ubúrugú. ¹³ Gürígia ja, siñáti jarúfuduni luágu inárüni lan ni ában lídaangiñe sun cátei le jariñagubei nuágu. ¹⁴ Ában cátei nariñagubei bun, luágu nesériwiduña lan lun Jabúngiute nagübürigu quei larúfudajani Jesucrístu, le uágubei jariñaga luágu marícha lan. Afíñetina luágu sun le bürüwañubei tídan buri líburu to lánina lilúrudun Moisés lúma lé meja jabürújabei profétagu. ¹⁵ Níjein gíñe eménigini le jawágubei nuágu luágu Búngiu, luágu lásaaragüdübaña lan jiláaña, dándu ja buídubaña quei ja wuríbabaña. ¹⁶ Ligía náfaagunbei súnwandan lun madúnrun nan ligíbugiñe Búngiu lúma jagíbugiñe gürígia.

¹⁷ ‘Lárigiñe átiri dan náu eíbugei ámu buri fulásu, ába nagíribudun nageíroun lun nedéregerun seínsu joun gudémetiña Jerusalén lúma lun nadágaragüdün lun Búngiu. ¹⁸ Nadügüñein yebe cátei le témpulurugu lárigiñe narúmudaguagüdün núngua quei le igáburi, ligía jadárirunina átiri juríu loubawaguna Ásia ñi témpulurugu, úatiña sarágu gürígia ñi, ni chagáguau. ¹⁹ Jagía lúnbaña jayábin arúfudagua jóungua ya lun jariñaguni le lúnbei jariñaguni ánjein níjein lubeí lúnti jariñaguni nuágu, ²⁰ jariñaguni lan ja yábaña ánjein darí jabei nidúnrun dan le ligíbugiñe nubeí líñun-ágei lúrudu juríu. ²¹ Siñáti jariñagun ni cáta nuágu, lueídügüya luágu lan ában wéyu dan le jádaañadina lubeí, ába nagúaragun aríñaga. “Jagúseragüdüñadina

ugúñe lueígiñe afiñe nan luágu jásaaruba lan jiláaña lídaangiñe oúweni lúnya jabágaridun.”

²² Subúsi sarágu luágu larúfudajan Jesúsu lun gumádimati Félix, itara líña, dan le lagáambunbalin le laríñagunbei Páblo luágu jásaarun jiláaña, ába lagúmuchaguagüdüni adámurini, aríñageina ligía.

—Nagúseragüdübei wügüri le dánme le lachülürün gumándan Lisías.

²³ Ábati laríñagun Félix lun jábuti súdeara lun lasígirun Páblo daüwañu, lun furáangu lan lun gayára lan jóudin lumádagu aríjei, eténira lun.

²⁴ Átiri wéyu lárigiñe, ábaya lachülürün Félix túma Drusíla to lúmari, to juríu, ubúrugun Cesaréa, ába lagúaragüdüni luágu Páblo lun ladímurejan lun luágu Jesucrístu. ²⁵ Dan le ladímurejaanbei Páblo lun luágu ibágari le surúbei, lúma luágu ágüdaagúni únguaü lueí le wuríbabei, lúma luágu wéyu le lúnbei lagúseragüdüniña Búngiu sun gürígia, ába lanúfudedagun Félix, ába laríñagun lun.

—Beíba yebe, dánme le gadáani nan, nagúarayaba bun.

²⁶ Agúrabatí yebe giñe Félix lun líchugun Páblo seínsu lun lúgiragüdüni, ligía, dan méme lubeí wájali luágu lun layánujan lúma. ²⁷ Sügüti bián irúmu itara, ábati lagúmuchun lagúmadijan Félix, ába lárügüdüni Pórcio Fésto lufúlasun. Queíti busén lan Félix leréderun buídu jáma juríu, ába lígiruni Páblo daüwañu.

25

Páblo ligíbugiñe Fésto

¹ Ábati lachülürün Fésto lun lárügüdüní lufúlasun queísi gumádimati, ürüwa wéyu lueígiñe, ába lamúdeirun Cesaréagiñe lun ubúrugun Jerusalén.

² Ába jachülürün jábutigu fádirigu ñíjin jáma juríu ja weírigutimaabaña íchiga lidúnrun Páblo ligíbugiñe Fésto. ³ Ába jamúriajan fuleísei lúma lun loúnajan anügei Páblo Jerusalén. Le jaráansejanbei, lún yebe jáfaruni jilágubei luágu üma. ⁴ Ába loúnabun Fésto luágu Cesaréa lan ladaürüwa Páblo, áni jarítaqua lan lídin ñi madíse. ⁵ Ába laríñagun joun.

—Ligía lúnti lubei jóudin ja weírigutimaabaña jídaangiñe Cesaréa úara núma, áni ánjein adúgaali lubei wügüri ligía dúru, gayáraabei jaríñaguni.

⁶ Wídü rügüñein o díisi lan wéyu láu Fésto Jerusalén, ába lagíribudun ubúrugun Cesaréa. Larúgan, ába lárügüdüní lufúlasun lun lagúseragüdün, ába loúnajan luágu Páblo. ⁷ Dan le lebelürunbei Páblo, ába jagúriridágun juríu ja ñübinbaña Jerusaléngiñe láu, ába jíchugun sarágu lidúnrun le jürüti, áni siñáti jarúfuduni luágu inárüni lan ni cáta lídaangiñe le jaríñagunbei. ⁸ Ábati laríñagun Páblo lídan ladímurejan lueígiñegua.

—Madügüngidina ni murúsun dúru ni lun jalúrudun juríu, ni tun témpulu, ni lun urúei César.

⁹ Queíti busén lan Fésto leréderun buídu jáma juríu, ába laríñagun lun Páblo.

—¿Buséntibu bídin Jerusalén lun nagúseragüdünibu ñi?

¹⁰ Ába loúnabun Páblo.

—Ligíbugiñeñadina lagúseragüle urúei César, le ñí lubei lúnti lan nagúserún. Queísi basúbudiruni buídu, madügüngidina dúru joun juríu. ¹¹ Ánjein

adügaadina lubeí dúru le garíchati lun nafarún jilágubei lueígiñe, mebérésegúntina noúnwen, ánjein úa lubeí ni cáta lánina inárüni lídan sun le aríñawagúbei nuágu, úati ni ában garíchati lun ledéregerunina joun juríu. Amúriajatina lun César lan agúseragüdána.

¹² Lárigiñeti layánujan Fésto jáma lánigu cába lan ladüga láu Páblo, ába laríñagun lun.

—Amúriajaadibu lubeígia lun César lan agúseragüdabu, beíbugati lun César.

Páblo ligíbugiñe urúei Agrípa

¹³ Átiri wéyu lárigiñe, ába lídin urúei Agrípa túma Bereníce Cesaréa aríjei Fésto. ¹⁴ Quei reídei jabeí átiri wéyu ñi, ába labájüdaguni Fésto luáguti lagúserun Páblo lun urúei Agrípa, laríñaga lun.

—Níjein ában wügüri lígirun Félix dáüwañu ya. ¹⁵ Dan le Jerusalén nubeí, rútiña jábutigu fádirigu jáma wügüriña juríu weírigutiña lidúnrun nigíbugiñe, amúriajatiña núma lun nasíadiruni.

¹⁶ Ába naríñagun joun luágu magáburi láani lúrudu Rómata lun lasíadirun ában gürígia lun ouweni maríjinga láña ja íchugubaña lidúnrun ligíbugiñe, lun gayára lan ladímurejan lueígiñegua. ¹⁷ Ligía, lídan lubeí le jayábinbei ya úara núma, meféridirúntina dan, larúgan, ába nárügüdüni nufúlasun lídan agúseragülei, ába noúnajan luágu wügüri ligía. ¹⁸ Ja ñübinbaña lun jíchugun lidúnrun, maríñaguntiña ni cátei luágu lídaangiñe lé yebe uágubei narítaqua. ¹⁹ Lé buri cátei le jaríñagubei luágu, luágu múaradun lán nege jáma luágu ligáburi jafíñen, lúma luágu ában nege wügüri gíriti Jesúsu—jiláti nege, laríñajare Páblo luágu wínwanya lán nege. ²⁰ Queíti ibídiñe

lan nun cába lan nadüga lídan ában cátei líbe le, ába nálügüdüni Páblo ánjein busén lubei lídin Jerusalén lun lagúserún luágu cátei le ñi. ²¹ Quei lamúriajan lun urúeiba lan Augústo César agúseragüdeí, ába nariñagun lun lasígirun dáüwañu daríme gayára lan nouñajani lun Augústo César.

²² Ábati lariñagun Agrípa lun Fésto.

—Buséntina giñe nagáambuni wügüri ligía.

Ába lariñagun Fésto lun.

—Bagáambubei jarúga.

²³ Larúgan, dan le jachülürünbei Agrípa túma Bereníce, ába jebélurun láu oúnwenbun uweíriguni múnadoun, jáma jábutigu súdaara jáma wügüriña weírigutiña ñi ubúru. Ába loúnajan Fésto luágu Páblo, ²⁴ ába lariñagun.

—Urúei Agrípa, jáma wügüriña ja adámurigubaña wáma ya, niján wügüri le. adímurejaaña sarágu jádaangiñe juríu wuríba nun luágu, dándu Jerusalén quei ya Cesaréa, áni añájagua aríñaga nun láu sarágu éregu luágu lúnti lan loúnwen. ²⁵ Laganoún nun camá madügüngili ni cáta le lúnti lafarún jilágubei lueígiñe, áni queíti ligía guánarügü lan amúriajabei lun urúeiba lan Augústo César agúseragüdei, nouñajaali lun. ²⁶ Queíti úa lan cába lan cátei uágu nabürüja lun Augústo luágu wügüri le, ligía nanügübalin jigíbugiñoún, bigíbugiñoúntimá urúei Agrípa, lun bálügüdaguni, niñein lámuga cába lan nabürüja. ²⁷ Ladüga garábaguati nun lun nouñajan ában adaürüti, mawísajaanga áu ca lan lidúnrunbei.

26

Ladímurejan Páblo lueígiñegua ligíbugiñe urúei Agrípa

¹ Ábati laríñagun Agrípa lun Páblo.

—Gayáraati badímurejan bueígiñegua.

Ába liñúruni Páblo lújabu lun jagáambuni, ába lagúmeserun adímureja, ába laríñagun.

²—Oúnwenbun nugúndan gayára lan nadímurejan nueígiñegua bigíbugiñe, urúei Agrípa, luágu sun cátei le aríñaga jamáalibei juríu nuágu, ³ gúndaatimatina ladüga subúdi báni jagáburi juríu lúma cátei lé buri uágubei jasígeneja. Ligía namúriajanbei búma lun gagúraasun ban lun bagáambunina.

Labájüdaguni Páblo binádu libágari

⁴ ‘Subúdi jamúti sun juríu ligáburi meja nabágaridun jádan, nageíra lúma ubúругu Jerusalén, lúmagiñe irájügídina. ⁵ Lüja jasúbudirunina, áni gayáraati jamúga jaríñaguni ánjaña jamúga busén luágu fariséo lan nugúya lúmagiñe niñúraü, adámurini létima derégüdabei lídan luwúyeri wafíñen, wagía juríu. ⁶ Guetóti, jagúseragüdüñadina luágu eménigini le nuágubei, luágu lásaaragüdübaña lan Búngiu jiláaña lídaangiñe ouweni lúnya jabágaridun, queí meja laríñaguni joun binádu wagúbürigu. ⁷ Dúsusugubei familia le jadügawagunbei lirájüñü Israél agúrabatiña jaríjini lagúnfulirun dimúrei le, ligía jájuduragunbei lun Búngiu, seríwi jameí wéyuagu, áriebu. Lueígiñe méme eménigini le, jadárira juríu nidúnrun, urúei

Agrípa. ⁸ ¿Mafíñetün funági luágu gayára lan lásaaragüdüniña Búngiu jiláaña?

Labájüdagun Páblo luágu meja leíbaajaniña afíñetiña

⁹ ‘Nugúya guánarügü, jarítaguatina méja luágu lúnti lan neíbaajaniña ja afálarunbalin Jesúsu Nazarétna, ¹⁰ áni ítara líña nadügüni ubúru gu Jerusalén. Láu ubáfu le jíchugubei jábutigu fádirigu nun, dátina sarágu jádaangiñe lánigu Búngiu furísunrugun, áni dan lé buri jasiádirúniwa lun jóunwen, nugúya ában jádaangiñe ja abúdujabaña lun ítara lúba lan. ¹¹ Níjeinja dan, súfurigüda numútiña lún yebe jeyéedagun luágu jafíñen luágu Jesucrístu. Adáagua numúti meja cátei le tídan sun jalígilisin afíñetiña, áni weíríti meja nigáñi joun darí lun neíbaajaniña chülü lídoun buri ubúru gu le díseti.

Labájüdagunya Páblo luágu lasálbarun

¹² ‘Ligía yebe cátei le gabügürübalina ubúrugun Damáscó ában dan, jóunajan jábutigu fádirigu. ¹³ Luágu üma, nurúeite, amídirigu, ába naríjin ában larúgounga siélugiñeti, jéreti sügü lau larúgounga wéyu, ába ladúnraagun geyégua náu jáu sun ja úarabaña núma. ¹⁴ Súngubei wagía, ába wáburujan múarugun, ába nagáambun ában umálali aríñaguti nun lídan hebréo, le jerérun juríu. “Sáulo, Sáulo, ¿ca uágu beíbaajana? Basúfuriraguagüdüñatia búngua láu bamánjarun nun quei ladüga bágasu dan le líchaagun quíqui luágun cátei gágiriti.” ¹⁵ Ábati naríñagun. “¿Cátabusan, Nabúreme?” Ába laríñagun nun. “Jesúsu áu, le guánarügü beíbaajabei. ¹⁶ Sarába, ráramabá, ladüga narúfudagunbei núngua bun

lun besériwidun nun, lun geféen ban luágu le aríja báalibei guetó lúma le lúnbei narúfuduni bun. ¹⁷ Neséfurubadibu jaweí juríu lúma jaweí ja mámabaña juríu, ja únbaña nouñajabu guetó. ¹⁸ Nouñajañadibu jámoun lun béfegechagüdüni jágu nuágu, lun jebé lan jeíbugun lídan lubúriga, lun jeíbugun lídan larúgounga, lun gíñe meréde méme jamá lábugiñe lubáfu Máfia, lun lábugiñe jamá lubáfu Búngiu. Nouñajañadibu joun, affíñe jamámuga nuágu, ferúdunawa lámuga jafígoun, ibíja jamámuga alágan jádan ja jarúmagüda láañabaña Búngiu láu jafíñerun nuágu.”

Labájüdagun Páblo luágu luwádigimari

¹⁹ ‘Ítara líña lubeíti, urúei Agrípa, ába nadügüni le laríñagunbei Jesúsu nun lídan le lasálruginbei nun. ²⁰ Furúmiñe, ába napúrichijan joun ja Damáscobaña, aríñagatina joun lun jaságürijan luágu jafígoun, lun jagíribudun lun Búngiu, lun jadügün cátei buíti, arijúa lámuga luágu sáansiguaali lan jagáburi. Lárigiñe, ába napúrichijani cátei méme le joun ja Jerusalénbaña, ja mámabaña juríu. ²¹ Ligía lébubei járügüdünina juríu témpulurugu, ába jálugun jáfarunina jilágubei. ²² Ába líderagunina Búngiu, ítara líña gayára lan nasígirun íchiga fe luágu Jesúsu lan Crístubei joun sun gürígia, dándu ja weírigubaña queísi ja únabugubaña, chülü lúmoun óra le. Maríñaguntina ni cáta joun gürígia bougudin lueí le uágubei jaríñaga Moisés jáma profétagu luágu lasúsereduba lan — ²³ luágu lúnti lán meja lasúfuriruba lan Crístu, luágu lárigiñe lánme louñwen, ligíaba lan furúmiñeti ásaaruti jádaangiñe jiláaña láu ibágari magúmuchaditi, luágu

gíñe líchugubei lan larúgounga luáguti asálbaruni dándu joun juríu quei joun ja mámabaña juríu.

Láfaagun Páblo lun lafiñeragüdüni Agrípa luágu Jesucristu

²⁴ Lídan le lariñagunbalin Páblo cátei le buri lídan ladímurejan lueígiñegua, ába lagúaragun Fésto.

—¡Lülüjaali báu, Páblo! Lülügüdá sarágu atúriajani báu.

²⁵ Ába louñabun Páblo, ába lariñagun.

—Málülünti náu, gumádimati, inárüni le nariñagunbei. ²⁶ Niján urúei Agrípa le subúdijabúbei lún buri cátei le buídu, ligía gayára lubei nadímurejan ligíbugiñe, furáangu, ladúga choúru náni luágu subúdi láani gíñe sun cátei le asúseredubei lun Jesúsu, ladúga máma cátei le adügüti arámudaguarügü. ²⁷ ¿Afiñetibu luágu le jariñagubei profétagu, urúei Agrípa? Subúdi numúti luágu afiñe ban.

²⁸ Ába lariñagun Agrípa lun.

—¿Jarítaguatibusan luágu bafiñeragüdübadina lan luágu Jesucristu ítara ufúresen?

²⁹ —Furése yébe, o darása yébe, amúriajatina lúma Búngiu, mámarügü buágu, jawágu gíñe sun ja añájabaña agáambana ugúñe, lun jayábin lun jafiñerun quei nugúya, úouga güringüri jawágu.

³⁰ Lárigiñe lariñaguni Páblo cátei le, ába lásaarun urúei, sará gíñe gumádimati úara túma Berénice jáma sun ja núnbaña ñi, ³¹ ába jadíñurun ñigiñe lun jadímurejan luágu cátei le. Jariñagatí buri jámagua.

—Wügüri le, madügünti ni cáta le lúnti lafarún jilágubei lueígiñe, moún lumuti ni íbini leréderun furisunrugu.

32 Ába lariñagun Agrípa lun Fésto.

—Lun jamúga mamúriajan lan wügüri le lun lagúseragüdüni Augústo César, gayáraati jamúga lígirawagüdüñ.

27

Loúnajoún Páblo ubúrugun Róma

1 Lídan le jaráanserunbei lun joúnajaniwa Itálioun, ába ledéregerún Páblo jáma ja jíbiri adaürütiña lábu larijin ában súdaara gíriti Júlio, ligía gumándanbei lun jadámurin súdaara le gíribei “lísúdaaranigu Urúei Augústo.”

2 Ába wádinagun tídoun ában ugúnein ñübintu Adramítioigiñe lun Ásioun. Níñein giñe Aristárco wáma, le Tesalónica, Tesalónica ában ubúругu láni Macedónia.

3 Larúgan, ligía wachülürün Sidón, lídan fulásu ligía, buíti louseruni Júlio, le gumándan, Páblo, ígira lumúti lun bisída lániña lumádagu lúma lun jeténirun lun.

4 Lídan wáfuridun Sidóngiñe, ába wouidin ünabugiñe libíti ubouju Chípree ladüga wabánrouñein lan garábali.

5 Ába wájiñuraguni barána ligíbugiñe lubéyaari Cilícia lúma Panfília, ába wachülürün lídoun fulásu le gíribei Míra, ában ubúругu láni Lícia.

6 Ñi ladárira gumándan ában ugúnein Alejandríaana teíbuga Itália, ába ládinagüdüniwa lun wasígiruni waweíyasun.

7 Áfayajatiwa jámaru luágu sarágu wéyu, láu lénreengun wachülúra ligíbugiñe ubúругu le gíribei Gnído. Queíti wabánroun mémegili lubeí garábali, ába wáfayajan ünabugiñe libíti ubouju Créta, sügüína wagía ligíbugiñe Salmón,

8 wasígira láu méme lénreengun láru láru,

ába wachülürün lídoun ában ubúругu gíriti Buíti Fulásu, yaráfa lun ubúругu Laséa.

⁹ Féridijadiwa sarágu dan, dénychajaliti áfayajani baránaja ladüga yaráfaali lidáani luríbouga, sügüjali jafédun juríu le lánina ferúdun figou. Ligía lewéridirunbaliña Páblo, laríñaga joun.

¹⁰ —Aríja numúti luágu denchábei lan weíyaasu le, áni weféridiruboun ugúnein, féridime sun tíla, gayáraabei gíñe weféridiruni wabágari.

¹¹ Lubáragiñe ladügün gumándan gásu láu le laríñagunbei Páblo, ába lídin láu le lubeíbei tabúreme ugúnein lúma le abúgajabei. ¹² Queíti mabuídun lubeí fulásu ligía lun lásügürün luríba dan ñi, ába jarítangun jíbe-ágei luágu buídutima lán yebe lun wáfuridun ñígiñe, lun waríjin ánjein gayára wachülürün Feníce, ában fulásu láni ubouju Créta, lun wásügürüni luríbaniga ñi. Ñi Feníce, níjein barána lueígiñe núru lúma suédi.

Luríba dan baránaja

¹³ Queíti lagúmeserun suédi jámaru, ába jarítangun luágu gayáraabei lan jasígiruni weíyaasu, ábati joudin, ába jasígirun láru láru Créta. ¹⁴ Málüti lueígiñe jáfayarun, ába láfurun ában nodísi jéreti, ¹⁵ ába lagúmeserun abánrenjoun ugúnein. Queíti siñá lan wawáanserun lubároun garábali, ába wígiraguágüdün woúngua lun lanügüniwa. ¹⁶ Ába wásügürün ünabugiñe libíti ában liraúraü ubouju gíriti Cláuda, le ñí lubei mére lan láfujan garábali, ába wádinagüdünun tisálufun wagúne to atoújeina wabouñ, láu ában lénreengun. ¹⁷ Lárigiñe wiñúrunun ugúneirugun, ába lásügüragüdüniwa gúrudu tábugiñegiñe ugúnein lun jagüragunun, derébugu

támuga. Queíti janúfudebei lueí jóudin adágara luágu sándala le gírubei Síрте, ába jagídaraguní bíra, ába jígiraguagüdün jóungua lun lanüğüniwa garábali. ¹⁸ Larúgan, quei jére mémegili lubeí dan, ába jagúmeserun achágajei tíla ugúnein baránajoún, ¹⁹ luágu lürüwan wéyu, ába jachágajani lídaangiñe tumégegungugúnein baránajoún láu jájabu guánarügü. ²⁰ Maríjintiwa wéyu ni warúguma lídan sarágu wéyu, láuti oúnwenbun luríban dan le, féridi wamáali wafíñen luágu weséfuruba lan.

²¹ Queíti sügüjadiwa lubeí sarágu dan meíginga, ába laráramun Páblo wádan, ába laríñagan.

—Wügüríña, aríñagatiná yebe jun lun mayábin wamá Crétagiñe, buídutimaati jamúga lueí wasúfuriruni dáñu le, áni féridi wameí wálagu. ²² Gagúraasun jumá, úabei ni ában jídaangiñe ouweti, láu sun teféridiruba lan ugúnein. ²³ Chülüjali ában láni Búngiu ánjeli númoun áriebu to, loúnagüle Búngiu le Nabúreme le gíñe únbei nesériwida, ²⁴ laríñajare ánjeli ligía nun. “Manúfudedabá, Páblo, ladüga barúfudaguba búngua ligíbugiñe urúei César Augústo, áni badügaba leséfuraña Búngiu sun ja tídaanbaña ugúnein búma lueí ouweni.” ²⁵ Gagúraasun jumá lubeíti, ladüga jeménigitina luágu Búngiu, áni chouúru numúti luágu ítara lúba lan quei laríñaguni ánjeli luágu nun, ²⁶ láu sun, wadágaruba lan luágungun ában ubóuju.

²⁷ Bián dimáasu wáu luágu waweíyasun, lubáranarugúñadiwa Ádria, labánreinja mémehadiwa garábali, ligía, amídi áriebu, ába jasándirun mádulungu luágu achülüreina wáña lan luágungun múa.

²⁸ Ába jamísurajani lujúlilin dúna, san-wein ugúdi

lujúlilin, ábaya jamísurajan jabáruaguóún mémeraü, gádürü-wein-díisi ugúdi. ²⁹ Léti janúfude lueí jabúguchun luágu dúbü, ába jágurun gádürü oúnguru tiyúnagiñe ugúnein, ába jagúrabajan larúgadun láu idíjeri. ³⁰ Súnti dan le, añája mádulungu asáminara lun jeséfuragun jóungua láu jeíbaagun tídaangiñe ugúnein, ába jagúmeserun aráriragüdoún salúfu dúnarugun, jadüga camá jágura oúnguru tígirigiñe ugúnein. ³¹ Ába lawísaruni Páblo gumándan jáma lisúdaaranígu, laríñaga joun.

—Ánjaña meréde ja tídan ugúnein, jugúya siñábei jeséfurun.

³² Ábati jíbuguni súdaara tugúrudun salúfu, ába jígiragüdünnun dúnarugun.

³³ Lubá larúgan, ába laríñagun Páblo joun súngebey lun jeígin, laríñaga joun.

—Bián dimáasu guetó lueígiñe marúmugun jumá buídu, meígin sarágu, ladüga idíjeri le juágubei. ³⁴ Ayúmuraguatina jun lun jeígin, líchuguba érei jun lun jeséfurun. Choúru numúti jun luágu úabei lan ni ában eféridiruti libágari.

³⁵ Lárigiñe laríñaguni Páblo cátei le, ába lanügün ában feín lújaburugu, ába líchugun eteíngiruni lun Búngiu jagíbugiñe súngebey. Ábati lagúbachagunun, ába leígin. ³⁶ Ába járügüdün ja jíbiri gurásu, ába giñe jeígin. ³⁷ Bián-sáñadiwa ürüwa-wein-díisi-sísi gürígia tídan ugúnein. ³⁸ Dánti le jóújáña quimúle, ába jáguruni türígu baránajoun lúntima tawálidagun ugúnein.

Tabúluchun ugúnein

³⁹ Dan le larúgadunbei, ibídiñeti fulásu le ñí jabei mádulungu joun, ába jaríjin ában beídi gebéyaariti, ába jóuchun lun janügünun ugúnein ñíjin. ⁴⁰ Ába jíbuguni lagürüga oúnguru, ába jígiruni baránaja, ába jasílacürüni fágaayu le esériwidubei lun jabúgurunun ugúnein. Ábati jaweínragüdüni lúgubu bíra, ába tagúmeserun ugúnein ayárafajoúa lun láru béya. ⁴¹ Ába tídin lídoun ában fulásu le ñí lubei biángua lan ébeeni, ába tadágarun, siñá lánjingichun tígiri ni murúsun, ába tagúmeserun abouchágu tiyúnagiñe, le lére lugúdi barána. ⁴² Ába yebe jabúseerun súdaara jáfaraguniña adaürütiña jilágubei lueí janúrajan áfulijeina. ⁴³ Ánjein le gumándan, quei busén lubei leséfuruni Páblo, mígirunti lun jadügüni súdaara le jarítagebei. Ábati lariñagun lun lan jachúbaragun ja gáfulijadíbaña baránajoun furúmiñe lun jachülürün múarugun, ⁴⁴ jáme jíbiri, jóudinme ligíbuagu buri fuláansu lúma buri tífe ugúnein. Ítara líña jachülürün súngubei múarugun séfuñu.

28

Páblo luágu ubouju le gíribei Málta

¹ Dan le séfujadiwa sun wagía láru béya, ligía wasúbudiruni luágu Málta lan líribei ubouju ligía. ² Buíti jóuseruniwa gürígia ja aganoúbaña ñi, ába jáfuragun ában oúnwenbun wátu quei dilíga lubeí áni niján júya ájuya, ába jamísurajaniwa sun wagía lun wabácharagun. ³ Ábati labúdajan Páblo wátu mábeiti, líchuguñein yebe wáturugun, ligía táfuridun ában jéwe tanúrajaña lueí lára wátu, ába tárügüdün luágu lújabu, ába tágürüni. ⁴ Dan le jaríjinbarun

lílana fulásu jéwe to dawágu luágu lújabu Páblo, ába jaríñagun jámagua.

—Mósu ában lan wügüri gáfarajati wügüri le, láu sun leséfurun baránajagiñe, mabúseerunti Búngiu lun labágaridun.

⁵ Ába láfuridunun Páblo jéwe wáturugun, masúseredunti ni cáta lun. ⁶ Agúrabatiñá yebe súngubei láludun lújabu, o láburujan lan ouwe. Lílüwagu jagúrabajan, dan le jaríjinbei luágu masúseredun lan ni cáta lun, ába lasáansirun jarítangun, ába jagúmeserun aríñaga luágu ában lan búngiu Páblo.

⁷ Yaráfa lun fulásu ligía, ñíñein lufúlasun ában wügüri le weírigutimaabei lídan sun ubouju ligía, Públio líribei, resíbi lumútiwa lúbiñe, seríwi láwa buídu luágu ürüwa wéyu. ⁸ Roun liñáti lúguchi Públio láu sándi, abíruaü, lúma denési. Ába lídin Páblo aríjei, lásun layúmuragun lun Búngiu luágu, ába líchuguni lújabu luágu, ába lareídagun. ⁹ Lárigiñe lira, ába gíñe jayábingua jíbiri sánditiña ja lídaanbaña fulásu ligía, ába jareídagun. ¹⁰ Ába jarúfuduni lubuídun jagáburi woun, edéweejatiña sarágu cátei woun, lárigiñe, dan le lachülürün dan lúnya wádinagun lun wasígiruni waweíyasun, ába jíchuguni sun le wemegeirubei woun lun waweíyasun.

Lachülürün Páblo ubúrugun Róma

¹¹ Lárigiñe ürüwa játi wáu luágu ubouju ligía, ába wádinagun tídoun ában ugúnein to eréderuboun ásügürei luríbouga ñi luágu ubouju ligía. Alejandríana ugúnein tugúya, ñíñanu jayáwa bián sándu luágu tigíbu ugúnein tugúya, Cástor lúma Pólux. ¹² Ába wachülürün ubúругu

Siracúsa, ába weréderun ũrúwa wéyu ñi, ¹³ ñígiñe wasígira láru láru dari wachülürün ubúrgu Régio. Larúgan, ába láfujan suédi, luágu libíaman wéyu ába wachülürün lídoun liraúraü aüdü le gíribei Puteóli. ¹⁴ Ñi wadárira átiri afíñetiña, ába jamísurajaniwa lun weréderun ában dimáasu jáma, lárigiñe, ába wígiragüdün lun ubúrgun Róma. ¹⁵ Agáambaña afíñetiña ja Rómabaña wawágu luágu awánte lan, ába jóudin wabároun, jíbiri chülü lúmoun fulásu le gíribei Fóro, le luágubei ũma gíriti Ápio, jíbiri, dúnguatiña wáma lídan fulásu le gíribei Ūrúwa Jában Chülüdügütiña. Dan le laríjnbaliña Páblo, ába líchugun eteíngiruni lun Búngiu, ába lárügüdün gurásu. ¹⁶ Dan le wachülürünbei Róma, ába ledéregeruniña gumándan adaürütiña lun jábuti oúnigirutiña, ánjeinti Páblo, ígira lumúti lun leréderun lábugua láu ában súdaara oúnigirei.

Lapúrichijan Páblo Róma

¹⁷ Ūrúwa wéyu lárigiñe lachülürün Páblo, ába loúnajan jawágu juríu weírigutiña ja Rómabaña, dan le adámuriguaaña, ába laríñagun joun.

—Nidújeñu, láu sun madügün nan ni cáta wuríbati joun juríu, ni lun le uágubei jéchuda binádu wagübürigu, derégawatina dáüwañu joun Rómama ubúrgu Jerusalén. ¹⁸ Lárigiñe jálügüdagúnina, álugatiñá yebe jígiragüdünina ladüga madári jamá nidúnrun le lúnti náfarúniwa jilágubei lueígiñe, ¹⁹ májatiña juríu lun nígirawagüdün, ába namúriajan lun urúeiba lan César agúseragüdána, láu sun madúnrun jamá ninásiñun nun. ²⁰ Ligía lubeíti lébubei noúnajan juágu lun naríjinün lúma lun

nadímurejan jun, ladüga lueígiñe cátei le uágubei weménigida wagía Israelítagu anája lubeí gürágu láu güríngüri le.

²¹ Ábati jaríñagun lun.

—Wagía, merésibirúngidiwa ni ában gárada buágu Judéagiñe, úagili giñe ni ában wapaísanu jádaangiñe ja nübinbaña ñígiñe aríñaguti wuríbati woun buágu. ²² Buséntiwa jamúga wagáambuni ca lan barítagebei, ladüga subúdi wamúti luágu adímurejóua lan wuríba luágu iséri adámurini le, le lánina lémeri Jesúsu, lídan sun fulásu.

²³ Ábati jíridun ában wéyu lun, ába jachülürün sarágu gürígia le ñí lubei lagánawa Páblo. Ába ladímurejan joun lúmagiñe bináafin darí gúñoun luágu larúeijan Búngiu. Louchun lun lafíñeragüdüniña luágu Jesúsu lan asálbaragüleibe le jagúrabajabei láu layúsuruni lilúrudun Moisés lúma le jabürüjabei profétagu. ²⁴ Jíbiri, afíñetiña luágu le laríñagubei Páblo, jíbiri mafíñetiña. ²⁵ Queíti múaradun jamá jámagua luágu jarítangun, ába jagúmeserun ñüdüngua, ábati laríñagun Páblo joun.

—Lígia laríñagunbei Sífiri Sándu joun binádu wagübürigu lídaangiñe proféta Isaías.

²⁶ Beíba, baríñagame joun gürígia ja juríubaña.

Jugúya, jagáambuba ában ugánu sarágu dan, úabei gunfaráanda jumáni laníchigu dimúrei le jagáambubei.

Jaríjuba sarágu cátei, meféenbadün luágu,

²⁷ ladüga deréeru janígi gürígia ja, áni wuríbati jagáambun, darú jamuti jágu, lueí jaríjini laníchigu cátei le jaríjubei,

úati gíñe gunfaráanda jamáni cátei le jagáambubei,
derétu gíñe janígi,
máluajan jamútina lun nareídaguagüdünun jawáni.

²⁸ Subúdi jumeí luágu oúnaja láali lan Búngiu ugánu
luáguti Jesúsu le méme Wasálbaragülebei joun ja
mámabaña juríu, áni jagía, jánjaruba lun.

²⁹ Dan le laríñagunbei Páblo ítara, ába jóúdingua
juríu, adímurejeina jámagua luágu cátei le.

³⁰ Reídeiti Páblo bián irúmu dayáruti tídan lúban
ájayajóutu, resíbi lumútiña sun ja ñüdünbaña
aríjei. ³¹ Apúrichijati luágu larúeijan Búngiu
láu furáangu, arúfudaja ligía luágu Wabúreme
Jesucrístu, mebéresejanga ni ában lun.

Lerérun Búngiu To Lánina Iséri Darádu
New Testament in Garifuna (HO:cab:Garifuna)

copyright © 2012 Wycliffe Bible Translators, Inc.

Language: Garifuna

Translation by: Wycliffe Bible Translators, Inc.

Garifuna [cab], Honduras

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Garifuna

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source files
dated 29 Jan 2022
df8e4807-f4f9-5f4a-ab14-d1f7ffe98b0a